

**ЎЗБЕКИСТОН РЕСПУБЛИКАСИ ОЛИЙ ВА ЎРТА
МАХСУС ТАЪЛИМ ВАЗИРЛИГИ**

**НИЗОМИЙ НОМИДАГИ ТОШКЕНТ ДАВЛАТ
ПЕДАГОГИКА УНИВЕРСИТЕТИ**

ТОШКЕНТ МОЛИЯ ИНСТИТУТИ

Р.Расулов, Н.Хусанов, Қ.Мўйдинов

**«НУТҚ МАДАНИЯТИ ВА
НОТИҚЛИК САНЬАТИ»
(ўқув кўлланима)**

**Тошкент
“IQTISOD-MOLIYA”
2006**

Р.Расулов, Н.Хусанов, Қ.Мўйдинов. Нутқ маданияти ва нотиклик санъати. Ўқув қўлланма. Т.: “IQTISOD-MOLIYA”, 2006. 132 бет.

Кўлланмада нутқ маданияти, нутқнинг коммуникатив сифатлари, тил ва нутқ, адабий тил, услубшунослик ҳамда терминология кабилар ҳақида фикр юритилади. Шунингдек, ишда нотиклик санъатига оид маълумотлар ҳам берилиб, улар амалий машғулотлар билан мустаҳкамланади, халқ оғзаки ижодидан намуналар келтирилади.

Буюк алломаларнинг нотиклик санъатига бўлган қарашлари ҳам китобдан жой олган.

Ўқув қўлланма нутқ маданияти муаммолари билан шуғулланувчи ва қизиқувчи барча соҳа вакилларига мўлжалланган.

Тошкент Молия институти қошидаги Олий ўқув юртларо илмий-услubий кенгашнинг 2006 йил 27 марта даги йиғилиши қарорига кўра ўқув қўлланма сифатида чоп этишга қарор қилинган.

Тақризчилар: филология фанлари номзоди,
доцент С.Мухамедова
филология фанлари номзоди,
доцент Ў.Лафасов

**Шевашунос олим проф. А.Шерматов
хотирасига бағишлаймиз.**

Кириш

Ўзбек халқи таълим - тарбияга оид бой меросга эга бўлиб, авлодларда ватанпарварлик, инсонпарварлик, камтарлик, меҳнатсеварлик, дўстлик, меҳр-оқибат, биродарлик, одобилик каби умуминсоний фазилатларни тарбиялаб келган. Шарқ мутафаккирларининг таълим - тарбияга оид асалари ҳам ана шу мероснинг туб негизини ташкил этади.

Мустақиллик туфайли халқимиз дунёга юз тутди ва жаҳон бизни таниди. Биз тарихимизга, маданиятимизга янгича назар билан қарай бошладик ҳамда ўз ечимини кутаётган муаммоларни ижобий ҳал қилишга киришдик.

Барча соҳалар сингари она тилимиз ва у билан боғлиқ муаммолар ҳам аста-секин ечимини топмоқда. Хусусан, нутқ маданиятига доир масалаларни ҳал қилишда тиашунос олимларимизнинг меҳнатлари, изланишлари таҳсинга лойиқдир.

Нутқ маданияти жамият маданий тараққиёти, миллат маънавий камолотининг муҳим белгисидир. Мамлакатимизда маънавий-маърифий ислоҳотлар давлат сиёсатининг устувор йўналиши деб эълон қилинган бугунги кунда нутқ маданияти масалалари ҳар қачонгидан ҳам долзарблиқ касб этмоқда.

Республикамизнинг «Давлат тили» ҳақидағи қонуни, «Таълим тўғрисида»ги қонуни, «Қадрлар тайёрлаш миллий дастури» ва бошқа ҳужжатларда маънавий-маърифий тарбияга, тил масалаларига алоҳида эътибор берилган. Ҳар бир кадр, энг аввало, ўз она тилининг чинакам соҳиби бўлмоги лозим. Президентимиз И.А.Каримов Ўзбекистон Республикаси Олий мажлисининг 1997 йил 29 августидаги IX сессиясида сўзлаган нутқида: «Ўз фикрини мутлақо мустақил, ўз она тилида равон, гўзал ва лўнда ифода эта олмайдиган мутахассисни, аввалимбор, раҳбар курсисида

үтирганларни бугун тушуниш ҳам, оқлаш ҳам қийин» – деб таъкидлайди.¹

Нутқ маданияти ҳозирда тилшунослик фанининг долзарб муаммоларидан бири ҳисобланади. Бу муаммони ҳал этиш умуммаданиятимиз тараққиётида, шунингдек, олий мактабларда, ўрта маҳсус ўқув юртларида, ўрта мактабларда дарс ўтиш жараёнини янада яхшилаш, такомиллаштириш билан ҳам боғлиқ. Таъкидлаш керакки, бугунги кунда нутқ маданияти фанининг барча ўқув юртларида ўқитилиши қувонарлидир. Чунки нотиқлик санъати сирларини билиш, ўрганиш барча соҳа вакиллари, мутахассислари учун, умуман, ҳар қандай маданиятли инсон учун ҳаётий зарурат деб ҳисобланиши керак. Ўзбек адабий тили ва унинг меъёрларини илмий жиҳатдан ўрганиш ҳам ўзбек нутқ маданияти соҳаси учун ниҳоятда муҳимдир. Адабий тилнинг ривожланиш қонуниятларини, адабий тил меъёрларининг умумий ҳолатини, ундаги тургун ва нотургун ҳодисаларни чуқурроқ текширмай туриб, адабий тил (нутқ) маданияти ҳақида гапириш мумкин эмас.

¹ И.А.Каримов Баркамол авлод - Ўзбекистон тараққиётининг пойдевори. -Т.: 1997, 9-бет.

«НУТҚ МАДАНИЯТИ ВА НОТИҚЛИК САНЬАТИ» КУРСИНИНГ МАҚСАД ВА ВАЗИФАЛАРИ

Нутқ маданияти ҳақидағи таълимот қадимги Рим ва Афинада шаклланған бұлса ҳам, унға қадар Миср, Ассирия, Вавилон ва Ҳиндистон каби мамлакатларда пайдо бүлганилиги нотиқлик санъати тажрибасыдан маълум. Ушбу даврларда жамияттинг ривожланиши, савдо - сотиқнинг, суд ишларининг ниҳоятда тараққий этиши нотиқликни санъат даражасига күттарди. Чунки у пайтларда давлат араббларининг обрӯ - эътибори ва юқори лавозимларга күтарилиши, уларнинг нотиқлик маҳоратига ҳам боғлиқ бўлган. Нотиқлик санъати саркардалик маҳорати билан баробар даражада улуғланған.¹ Машхур нотиқ Цицерон: «Тарихда ё яхши ҳарбий саркарда, ё яхши нотиқ бўлиши керак», деган экан. Бу гапда катта ҳикмат бор. Ҳарбий саркарданинг итоатида кўп сонли лашкар бўлишини тасаввур қиласак, бу сўз тасодифий үхшатиш эмаслигига амин бўламиз. Грек ва Рим нотиқлари Аристотель, Демосфен, Цицерон, Квинтилиан каби назариётчиларнинг ҳаётий тажрибалари ҳам бунга мисолдир. Улар кишилилк жамиятида риторика ва нотиқлик санъатининг ўзига хос мақтабини яратдилар. Цицероннинг «Нотиқлик ҳақида», «Нотиқ», «Брут» асарлари, Марк Фабий Квинтилияннинг «Нотиқ билими ҳақида», Аристотелнинг «Риторика» каби асарлари ҳам қадимги Греция ва Римда маданий нутқ, нотиқлик назарияси анча ривожланғанлигини кўрсатади.

Ўрта Осиё маданияти тарихида ҳам нутқ маданияти ўзига хос мавқега эгадир. Шарқда, жумладан, Мовароуннаҳрда нотиқлик, воизлик, яъни ваъзхонлик «Қуръон»ни тарғиб қилиш билан муштарақ ҳолда сўзнинг аҳамияти, маъноси ва ундан ўринли фойдаланиш борасида кўп яхши фикрлар айтилган. Ана шу нуқтаи назардан қаралса, «Нутқ одоби», «Муомала маданияти» номлари билан юритилиб келинган «нутқ маданияти» тушунчаси жуда қадимдан олимлар, зиёлиларнинг дикқатини тортган: Абу Райхон Беруний, Абу Наср Форобий, Ибн Сино, Абу Абдуллоҳ Ал-Хоразмий, Маҳмуд Кошгариј, Маҳмуд Замахшарий, Юсуф Хос Ҳожиб, Аҳмад

¹ Р.Қўнгиров, Э.Бегматов, Ё.Тожиев Нутқ маданияти ва услубият асослари. -Т.: 1992. 6-бет.

Югнакий, Сұфи Оллоёр, Абдурахмон Жомий, Алишер Навоий каби улуг сиймолар нутқ одоби масалаларига, умуман, нутққа жиғдий әътибор бериш билан бирга тилга, лугатта, грамматикага ва мантиқшуносликка оид асарлар Ѽзғанлар. Буюқ қомусий олим Беруний (973-1048) ўзининг «Геодезия» асарида ҳар бир фаннинг пайдо булиши ва тараққий этиши инсон ҳаётидаги зарурый әхтиёжлар талаби билан юзага келишини айтади. Унингча, грамматика, аruz ва мантиқ фанлари ҳам шу әхтиёжнинг ҳосиласидир.

Улуг ватандошимиз Абу Наср Форобий түгри сұзлаш, түгри мантиқий холосалар чиқариш, мазмундор ва чиройли нутқ тузища лексикология, грамматика ва мантиқнинг нақадар ақамияти катталиги ҳақида шундай дейди: «Қандай қилиб таълим бериш ва таълим олиш, фикрни қандай ифодалаш, баён этиш, қандай сұрапаш ва қандай жавоб бериш (масаласи)га келганимизда, бу ҳақда билемларнинг энг бириңчиси жисмларга ва ҳодисаларга исм берувчи тил ҳақидаги илмлар деб тасдиқлайман....».

Кайковус томонидан 1082-1083 йилларда яратылған, қадимги Шарқ педагогикасининг ажойиб асарларидан бири ҳисобланған «Қобуснома» да ҳам нутқ одоби ва маданияти ҳақида ибратомуз фикрлар айтилған. Асар 44 бобдан иборат бўлиб, унинг 6-, 7- боблари сўз одоби ҳақидадир. Муаллиф фарзандига қилған насиҳатлари орқали ўқувчини ёқимли, мулоим, уринли сұзлашга, беҳуда гапирмасликка ундаиди. Сұзлаганда ўйлаб, ҳар бир фикрдан келиб чиқадиган холосани кўз олдига келтириб, гапириш кераклигини, киши камтар бўлиши, ўзини халқ орасида оддий тутиши лозимлигини эслатиб, маҳмадоналик қилиш, кўп гапириш донолик белгиси эмаслигини шундай ифодалайди: «Эй фарзанд, агар ҳар нечаким сухандон бўлсанг, ўзингни билғондан камроқ тутғил, то сўзлаш вақтида нодон ва бебурд бўлиб қолмагайсан. Кўб билиб, оз сўзлағил ва кам билиб кўп сўз демагил. Нима учунки, ақлсиз шундоқ киши бўладур - у кўб сўзлар. Дебдурларки, хомушлиқ саломатлик сабабидур, чунки кўб сўзлагучи оқил киши бўлса ҳам, авом уни ақлсиз дерлар».¹

¹ Кайковус «Қобуснома» -Т.: Ўқитувчи, 1986, 45-бет.

Улуг шоир Юсуф Хос Ҳожиб туркий ҳалқларнинг XII асрдаги ажойиб бадиий ёдгорлиги бўлган «Қутадгу билиг» («Бахт келтирувчи билим») асарида сўзларни тўгри танлаш ва тўгри қўллаш ҳақида: «Билиб сўзласа сўз билиг санаалур» деган эди. Қисқа сўзлаш, сўзларга иложи борича кўпроқ маъно юклаш ҳақида:

Угуш сўзлама сўз бирор сўзла оз,
Туман сўз тугунини бу бир сўзла ёз,

дейди. Мазмуни: сўзни кўп сўзлама, камроқ сўзла. Туман (минг) сўз тугунини шу бир сўз билан еч. Гапиришдан мақсад сўзловчи кўзда туттан нарса, ҳодиса, воқеаларни тингловчига тўгри, таъсирчан етказишдан иборат. Шундай экан, нутқнинг тўгрилиги, равонлиги ва мантиқийлигига эришиш муҳим аҳамият касб этади. Мутафаккир сўзловчини тилнинг аҳамиятини тушунганд ҳолда, ҳовлиқмасдан, сўзнинг маъноларини яхши англаб, нутқни равон қилиб тузишга чақиради.

Адид Аҳмад Юғнакий (XII-XIII) ҳам сўзлаганда нутқни ўйлаб, шошмасдан тузишга, кераксиз, ярамас сўзларни ишлатмасликка, мазмундор сўзлашга чақиради. Нотўгри тузилган нутқ туфайли кейин хижолат чекиб юрмагин, деб сўзловчини огоҳлантиради:

Ўқуб сўзла сўзни эва сўзлама,
Сўзунг кизла кедин, бошинг кизлама.

Мазмуни: (Сўзни ўқиб сўзла, шошиб гапирма, кераксиз ярамас сўзларни яшир, ярамас гапинг туфайли кейин бошингни яшириб юрма)¹.

Нутқ одоби деб юритилган қоида ва кўрсатмаларда содда ва ўринли гапириш, қисқа ва мазмундор сўзлаш, эзмалик, лақмаликни қоралаш, кексалар, устозлар олдида нутқ одобини сақлаш, тўгри, рост ва дадил гапириш, ёлғончилик, тилёгламаликни қоралаш ва бошқа шу каби мавзуларда сўз боради.

Ўрта Осиё нотиқлигининг ўзига хос хусусиятлари шундан иборат эдики, у, энг аввало, уша давр тузумининг

¹ Каранг: Аҳмад Юғнакий, Ҳибатул – ҳақойиқ. -Т. 1971, 78-бет.

манфаатларига хизмат қилар эди. Бу даврда нотиқлик саънати усталарини надимлар, қиссагўйлар, масалгўйлар, бадиҳагўйлар, қироатхонлар, муаммогўйлар, воизлар, гўяндалар, маддоҳлар, қасидахонлар деб юритилиши ҳам ана шундан далолат беради. Аммо тилнинг яратувчиси халқ эканлигини ва унинг, энг аввало, халққа хизмат қилишини тўғри англовчи соглом фикрли кишилар унинг ижтимоий моҳиятини доимо тўғри тушуниб келганлар. Навоийнинг давлат арбоби сифатида меҳнаткаш халқ олдида қилган чиқишлари, унинг тил ҳақида айтган фикрлари бунинг далилидир. Алишер Навоийнинг «Мұҳокамат ул-лугатайн», «Маҳбуб ул-қулуб», «Назм ул-жавоҳир» асарлари үзбек тилида нутқ тузишнинг гўзал намуналари бўлиши билан бирга унинг мукаммаллашишига ҳам катта ҳисса қўшди. У ўзининг «Маҳбуб ул-қулуб» асарида шундай дейди: «Тил мунча шараф била нутқнинг олатидур ва ҳам нутқдирки, гар нописанд зоҳир бўлса, тилнинг офатидур...»¹ яъни, тил шунчак шарафи билан нутқнинг қуролидир, агар у ўринсиз ишлатилса, тилнинг офатидир.

Алишер Навоий майин, ёқимли, ширали овоз билан сўзлаш одоби ҳақида шундай ёзади: «Сўзни кўнглунгда пишқормагунча тилга келтирма, ҳарнаким кўнглунгда бўлса, тилга сурма». Мазмуни («Сўзни кўнглунгда пишишиб олмагунча, сўзлама, кўнглингда бўлган ҳар қандай фикни ҳам айта берма»).

Ўзбек бадиий нутқи тарихида Заҳириддин Муҳаммад Бобур алоҳида ўрин тутади. Шоирнинг назми ва «Бобурнома»си ўзбек нутқининг гўзал намуналариdir. Бобур ўзи ҳаммабоп ёзиш билан бирга бошқаларга ҳам шундай иш тутишни маслаҳат беради. Жумладан, ўғли Ҳумоюнга ёзган бир хатида бировга юборилган мактубни муаллифнинг ўзи бир неча бор ўқиб кўришига, унинг равонлигига, сўзларнинг кўзда тутилган маънони тўғри акс эттирганлигига ишонч ҳосил қилганидан сўнг жўнатишга чақиради.

Кўринадики, Шарқ мутафаккирлари нотиқ олдига тилни пухта ўрганиш, унинг лугавий бойлиги ва грамматикасини пухта эгаллаш, мантиқли сўзлашни ўрганиш, нутқ-

¹ Алишер Навоий. Маҳбуб-ул қулуб. 14-том, -Т.: 1998, 94-бет.

ни ички (мазмун) ва ташқи (шакл) кўринишига бирдай эътибор бериш, гўзал ва таъсирчан нутқ туза билиш, тил бойликларини мақсадга мувофиқ ҳамда ўринли ишлатиш вазифаларини қўядилар ва уларнинг ижросини кузатадилар, чуқур таҳдил этадилар.

«Нутқ маданияти ва нотиқлик санъати» фани ўзига хос амалий соҳа сифатида тилшуносликнинг назарий фанларидан олинган билимларга суюнган ҳолда тўгри, таъсирли нутқ тузиш йўлларини ўргатади. У тил, тил меъёрлари, нутқ, нутқнинг сифатлари, нутқий услублар, нутқда учраши мумкин бўлган камчилик ва хатолар, нутқ талаффузига доир муаммолар юзасидан баҳс юритади.

«Нутқ маданияти ва нотиқлик санъати» фани ўз текшириш обьекти ва вазифаларига эга. Унинг текшириш предмети нутқнинг лисоний қурилиши, адабий тил меъёрлари ва нутқнинг коммуникатив (алоқа учун керакли) фазилатларидир. Нутқ маданияти назариясида тил меъёри марказий тушунча ҳисобланади. Тил маданиятининг асосий текшириш обьекти адабий тил меъёрлари, асосий вазифаси эса ушбу меъёрдаги иккиланишларни бартараф этиш бўлмоги керак.

«Нутқ маданияти ва нотиқлик санъати» фани адабий тил меъёрларини, унинг тарихийлигини, тараққий этиб боришини ундаги баъзи бирликларнинг эскириши, улар ўрнида янги меъёрий бирликларнинг пайдо бўлишини кузатиб, қайд этиб боради. Бироқ бу фан адабий меъёрларни яратмайди, баъзи бир ҳодисаларни меъёр сифатида мажбуран киритмайди. Балки ўзбек миллий адабий тили фаолиятини, унинг ривожланишини кузатиб боради, обьектив қонунларини кашф этади, шулар асосида тавсиялар беради.¹

«Нутқ маданияти ва нотиқлик санъати» фани ҳозирги ўзбек адабий тилини ўрганар экан, шу адабий тил асосида вужудга келадиган барча нутқ турлари, адабий тилга асос бўлувчи халқ тили шевалари ҳам унинг обьектига дахлдордир. Нутқ маданияти соҳаси адабиётшунослик, поэтика, эстетика, этика, педагогика, мантиқ, руҳшунослик, сиёсатшунослик соҳалари билан боғлиқ. Миллий

¹ Т.Құдратов. Нутқ маданияти асослари. Т.: Ўқитувчи, 1993, 15-16-бетлар.

мустақиллик мафкурасининг таркибий қисми ҳисоблан-миш давлат тили сиёсати ва унга оид ҳуқуқий ҳужжатлар нутқ маданиятининг асосий ашёларидандир. Нотиқлик ва воизлик санътига оид асарлар, ўзбек маданий нутқига асос бўлган миллий адабий мерос намуналари, ўзбек миллий ҳужжатчилиги ҳамда давлат тилида иш юритиши қонун - қоидалари мажмуаси нутқ маданияти фанининг асосий объектларидандир.

Кейинги йилларда олий ўқув юртларининг барча факультетларида «Нутқ маданияти ва нотиқлик санъати» фанининг ўқитилаёттанлиги қувонарли ҳолдир. Ёш авлодни тарбиялашдек ўта масъулиятли вазифани ўз зиммасига олаётган талабанинг ўз фанини чуқур ўрганишининг ўзи етарли эмас. Чунки «ўқитувчининг нутқи ўтмас, ночор бўлса, унинг билими қанчалик чуқур ва тугал бўлмасин, ўзига ҳам азоб, ўқувчи шўрликка ҳам азоб. Она тилида пухта, лўнда ва ширадор нутқ туза олиш малакаси ва маҳорати математика ўқитувчиси учун ҳам, она тили ўқитувчиси учун ҳам бирдай зарурий фазилатдир. Ўқитувчи гўзал, ўзни ҳам, сўзни ҳам қийнамайдиган равон ва ифодаларга бой нутқи билан ўқувчиларни маҳлиё этиб, бермоқчи бўлган билимини ёш инсон шуурига осонлик билан олиб киради. Зотан, она тили миллий маънавиятимизнинг, дунёни теран идрок этишимизнинг заминидир».¹

Ҳозирги ўзбек адабий тилининг тўлиқ шаклланганлиги ва улкан ижтимоий вазифани бажараёттанлиги айни ҳақақатдир. Бу тил халқимиз учун умумий тил сифатида шаклланди.

Ўзбек тилига давлат тили мақомининг берилиши Республикаизда давлат ишларининг, ўқиш-ўқитиши, таълим-тарбия, тарғибот-ташвиқот ишларининг шу тilda олиб борилиши учун жуда катта имконият яратди. Тилга бўлган муносабат тубдан ўзгарди, унинг барча имкониятларини ўрганиш ишлари кенг кўламда олиб борилмоқда. Айни вақтда, шуни ҳам айтиш жоизки, тилнинг ижтимоий вазифасининг бажарилиш даражасини белгиловчи омиллардан бири бўлмиш нутқ маданияти соҳасини чуқурроқ

¹ Н.Маҳмудов. Маърифат манзиллари. -Т. 1999. 28- бет.

урганиш олдимизга қўйилган муҳим масалалардан бири ҳисобланади. Чунки нутқимиздаги нуқсон ва камчиликларни бартараф қилиш, нутқ маданиятини ҳар қачонгидан ҳам яхшироқ ривожлантириш умумдавлат аҳамиятига эга бўлган сиёсий ва ижтимоий масаладир. Бу масала билан шугулланиш ишига фақат тилшуносларгина эмас, республикамида истиқомат қилувчи барча соҳа вакиллари зътибор беришлари мақсадга тўла мувофиқдир. Чунки, нутқ маданияти умуминсоний маданиятнинг таркибий қисми бўлиб, кишиларни юксак маданият соҳиби бўлишларини белгилайди. Бу масаланинг бир жиҳати бўлса, иккинчи жиҳати биз халқаро доирада икки қарама – қарши ижтимоий гуруҳ ўртасида мафкуравий кураш ниҳоятда кескинлашган бир даврда яшамоқдамиз. Бу нарса ҳам мафкуравий курашнинг асосий қуороли бўлган тилнинг ҳар қачонгидан ҳам ўткир ва кескин бўлишини тақозо этади. Президентимиз И.А.Каримов ҳам бунга алоҳида этибор бериб шундай деган: «Фояга қарши фақат гоя, фикрга қарши фақат фикр, жаҳолатга қарши фақт маърифат билан баҳсга киришиш, олишиш мумкин».¹

«Ўқитувчи ва ўқувчи муносабатидаги мажбурий итоаткорлик ўрнини онгли интизом эгаллаши жуда қийин кечяпти. Ўқитувчининг бош вазифаси ўқувчиларда мустақил фикр юритиш кўникмаларини ҳосил қилишдан иборатлигини кўпинча яхши тушунамиз, лекин, афсуски, амалда, тажрибамизда унга риоя қилмаймиз.

Демократик жамиятда болалар, умуман, ҳар бир инсон эркин фикрлайдиган этиб тарбияланади. Агар болалар эркин фикрлашни ўрганимаса, берилган таълим самараси паст бўлиши муқаррар. Албатта, билим керак. Аммо билим уз йўлига. Мустақил фикрлаш ҳам катта бойлиқдир».²

Мактабда нутқ тадбиркорлигини сингдириш ўқитувчининг бош вазифасидир. У биринчи соатдан бошлаб то охирги машгулотгача ўқувчиларда нутқ маданияти (тадбиркорлиги)ни тарбиялашга хизмат қилиши керак.

Бошқача айтганда «Айни пайтда нутқий маданият тарбияси билан мактабдаги, ҳеч бир истисносиз, барча ўқув фанлари ҳам билвосита шугулланиши керак.

¹ И.А.Каримов. Баркамол авлод орзуси. -Т. 2000. 35-бет.

² И.А.Каримов Ўша асар. 17-бет.

Математика бўладими, физика ёки тарих бўладими, ўқитувчи ўз нутқий маданияти билан намуна кўрсатиши, тегишли фан соҳасининг тугал тилини ҳамойиш этиши ва шу йул билан ўқувчидаги сўз сезгисига куч бериши мақсадга мувофиқ. Таълим амалиётида кўргазмалилик азалдан энг зарурий омил сифатида қараб келинади, шунинг учун ўқитувчи жуда кўп вақтини турли кўргазмали қуроллар тайёрлашга сарфлайди. Бу маъқул, аммо, унугтаслик керакки, нутқий маданиятни ўргатиш, чиройли сўз завқини ўстириш, умуман, тил эстетикаси тарбиясида, асосий, жонли кўргазмали қурол ўқитувчининг ўзиdir,¹ унинг нутқидир, нутқ маънавиятидир.

Такрорлаш учун саволлар:

1. Нутқ маданияти ҳақидаги таълимот қаерда шаклланган?
2. Шарқда нутқ маданияти масалалари билан шугулланган мутафаккирлардан кимларни биласиз?
3. «Нутқ маданияти ва нотикълик санъати» фанининг мақсад ва вазифаси нималардан иборат?

Таянч тушунчалар

Нутқ - (арабча) фикрни сўз орқали ифодалаш.

Назм - (арабча) шеърий асар: шеърият жанри, шеър ўлчови.

Наср - (арабча) проза, прозаик асар, проза жанри.

Аруз-шеър тузилишида қисқа ва чўзиқ ҳижо (бўғин)ларнинг маълум тартибда гурухланиб, такрорланиб келишига асосланган вазн системаси. Аруз вазни.

Мантиқ - (арабча) тафаккур шакли ва қонунлари ҳақидаги фан логика.

Маданият - (арабча) таълим - тарбиялилик ва зиёлилик.

¹ Н.Махмудов. Маърифат манзиллари. -Т.: 1999. 52 - бет.

НУТҚ МАДАНИЯТИ ВА АДАБИЙ МЕЬЁР. НУТҚИЙ МАЛАКА

Маданият тушунчаси ниҳоятда кенг бўлиб, у жамият хаёти ва фаолияти билан боғлик бўлган деярли барча жараёнларни, йўналишларни, ҳодисаларни қамраб олади.

Нутқ маданияти жамият ҳаётининг, жамият маданиятининг ўта муҳим ажралмас таркибий қисми, муайян воқелиги, кўриниши сифатида алоҳида аҳамиятга эгадир. У фикр алмашиб муомила, сўзлаш каби кундалик, доимий, зарурий жараёнларни ўз ичига олади, уларни «бошқарадиган», улар орқали воқеликка айланади, таъсир килиш кувватига эга бўлади.

Демак, нутқ маданияти нутқ билан, нутқ фаолияти билан бевосита боғлиқ экан, тил нима, нутқ нима деган саволларнинг келиб чиқиши мутлақо табиий ва мантиқийдир.

Тил ва нутқ ўзаро диалектик боғлиқ ижтимоий-тариҳий, ижтимоий-психик ҳодисалар бўлиб, тил алоқа қуроли сифатида, нутқ эса алоқа усули сифатида мавжуддир.

Нутқ - бу тил деб аталувчи, ижтимоий-индивидуал ноёб қуролдан фойдаланиш жараёни, тил бирликлари, имкониятларининг объектив борлиқ, тафаккур ҳамда вазият билан ўзаро зарурий, доимий муносабатда намоён бўлишидир. Нутқ бу расмий тиљдир. У кенг маънода сўзлардан, сўз бирикмалари ва гаплардан ташкил тошади.

Маданий гапиришга интилиш тушунчаси барча халқларда қадимдан мавжуддир. Бу тушунча муайян лингвистик меъёрлар, этик ва эстетик талаблар билан алоқадор бўлган тушунчадир. Демак, нутқ маданияти тушунчаси ҳар бир халқ тили ва миллат маънавиятини белгиловчи (кўрсатувчи) этик ва эстетик категориядир, ҳодисадир.

Нутқ маданияти фақаттина адабий тилни онгли ва мақсадга мувофиқ меъёрлашга (уни қайта ишлаш ва бойитишга) қаратилган ҳаракатларгина эмас, балки миллатнинг умумий маданиятини кўтариш, одамларга маълум «тил диди»ни тарбиялашга хизмат қилувчи фаолият ҳамдир.

Нутқ маданияти термини тилшуносликда уч хил ҳодисани ифода этади:

- 1) маданий нутқнинг, яъни нутқий ҳодисанинг номи;
- 2) маданий нутқ тушунчаси билан боғлиқ ва нутқ маданияти деб юритилувчи илмий муаммонинг номи;
- 3) нутқ маданияти муаммоларини ўрганиш билан шугулланувчи соҳанинг, тилшунослик фани бўлимининг номи.

Келтирилган учта ҳодисанинг ҳар бири мураккаб кўринишларига, қирраларига эга, уларни бир-бири билан қориштирмаслик лозим.¹

Шундай қилиб:

1. Нутқ маданияти адабий тил ривожининг ўзига хос хусусиятларидан бири (Прага лингвистик мактаби).
2. Нутқ маданияти (тил маданияти) — бу адабий тил меъёрларининг шаклланиши ва силиқланишига ёрдамлашишдан иборат бўлган фаолият, яъни тил ривожига онгли аралашувдир (Прага лингвистик мактаби).
3. Нутқ маданияти тилни, унинг қонун-қоидаларини онгли идрок қилиш, аниқ, равshan, ифодали нутқ тузা олиш маҳоратидир (А.Гуревич ва б.).
4. Нутқ маданияти кишиларнинг ўзаро тўлиқ ва теран фикрлашиши, тилнинг барча имконият ва воситаларини пухта эгаллашишдан иборатдир (Б.Н.Головин ва б.).
5. Нутқ маданияти фақат тўғри нутқгина эмас, балки уқувлилик ҳамда нутқий чечанлик ҳамдир (Г.О.Винокур ва б.).
6. Нутқ маданияти тил воситаларидан ўринли фойдаланган ҳолда мақсадга мувофиқ сўзлаш ва ёза олиш санъатидир. (А.И.Ефимов).
7. Нутқ маданияти бу, аввало, фикрлаш маданиятидир. (Д.Э.Розенталь ва бошқалар)
8. Миллий ўзига хослиги билан ҳам ажralиб турувчи нутқ маданий нутқдир. (М.Агафanova).²

Холоса шуки, нутқ маданияти тилни - алоқа - аралашув қуролини ишлатишга бўлган муносабатдир. Тил вакилларида бу ноёб қуролнинг имкониятларига муносабат, уни ишлатишдаги бошқа омиллар: тафаккур, онг,

¹ Э.Бегматов, А.Бобоева, М.Асомиддинова, Б.Умуркулов, Ўзбек нутқи маданияти очерклари. -Т.: 1998, 31 – бет.

² Э.Бегматов, А.Бобоева, М.Асомиддинова, Б.Умуркулов, Ўзбек нутқи маданияти очерклари. 45-бет.

борлиқ, турли вазият ва ҳолатлар, мақсадға бұлған муносабат қанчалик юқори савияда бұлса, нутқ маданияти ҳам шунчалик юқори савияда бұлади. Аксинча бұлса-чи, унда нутқ маданияти ҳам паст савияда бўлиши муқаррар.

Нутқ маданияти тұғрисида гап борар экан, табиийки, нутқда сұзларнинг ўринли ва ўринсиз ишлатилиши тұғрисида ҳам баҳс боради. Құлланған тил бирлигини тұғри ёки нотұғри дейилганаңда, албатта, маълум бир үлчов (мезон) га асосланишимиз тайин. Мана шу үлчов (мезон) тильтуносликда адабий тил меъёри деб юритилади.

Ҳар бир лаҗжанинг, сұзлашув тилининг, адабий тиленинг үз меъёрлари бұлғанидек, нутқнинг алоҳида күринишлари бұлған арголар, жаргонлар ҳам үз меъёрига эга. Хусусий меъёрлар қыйидагича күрсатилади: 1. Диалектал меъёр. 2. Сұзлашув нутқи меъёри. 3. Арголар, жаргонлар меъёри. 4. Адабий тил меъёри (адабий меъёр).

Адабий меъёр. Маълум бир ҳудудда тарқалған узус имкониятлари үша ҳудудда яшовчи аҳоли учун истисносиз тушунарлы бұлади, яъни алоқаны енгил амалга оширишга имкон беради. Бу — тиленинг үзи меъёрдан иборатлигини күрсатади. Меъёр — тиленинг яшаш шаклидир.¹

Адабий меъёр узусга асосланади, ундан олинади. Адабий меъёр адабий тил билан бирга туғилади, бадий адабиёттинг, халқ маданиятининг тараққиеті билан ривожланиб, үз қонун -қоидаларини мустаҳкамлаб боради.

Адабий меъёр узусдан олинганлиги сабабли ҳамма учун тушунарлы бұлади. Шунинг учун жамият тараққиётида мұхим аҳамият касб этади. Жамият аязоларини үюштирища, катта вазифаларга отлантирища адабий тил, унинг меъёрлари жамият учун ниҳоятда зарурдир.²

Ўзбек адабий тили меъёрлари илмий асарларда қыйидагича тасниф қилинади:

1. Лексик - семантик меъёр.
2. Талаффуз – (орфоэпик) меъёр.
3. Ёзув (графика) меъёри.
4. Фонетик меъёр.
5. Акцентологик (ургуни тұғри құллаш) меъёр.

¹ Т.Кудратов. Нутқ маданияти асослари. Т.: Ўқитувчи, 1993, 38-бет.

² Т.Кудратов. Нутқ маданияти асослари. Т.: Ўқитувчи, 1993, 40-бет.

6. Грамматик (морфологик ва синтактик) меъёр.
7. Сўз ясалиш меъёрлари.
8. Имловий меъёр.
9. Услубий меъёр
10. Пунктуацион меъёр.¹

Адабий меъёрнинг оғзаки ва ёзма кўринишлари мавжуд бўлиб, оғзаки адабий меъёрнинг ривожланишига халқ қизиқчилари, аскиячилари, латифагўй халқ шоир - баҳшилари катта ҳисса қўшсалар, ёзма адабий меъёрнинг шаклланишида белгиланган ёзув шакли асосида ёзиб қолдириладиган ёзма адабиётнинг хизмати чексиздир. Умуман олганда, адабий тил меъёрини ўрганиш янги ҳодиса эмас. Тил меъёри ва адабий меъёр муаммо сифатида нутқ маданияти илмий соҳа деб тан олингунга қадар ҳам ўрганиб келинган. Адабий тил меъёри, унинг шаклланиш, ривожланиш, стабиллашув қонуниятлари-нутқ маданияти соҳасининг текшириш объекти ҳисобланади.

Нутқ маданияти соҳасининг адабий тил меъёрига ёндашуви қўйидаги хусусиятлари билан грамматик муносабатда фарқ қиласди.

а) нутқ маданияти адабий тил меъёридаги ўзгариб, бузилиб турувчи нутқий нуқсонларни юзага келтирувчи хусусиятларни топиши ва уларни тузатишга интилиши лозим;

б) нутқ маданияти адабий тил меъёрини доимий ривожланиб, ўзгариб турувчи ҳодиса сифатида текшириши ва адабий тил меъёри системасидаги янги ҳолатларни, ўзгараётган, ўзгарган ҳолатларни, шунингдек, «ўлган», истеъмолдан чиқсан ҳолатларни ҳисобга олиши керак.

в) нутқ маданияти адабий тил меъёри системасидаги қарама - қарши ҳолатларни белгилаши ҳамда тилнинг барча яруслари бўйича текшириши лозим².

Нутқ маданияти адабий меъёрни маълум мақсад билан, аниги маданий нутқнинг чегараси ва воситаларини аниқлаш мақсадида ўрганади. Шу сабабли, нутқ маданияти соҳаси адабий тил ва унинг меъёрий системасини баҳолайди ва назорат қиласди. Нутқ маданияти соҳаси

¹ Р.Кўнгурев, Э.Бегматов, Ё.Тожиев Нутқ маданияти ва услубият асослари. -Т.: 1992. 38-бет
² Р.Кўнгурев, Э.Бегматов, Ё.Тожиев Нутқ маданияти ва услубият асослари. -Т.: 1992. 39-бет.

адабий тилга ёндашади, яъни адабий тил ривожига онгли аралашади.

Матъумки, тилнинг пайдо бўлиши ва ривожланиши жамият тараққиёти билан узвий боғлиқдир. У жамият тараққиёти, меҳнат фаолияти жараёнида юзага келадиган, фақат жамиятда, одамлар орасида мавжуд бўладиган ижтимоий ҳодисадир. Жамият ривожланган сари тил ҳам шаклланиб боради. Демакки, шу тилда сўзлашувчи миллатнинг маънавияти юксалиб, нутқий малакаси ортиб боради. Акс ҳолда тил таназзулга юз тутади. Бу эса нутқий малаканинг сўнишига, маънавиятнинг қашшоқланишига олиб келади.

Жамиятда яшаёттан ҳар бир шахс алоҳида нутқ эгаси саналади. Лекин уларнинг ҳаммаси учун умумий бўлган нутқий қурол шу жамиятнинг ягона тили ҳисобланади.

Инсон нутқ фаолиятида адабий тил маданияти қойдаларини мукаммал билгани ҳолда, айниқса, бадиий адабиётларни, газета ва журнallарни ўқиши, радио ва телевидениени кузатиб бориши орқали ҳамда тинимсиз мустақил шугулланиши натижасида нутқий малакага эга бўлади.

Адабий тил маданиятини чуқур эгаллаган инсонгина нутқ маданиятига эга бўлади. Адабий тил маданиятини эгаллашда тилга бўлган эътибор, унга чинакам муҳаббат ва ҳурмат муҳим роль ўйнайди. Адабий тил ва унинг меъёрларини шунчаки қизиқиш ёки у билан номигагина шугулланиш орқали эгаллаб бўлмайди.

Инсоннинг нутқ фаолияти уч кўринишда намоён бўлади.

Булар - сўзлаш, мутолаа қилиш ва эшитиш. Сўзлаш дейилганда, сўзловчининг маълумот, маслаҳат бериши, буюриши, ўзига номаълум бўлган нарсалар ҳақида сўраши тушунилади. Сўзлаганда сўзловчининг билими, маданияти, ахлоқи, одоби юзага чиқади. Сўзлашнинг монологик ва диалогик кўринишлари мавжуд.

Мутолаа қилиш ўқувчининг ёзма нутқ орқали асар муаллифи, образлари билан мулоқотидир. Мутолаа туфайли ёзма нутқда акс этган воқеа - ҳодисадан хабардор бўлади.

Ўрта мактабда таълим олаётган ёшларни, яъни, жамиятнинг янги ижтимоий кучларини етиширишда ўқитувчи масъул ҳисобланади. Жамият ўқитувчининг қўлига ёш авлодни, яъни ўз келажагини ишониб тошириди. Унинг камол топишида ўқитувчининг нутқи ўта муҳимдир. Демак, ўқитувчилик касби инсонпарварлик, ватанпарварлик, юксак маданият билан бирга юқори даражадаги нутқий малакага ҳам эга булишини талаб қиласди.

Такрорлаш учун саволлар:

1. Нутқ маданияти нима?
2. Тил маданияти билан нутқ маданияти қайси жиҳатларига кўра ўзаро фарқ қиласди?
3. Адабий меъёр нима? У нимага асосланади?
4. Нутқий малакага қандай эришиш мумкин?

Таянч тушунчалар

1. Морфема - (грекча) тилшуносликка оид термин бўлиб, сўзнинг маъно англатувчи, бошқа маъноли қисмларга бўлинмайдиган қисми (ёки бўлаги) (ўзак морфема, аффиксал морфема).
2. Жаргон - (французча) бирор ижтимоий гурухнинг ўзига хос ва ўзиганина тушунарли бўлган, бошқалар тушунмайдиган ясама тили.
3. Узус-бирор тил жамоасида тил системасида мавжуд бўлган имкониятларнинг фойдаланиб келинаётган қисми узус дейилади. Узус бир тилни бошқасидан ажратиб турадиган шартларни ҳам, тилнинг ички меъёрларини ҳам ўз ичитга олади.¹

¹ Т.Құдратов. Нутқ маданияти асослари. Т.: Ўқитувчи, 1993, 36-бет.

ЎЗБЕК АДАБИЙ ТИЛИ ВА НУТҚ МАДАНИЯТИ

Ҳозирги замон ўзбек тилининг фонетик, лексик, грамматик, орфоэпик ҳамда орфографик, имловий меъёрларининг нисбатан мукаммал шаклланганлиги ўзбек тили маданийатининг улкан ютуғидир.

Ҳеч шубҳасиз айтиш мумкинки, ўзбек тили энг бой, энг тараққий эттан тиллардан бири бўлиб, ўз шаклланиш, ривожланиш тарихига эга.

Ўзбек адабий тили олимлар, зиёлилар, адиларнинг оғзаки ва ёзма адабиётнинг асосий ижодкорлари бўлган ҳалқимизнинг асрлар оша машаққатли меҳнати, тилга сайқал бериши, уни чуқур ўрганиши борасидаги хизматлари эвазига туркӣ тиллар оиласида ўзига хос мавқега эга бўлди. Бу тилда жуда кўп ўлмас бадиий асарлар, илмий тадқиқотлар яратилди. Бу ҳам ўзбек тилининг маданий тиллар қаторидан ўрин олишини таъминлади.

Қадимдан маълумки, тил энг муҳим алоқа-аралашув, фикр алмашув қуролидир. Бу қурол қатор бошқа вазифаларни ҳам бажаради: у ёки бу ҳалқ тарихи ёки умуман воқелик ҳақида хабар беради, уларни авлоддан - авлодга етказади, кишилар онтига таъсир этади, эстетик завқ багишлади. Шунингдек, у билим бериш ёки билим олиш қуроли ҳамdir.

Ана шундай қатор вазифаларни бажарувчи ҳамда функционал имконияти янада ортиб бораётган бу қуролнинг - ўзбек адабий тилининг ишлатилиши, унинг қай даражада сайқал топганлиги, ўткирлиги, муайян вазифани бажаришга хосланганлиги, тузилиши, моҳияти билан шаклининг мутаносиблиги, гўзал ва ихчамлилиги кабилар унинг қудратли маданий қурол эканлигини кўрсатади. Қуролни яратиш ва унга сайқал бериш эса шу тилга мансуб бўлган ҳалқ вакилларининг, зиёлилар, адилар, шу қуролни ишлатишга эҳтиёжи бор бўлган барча кишилар ва, ниҳоят, шу иш билан маҳсус шугулланувчи мутахассисларнинг ишидир.

Дарҳақиқат, нутқ - бу тил деб аталмиш ноёб қуролдан фойдаланиш жараёни. Демак нутқий жараён - тилнинг ўз вазифасини бажариш жараёни. Бу жараён яхши ёки ёмон

кечиши мумкин. Нотиқ эса маълум маънода бу жараённи амалга оширувчиdir.

«Қобуснома» да Кайковус ҳамма ҳунарлар ичидаги сўз ҳунари – нотиқликни аъло деб билган: «Билгилким, ҳамма ҳунардан сўз ҳунари яхши¹.

Нутқ ҳоҳ оғзаки, ҳоҳ ёзма бўлсин, гўзал ёки қуруқ – қўпол бўлиши мумкин.

Ўткир тешани қўлига олган уста у билан ажойиб бир қутича ясами мумкин. Шу тешани қўлга олган чала бир ҳаваскор уста бир зумда қўлини чопиши ёки яхши нарсани ишдан чиқариши мумкин.

Адабиётшунос олим Иззат Султон «Адабий асарнинг мазмунни, ундаги гоянинг олийжаноблиги, тасвири қилинган одамлар ва ҳодисаларнинг гўзаллиги ёки хунуклиги – ҳаммаси ўқувчига асарнинг тили орқали етади. Шу сабабли тил соҳасидаги маҳорат ёзувчи қобилиятининг энг ёрқин аломатидир», – деганида, энг аввало, тил қуролидан фойдаланиш маҳорати ҳақида фикр юритган.

Демак, ҳамма учун баравар хизмат қиладиган тил – алоқа – аралашув қуроли воситасида гўзал, яхши, намунали нутқ тузиш ҳам, қўпол, ёқимсиз, ножуя, тутуруқсиз, қуруқ нутқ тузиш ҳам мумкин. Буларнинг биринчиси маданий нутқ, иккинчиси эса номаданий, «хунук» нутқdir.

Тилшунос С.И.Ожегов яхши нутқ ҳақида гапирад экан, «Юқори даражадаги нутқ, юқори нутқ маданияти – бу ўз фикрини тил воситалари орқали тўғри, аниқ ва таъсирчан қилиб ифодалай билиш қобилиятидир», – дейди.²

Бундай қобилиятта ўз она тилини чуқур севиш ва ҳурмат қилиш, уни мукаммал билиш орқали эришилади. Шунинг учун ҳам ҳар бир кишининг маданийлик даражаси, ўқиб қанчалик тарбия кўрганлиги унинг ёзма ва оғзаки нутқидан билинади, нутқ маданиятига эътибор ёлғиз нотиқдангина эмас, балки ҳар бир жамият аъзосидан талаб қилинади.

Тилда сўз миқдори қанча кўп бўлса, ўша тилни бой тил деб талқин қилиш кенг тарқалган. Бу фикр маълум маънодагина тўғридир. Чунки тилдаги сўз миқдори тил

¹ Кайковус. Қобуснома, 1986. 32-бет.

² Р.Қўнгиров, Э.Бегматов, Ё.Тожиев Нутқ маданияти ва услубият асослари. -Т.: 1992. 8-бет.

бойлигини таъминловчи асосий омиллардан бири бўлса ҳам, тил бойлиги шу билангина чекланмайди. Бу ўринда, албатта, ўзбек тилининг синонимларга, фразеологизмларга, парафразаларга ниҳоятда бой эканлиги, улар маъноларининг, шунингдек, умуман ўзбек тилидаги сўзларнинг кўп маънолилиги ниҳоятда юқори даражада эканлиги ҳам ҳисобга олинади.

Шундай бўлса-да, ана шулар билан бир қаторда, у ёки бу тилни бой тил деб белгилаганда, шу тилининг турли-туман ифода воситаларига эгалигини кўзда тутамиз. Ўзбек тилида сўздаги унли товушни чўзиш ёки ундош товушни иккилантириш (геминация) ҳодисаси ҳам ифода воситаси ҳисобланади: тўйга машҳур хонанда келган шекилли, одам!; Мазам йўқроқ, эртага ишга боролмайман; Мазза қилиб дам олинг, яхшилаб согайиб кетинг, кейин гаплашамиз. Бу мисоллардаги «одам» сўзи алоҳида ургу билан айтилади, шунингдек, сўздаги о товуши баъзан эса, кейинги бўғиндаги а товуши чўзиб талаффуз қилинади. Ана шу чўзиқлик, кучли оҳанг билан айтиш алоҳида маъно касб этади, яъни ушбу тарзда айтилганда, айни сўздан одамнинг кўплиги, тасирчанлик, ҳис-ҳаяжон кабилар ифодаланади. Кейинги гапдаги «мазза» сўзида «з» ундошининг иккилантирилиши ҳам маънони кучайтириш учун хизмат қилган.

Ўзбек тили ана шундай имкониятларга ниҳоятда бойдир. Ўзбек тилида такрорнинг икки тури мавжуд;

- а) грамматик такрор;
- б) бадиий такрор.

Такрорнинг биринчи тури грамматик такрорда маъно одатда кўплик маъносини ифодалаш учун хизмат қиласи: машина-машина қовун туширдик; қоп-қоп ун ёпишади; гапириб-гапириб ухлаб қолди; югуриб-югуриб чарчади; яхши-яхши гапиринг каби.

Такрорнинг иккинчиси турли хил маъноларни ифодалайди: Тонг яқин, оппоқ тонг яқин (Ғ.Гулом). Гапиринг, гапиринг, деяпман, гапирсангизчи!

Ўзбек тилида сўзлар таркибида турли хил товуш ўзгаришлари, масалан: қора-қаро, ора-аро, кўнгил-кангул...; ошино-ошно, ошиён-ошён, сен билан – сен ила – сенла,

устига – устина, богин – богини, кўксин – кўксини кабилар ҳам ўзига хос воситалардир.

Ҳозирги ўзбек тилида 30 га яқин кўмакчи феъллар мавжуд булиб, бу кўмакчи феъллар етакчи феъл билан равишдош кўрсаткичлари – б, (- иб) орқали боғланиб келади ва турли хил нозик маъноларни ифодалаш учун хизмат қиласи: кетди-кетиб қолди; ёзи – ёзив ташлади; ташлаб кетди – ташлаб кетиб қолди; қочди – қочиб қолди; урушди – уришиб берди; қўллади – қўллаб юборди; кулди – кулиб қўйди каби.

Ўзбек тилида булардан ташқари алоҳида бадиий тасвир кўринишлари, воситалари ҳам булиб, уларга метафора, метонимия, синекдоха, сифатлаш, ўхшатиш, кесатиш (ирония), истеҳзо (сарказм), муболага, кичрайтириш, жонлантириш; зидлаш (тазод), зинапоялаш, кетма – кет келтириш, риторик суроқ, боғловчисизлик ёки кўп боғловчилик; тушириб қолдириш (эллипсис), бадиий такрор, бадиий ўрин алмаштириш (инверсия) кабилар киради.¹

Такрорлаш учун саволлар:

1. Адабий тил деб нимага айтилади?
2. Адабий тилнинг сўзлашув нутқидан қандай фарқи бор?
3. Тилнинг бойлиги нимада намоён бўлади?
4. Тарихий сўзлар деб қандай сўзларга айтилади?

Таянч тушунчалар:

1. Синоним – маънодош сўзлар.
2. Фразеологизм – ибора.
3. Парафраза – тасвирий ифода
4. Эпитет – сифатлаш.

¹ Ё.Тожиев, Н.Ҳасанова, Ҳ.Тожматов, О.Йулдошева Ўзбек нутқи маданияти ва услубият асослари. Т. 1994, 14-бет.

НУТҚНИНГ КОММУНИКАТИВ СИФАТЛАРИ

Нутқ сўзловчи ёки ёзувчи томонидан шакллантирилган матнинг муайян кўриниши ифода бўлиб, у фақаттинга лисоний ҳодиса саналмасдан, балки ҳам руҳият, ҳам нафосат ҳодисаси ҳисобланади. Шунинг учун ҳам яхши нутқ дейилганди, айтилмоқчи бўлган мақсаднинг тингловчи ёки китобхонга тўлиқ ва аниқ етиб бориши, уларга маълум таъсир ўтказиши назарда тутилади. Шунга кўра нутқ олдига муайян талаблар қўйилади. Бу талаблар нутқнинг коммуникатив сифатлари бўлиб, унда нутқнинг мантиқан тўғри, фикран аниқ, тузилишга кўра чиройли ва йўналишига кўра мақсадга мувофиқ бўлиши назарда тутилади.

1. Нутқнинг тўғрилиги. «Тўғрилик деганди, -деб ёзди В.Г.Костомаров,-нутқ маданиятининг зарур ва биринчи шарти сифатида адабий тилнинг маълум пайтда қабул қилинган меъёрига қатъий ва аниқ мувофиқ келишини, унинг талаффуз, имловий ва грамматик меъёрларини эгаллашни тушуниш лозим бўлади».¹

Нутқнинг тўғрилиги унинг энг муҳим алоқавий фазилатидир. Чунки нутқ тўғри бўлмаса, унинг бошқа коммуникатив сифатлари, яъни мантиқийлиги, аниқлиги, мақсадга мувофиқлигига ҳам птур етади.

Нутқ тўғри бўлиши учун, асосан, икки меъёрга - ургу ва грамматик меъёрга қаттий амал қилиш талаб қилинади. Сўзлардаги ургунинг кучиши билан маънонинг ҳам узгариб кетиши мумкинлигини эсдан чиқармаслик лозим. Масалан: олма сўзи. Бу сўзни алоҳида ургусиз олиб қараганда, унинг қандай маънода қўлланилаёттанини аниқлаш қийин. Фақат ургу ундаги маънонинг аниқланишига кўмаклашади. Яъни олма тарзида ургу биринчи бўгинга тушганда, ҳаракат, олмá каби охирги бўгинга тушганда эса меванинг бир тури маъноси англашилади. Тилимизда бундай сўзлар анчагина. Масалан, ҳозир - ҳозир, янги-янги, йигитча-йигитчá, ўқувчимиз - ўқувчимиз сўзларининг маъноси ҳам ургу ёрдамида ойдинлашади.

¹ В.Г.Костомаров. Культура речи и стиль. – М. 1960, 24-бет.

Гап таркибидағи айрим олинган сўзга тушадиган ургу, яъни мантиқий (логик) ургунинг ҳам маънони фарқлашда хизмати катта. Ҳамма тилларда ҳам қайси маънога алоҳида эътибор бериләётган бўлса, шу маънони ифода этаётган сўз маҳсус ургу билан талаффуз қилинади. Масалан, Айвар ҳат ёзди, гапида ким ёзганлиги, нима ёзганлиги ёки нима иш қилганлиги айтилиб, мазкур гапдаги сўзларнинг учаласидан бирига ургу туша олади. Бундай ўринларда мантиқий ургу маънони таъкидлаш учун хизмат қиласди. Умуман нутқда, бўғин ургуси каби мантиқий ургуни ҳам тўгри ишлата билиш керак. Чунки айни жараёнда хатога йўл қўйилса, назарда тутилган маъно англашилмай қолиши мақсад амалга ошмаслиги мумкин. Демак, фикрни нутқ (гап) орқали тўгри ифодалашда сўз ургуси ҳамда мантиқий ургунинг тўгри ишлатилишига жиҳдий амал қилишимиз шарт.

Грамматик меъёрга риоя қилиш деганда, гап тузиш қоидаларидан тўгри фойдаланиш, ўзак ва қўшимчаларни қўшишда хатога йўл қўймаслик, келишик қўшимчаларини ўз ўрнида қўллаш, эга ва кесимнинг мослиги, иккинчи даражали бўлакларнинг уларга bogланиш қонуниятлари тушунилади.

Хуллас, она тили хазинасидан керакли грамматик шаклларни танлаш ва уларни ўз ўрнига қўйиш, яъни нутқнинг тўгри тузилишига эришиш нутқ маданиятининг асосий талабларидан биридир.

2. Нутқнинг аниқлиги. Нутқнинг аниқлиги сўзнинг ўзи ифодаләётган воқеликка мутлақо мос ва мувофиқ келишидир. Аниқлик нутқнинг муҳим хусусиятларидан бири эканлиги қадимдан маълум. Гарб мутафаккирлари ҳам, Шарқ олимлари ҳам аниқликни нутқ сифатларининг биринчи шарти деб ҳисоблагандар. Аристотель: «Агар нутқ ноаниқ бўлса, у мақсадга эришмайди»,— деган. Кайковус эса: «Эй фарзанд, сўзнинг юзин ва орқасин билғил ва уларга риоя қилғил, ҳар на сўз десанг юзи била дегил, то сухангўй бўлғайсан. Агар сўз айтиб, сўзнинг нечук эканин билмасанг қушга ухшарсанки, унга тўти дерлар, ул доим сўзлар, аммо сўзнинг маъносин билмас».¹ Яна давом

¹ Кайковус. Қобуснома, 1986, 43-бет.

эттиради: «Шундай кишини нотиқ (сухангўй) деймизки, унинг ҳар сўзи халқа тушунарли бўлсин ва халқнинг ҳар сўзи унга ҳам маълум бўлсин».

Аниқлик нутқнинг муҳим хусусияти, фазилати сифатида фикрин ёрқин ифодалаш билан, нутқ предметининг маъноси билан, нутқда ишлатилаёттан сўз маъноларини билиш билан боғлиқ бўлади. Агар нотиқ ўзи фикр юритмоқчи бўлган нутқ предметини яхши билса, унга мос сўзларни танласа ва ўзи танлаган сўзларнинг маъноларига мос вазифалар юкласа, нутқнинг аниқ булиши тайин. Демак, аниқлик нутқда сўз қўллаш меъёрларига амал қилишдан иборат. Бу жиҳатдан аниқлик тўгриликнинг бошқача, ўзига хос кўриниши ҳисобланади. Баъзан нотиқ ўзи ишлатадиган сўзнинг маъносини билишга унча эътибор бермайди. Натижада сўзнинг маъноси нутқдан кўзда тутилган мақсадга мос келмайди. Кўпинча, бунга бир-бирига яқин нарсаларни англатувчи сўзлар сабаб бўлади. Масалан: Абдулла Қаҳҳор ёзувчи Маъруф Ҳакимнинг «Қаҳрамоннинг ўлими» ҳикоясини таҳлил қилиб, «Ботир белига қатор бешта бомба қистириб...», «Қўлига бомба ушлаган ҳолда кўчага югурди» жумлаларидағи бомба сўзининг нотўри қўлланилаётганлигини, ёзувчининг бомба ва гранатани фарқламаслигини танқид қиласди.¹ Аниқлик икки хил бўлади: нарсанинг аниқлиги ва тушунчанинг аниқлиги. Нарса аниқлиги нутқда акс этган мавжудликнинг нарсалар, ҳодисалар доираси билан нутқ мазмунининг муносабатида кўринади. Нутқда мавжудликнинг нарса ва ҳодисалари тўгри акс этиши учун нотиқ ўзи сўзлаётган нарсаларни яхши билган булиши лозим. Нутқ предметини билмаслик ёки чала билиш, шунингдек, уларни ўрганишда лоқайдлик қилиш натижасида юзага келган ноаниқлик ёқимсиз бўлиб, тингловчини ранжитади. Масалан: «На ташкилотчилик, на раҳбарлик, на билимдонлик қобилияти бўлмаган киши бирданига кимнинг назарига тушди?» (Газетадан)².

Кўринадики, сўзловчи на юкламасининг нутқдаги маъноси - ма бўлишсизлик қўшшимчаси англаттан маънога

¹ Т.Кудратов. Нутқ маданияти асослари. Т.: Ўқитувчи, 1993. 55-бет.

² Т.Кудратов. Нутқ маданияти асослари. Т.: Ўқитувчи, 1993. 56-57 – бет.

тeng эканлигини унуттан. Одатда на инкор юкламаси иштирок эттан гапларнинг кесими бўлиши шаклда бўлади.

Нутқнинг ҳар томонлама тўгри булиши учун нарса аниқлигининг ўзи етарли эмас. Тушунчавий аниқлик нутқ мазмунининг унда белгиланган тушунчалар тизимига мос келишини талаб қиласди.

Шундай қилиб, аниқлик нутқнинг алоқавий сифатларидан бири бўлиб, у объектив борлиқ билан нутқ мазмунининг мослиги сифатида юзага чиқади.

Аниқ нутқ яратиш сўзловчидан қуйидагиларни талаб этади:

а) тилнинг синонимик имкониятларини билиш ва синонимик қаторлардан кераклигини ажратиб, нутқда қўллаш;

б) нутқда ишлатиладиган сўзнинг англатган маъноларини ҳар томонлама билиш;

в) сўзнинг кўп маънолигига жиiddий эътибор бериш, кўп маъноли сўз нутқда қўлланганда унинг қайси маъно қирраси кўзда тутилаётганини аниқ тасаввур қилиш; фикрнинг юзага чиқишида бу сўзнинг бошқа маъно қирралари монелик қилиш-қилмаслигини кўз олдига келтириш;

г) омонимларнинг хусусиятларини билиш, чунки уларни билмаслик аниқликнинг бузилишига олиб келади;

д) паронимларни билиш, улардаги товуш яқинликларига эътибор бериш;

е) тор муҳитда ишлатиладиган, четдан кирган, касб – ҳунарга оид, архаик, эскирган, диалектизм сўзларнинг маъноларини яхши анлаган ҳолда нутққа киритиши.¹

3. Нутқнинг тозалиги. Нутқнинг тозалиги деганда, энг аввало, унинг адабий тил меъёрига мувофиқ келиш – келмаслиги тушунилади.

Нутқимизнинг софлигига, асосан, қуйидагилар таъсир қиласди:

1. Маҳаллий диалект ва шеваларга хос сўз, ибора, шунингдек, грамматик шакллар, сўз ва сўз бирикмаларининг талаффузи, ургуси.

2. Ўринсиз қўлланган чет сўз ва сўз бирикмалари.

¹ Т.Кудратов. Нутқ маданияти асослари. Т.: Ўқитувчи, 1993. 58-бет.

3. Жаргонлар.
4. Вульгариzmлар.
5. Нутқда ортиқча тақрорланадиган «паразит» сўзлар.
6. Канцеляриzmлар.

Санаб ўтилганлардан ўринсиз фойдаланиш кундалик нутқни ҳам, бадиий нутқни ҳам хиралаштиради. Ҳар бир сўзловчи ўз нутқининг адабий меъёrlар даражасида бўлиши учун ҳаракат қилиши лозим.¹ Ўз шевасига хос бўлган тил воситаларини нутққа ўринсиз олиб кириш нутқни бузади. Аммо диалектизм ва варваризмлар бадиий асар тилида маълум бадиий – эстетик вазифани бажариши, муаллифнинг маълум гоясини, ниятини амалга оширишга хизмат қилиши ҳам мумкин. Муаллифнинг миллий колоритни бериш учун, асар қаҳрамонининг қаерлик эканлигига ишора қилиш учун диалектизм ва варваризмлардан фойдаланиши мумкин. Масалан: «Ёшулли, сиз буни эмас, мени тингланг! Бу манглайи қоранинг шериги бор» (Т.Малик). Ушбу мисолда диалектизмлар территориал колоритни беришга хизмат қилаётган бўлса, қуйидаги мисолда варваризмлар – чет сўзлар характер яратища ёзувчига кўмаклашган. «Ишондим, ўртоқ гинрол. Ҳаммаси ест бўлади. Уйда ҳаладийнада муздаги бор, олиб чиқайми? Сизга текин» (Т.Малик).

Лаҗжавий сўзларнинг бадиий адабиётда ўрни билан ишлатилиши фақаттина мақсадга мувофиқ бўлиб қолмасдан, адабий тилимизнинг бойиб боришига, умумхалқ тилидаги айрим элементларнинг сақданиб қолишига хизмат қилиши ҳам мумкин. Масалан: нутқ ниҳол ўтказиш ҳақида бўлганида адабий тилда варианти йўқ бўлган «ханча» сўзи ишлатилса ва ўз ўрнида унга изоҳ берилса, ўринли бўларди. Чунки бу сўз ниҳол ўтказиш учун кавланган чуқурчанинг номи бўлиб, бошқа чуқурчаларга нисбатан ишлатилмайди.

Нутқда ўринсиз ишлатилган бошқа тилларга оид сўзлар варваризмлар деб аталади.

Айрим кишиларнинг ўз нутқини назорат қилмаслиги, «ёқимли» сўз қидиришда эрингочоқлик қилиши, русча атамаларнинг ўзбекча шаклларини билмаслиги, баъзи

¹ Т.Кудратов. Нутқ маданияти асослари. Т.: Ўқитувчи, 1993. 50-бет.

ҳолларда ўзининг русчани ҳам билишлигини намойиш этишга интилиши натижасида варваризмлар нутқа кириб келади: Эрталаб звонить қилдим, библиатекага бордим, астановкада турдим каби. Нутқимизда мана шундай сўзларнинг учраб туриши жуда ачинарлиди. Улардан қутулишнинг бирдан-бир йўли она тилини ҳар томонлама чуқур ўрганиш, унга ҳурмат билан қараш, сўз қўллашга алоҳида эътибор бериш, бадиий асарларни кўп ўқиши, ўқиганда нотаниш сўзлар маъносига диккат қилиш кабилар. Айрим касб эгаларининг, айрим гуруҳларнинг ўз «тили» бўлиб, улар бу «тил» орқали сўзлашда бошқалардан ажралишга, ифодаланаётган фикрларини кишилардан бекитишга интиладилар. Бундай сўзлар жаргон сўзлар деб аталади. Масалан, новча (ароқ), қизил (вино) - ичувчилар нутқига хос.

Вулъгаризмларга ахлоқ меъёрларига тўғри келмайдиган: кишини сўкишда, ҳақоратлашда ишлатиладиган сўзлар киради. Уларни ишлатиш сўзловчининг паст маданиятли, қўпол, жоҳил киши эканлигини кўрсатади. Бадиий адабиётда ҳам улардан фойдаланилади:

- Ухлаб ўтирибсанми, хунаса?! Минг марта чақиришим керакми?! (Т.Малик).

Паразит сўзлар деб аталувчи лугавий бирликлар ҳам тил маданияти учун ётдир. Улар, асосан, сўзлашув нутқида кўп ишлатилиб, нотиқнинг ўз нутқини кузатиб бормаслиги, эътиборсизлиги натижасида пайдо бўлади ва бора-бора одатта айланиб қолади. А.Қодирий «Меҳробдан чаён» романида бухоролик Шарифбой нутқида «паъланат» («падар лаънат»)ни паразит сўз сифатида ишлатиб, унинг нутқини индивидуаллаштирган. Шарифбой ҳар гапида бу сўзни қўшиб гапиради:

«Шарифбой ёстиқдан бурилиб, ёнидаги учинчи йигитта қаради:

- Паъланат, қачон келган экан?»

«Канцеляризм»лар иш қоғозлари учун зарур бўлган, маълум бир шаклда сақланадиган сўз бирикмалари, гаплардир. Улар ўз ўрнида жуда зарур. Чунки иш қоғозлари қатъий бўлган маълум шаклларни талаб қиласиди. Бундай «қатъий шакллар», шаблонлар сўзлашув нутқига,

бадиий адабиётта, публицистикага ўтса, нутқни бузиши мумкин. Ўринсиз канцеляризмлар мажлисларда, кенгашларда, газеталарда, радио ва телевидениедаги нутқларда кўплаб учрайди.

«Бундан 365 кун муқаддам сиз билан биз ўз ҳаётимиизда қатъий бурилиш ясаб, зўр синовлар шароитига бевосита қадам қўйдик...» (А.Қаҳҳор). Гапдаги «365 кун муқаддам», «қатъий бурилиш ясаб», «зўр синовлар шароитига бевосита қадам қўйдик» каби нутқ бирликларини кўллаш билан ёзувчи айрим «нотиклар» устидан кулади.

4. Нутқнинг мантиқийлиги. Нутқнинг мантиқийлиги унинг асосий сифатлари бўлган тўғрилик ва аниқлик билан чамбарчас боғлангандир. Чунки грамматик жиҳатдан тўғри тузилмаган нутқ ҳам, фикрни ифодалаш учун муваффақиятсиз танланган лугавий бирлик ҳам мантиқнинг бузилишига олиб келиши табийдир. Мантиқий изчилликнинг бузилиши тингловчи ва ўкувчига ифодаланаётган фикрнинг тўлиқ етиб бормаслигига, баъзан умуман англашилмаслигига олиб келади. Нутқни тузишдаги эътиборсизлик натижасида баъзан мантиқсизлик юз беради. Қуйидаги мисолга эътибор қилинг «Ферма жонкуярлари олти ойлик давлатта сут сотиш планларини муддатдан оддин бажарадилар» (Газетадан). Гапда сўзларнинг тартиби тўғри бўлмаганилиги, «олти ойлик» бирикмасининг «сотиш» сўзидан кейин келмаганилиги туфайли мантиққа путур етапти, ҳатто хато фикр ифодаланаяпти.¹

Нутқда мантиқийликка эришиш учун қўлланган сўзлар билан уларнинг предметлик маънолари мос бўлиши лозим. Бошқача айттанды, ҳар бир сўз нутқда қўлланганда, ўзига хос маънонигина ифодалаши зарур.

Мантиқийликни предмет мантиқийлиги ва тушунча мантиқийлиги деб иккига ажратиш мумкин. Предмет мантиқийлиги нутқдаги тил бирликларининг ўзаро ички муносабатларининг мослигидан иборат. Тушунча мантиқийлиги мантиқий фикр тузилишидан ҳамда бу тузилишнинг нутқдаги тил белгиларининг маъновий алоқаларидан

¹ Т.Кудратов. Нутқ маданияти асослари. Т.: Ўқитувчи, 1993. 56-бет.

иборат. Тушунча мантиқийлиги алоҳида олинган матида фикрий кетма-кетлик, мантиқий изчиллик бўлишини тақозо қиласди. Аммо, бу талабни нутқнинг ҳамма кўришиларига нисбатан қўллаб бўлмайди. Масалан: илмий ва бадиий нутқ услубларида бу талабга қандай амал қилишини куриб чиқайлик. Илмий услубда ёзилган асарлар яхлит бир тузилишга эга. Унда кириш, асосий қисм ва холоса мавжуд бўлиб, улар ягона бир ҳалқага бирлашади. Матида берилган фикрлар қатъий изчилликда баён қилинади.

Бадиий нутқ тузилиши эса бир оз бошқача. Айтайлик, фикрлар бир маромда баён этиб келинадио, бирданига узилиш юз беради, яъни бошқа воқеалар ҳикоя қилинади.. Бу нарса гўё мантиқий изчилликка путур етказгандай кўринса-да, аслида ундан эмас. Бадиий асарларда, хусусан, қисса, роман каби жанрлардаги кенг қамровлик тасвир қурилишини ана шундай тузишни тақозо қиласди. Мантиққа пугур етмаганлиги бундай асарларнинг охирида маълум бўлади.

Холоса шуки, нутқнинг мантиқийлиги деганда, яхлит бир система асосида тузилган, фикрлар ривожи изчилиб бўлган, ҳар бир сўз, ибора аниқ мақсадга мос ҳолда ишлатиладиган нутқни тушунамиз.

5. Нутқнинг таъсирчанлиги.

Сўз кучидан йиқилур минбар ҳам, дор ҳам,
Сўз бирла чиқар индан илон – мурдор ҳам.
(Абу Шукур Балхий)

Нутқнинг таъсирчанлиги деганда, асосан, оғзаки нутқ жараёни назарда тутилади. Шунга кўра нутқнинг тингловчи томонидан қабул қилинишидаги руҳий вазият ҳам эътиборга олинади. Яъни, бунда нотиқ тингловчиларни уларнинг билим даражасидан тортиб, ҳатто ёшигача, нутқининг қандай қабул қилинаёттанигача назорат қилиши зарурдир. Профессионал билимга эга бўлган кишилар олдида жўн, содда тилда гапириш мақсадга мувофиқ бўлмагани каби, оддий, етарли даражада маълумотта эга бўлмаган тингловчилар олдида ҳам илмий ва расмий тилда гапиришга ҳаракат қилиш мақсадга мувофиқ эмас. Хуллас, нотиқдан вазиятта қараб иш тутиш талаб қилинади

ва ифодаламоқчи бўлган фикрни тўлалигича тингловчиларга тўлиқ етказишига ҳаракат қилиш вазифа қилиб белгиланади. Хўш, таъсирчан нутқ деганда қандай нутқни тушунмоқ керак? Б.Н.Головин айтганидек, таъсирчан нутқ тингловчи ва ўқувчининг эътиборини ва қизиқишини ҳисобга оладиган нутқdir.

Омма тушуна оладиган тилда гапириш, уларни ифодаланаётган фикрга ишонтира олиш нотиқлар олдига қўйиладиган асосий шартлардан ҳисобланади. Бунинг учун эса, юқорида айтилганидек, мавзуни яхши билишдан ташқари, уни баён этишнинг аниқ белгиланган режаси булиши керак. Нутқдаги фикрларни биринчи ва иккинчи даражали тарзда тузиб, уларни ўзаро боғлаб тингловчиларни нутқ режаси билан таништириш лозим. Вақтни ҳисобга олиш нотиқлик фазилатларидандир. Чунки сўзлаш муддати олдин эълон қилиниб, шунга риоя қилинса, иложи бўлса, нутқ сал олдинроқ тугатилса, айни муддао бўлади.

Сўзловчининг ўз нутқига муносабати ҳам мухимdir. Чунки шундай бўлгандагина қуруқ расмиятчиликдан воз кечилади. Сўзловчи ва тингловчи ўртасидаги алоқа мустаҳкамланади. Нотиқ фикрларини ўзи ёки тингловчилар ҳаётидан олинган мисоллар асосида исботлашга ҳаракат қилса, мавзуга доир субъектив фикр мулоҳазаларини билдиrsa, нутқ яна ҳам ишонарли ва таъсирли бўлади.

Нутқнинг таъсирчанлигига эришища тилнинг тасвирий воситалари ҳисобланган метафора, метонимия, синекдоха, ўхшатиш, эпитет, такрор ва адабий кўчим-ларнинг ҳам роли каттадир. Булардан ташқари нутқда таъсирчанликни таъминлаш учун мақол, матал, ҳикматли сўз ва иборалардан, айниқса, фразеологизмлардан унумли фойдаланиш зарур. Ёзувчи А.Қаҳҳор ўз ҳикояларида эпиграф сифатида берилган мақоллар орқали ўқувчилар диққатини дарҳол эгаллайди. «Осмон йироқ - ер қаттиқ» («Бемор»), «Отнинг улими – итнинг байрами» («Ўгри») ва б.

6. Нутқнинг мақсадга мувофиқлиги. Нутқнинг мақсадга мувофиқлиги жуда мухимdir. Нутқ маданияти адабий тил меъёрларини пухта эгаллаш ва улардан нутқда тўлиқ фойдаланиш демақдир.

Нутқ маданияти юксак бўлган киши, биринчидан, ўз нутқини тўгри, адабий тил меъёrlарига мувофиқ тузади. Иккинчидан, тил воситаларидан энг мувофиқ, энг зарурларини танлаб олиб, нутқнинг жозибали бўлишини таъминлади. Шунингдек, нутқнинг ихчамлиги, мазмундорлиги ҳам катта аҳамиятга эгадир.

Абулла Қаҳҳор таъкидлаганидек, «Китобхонга бир фикрни ёки бир нарсани тасаввур қилдириш учун кишини бошини қотирмайдиган, очик, равон ва содда тил керак», «Сурат олдираётган киши суратта чиройли ва келишиб тушмоққа бехуда зўр бериб, ўзининг табиий ҳолатини бузгаңдай, ёзувчи чиройли ва қойил қилиб ёзишга зўр берса, адабий асар учун зарур бўлган тилдаги соддалик, табиийлик бузилади».

Нутқ тўгри, аммо, айни вақтда тушунилиши қийин бўлиши мумкин. Нутқ тўгри, бироқ нутқ сўзланаёттан шароитга мос бўлмаслиги мумкин. Шунинг учун ҳам атоқли ўзбек шоир ва ёзувчилари ўз асарларини қайта-қайта ишлаганлар. Бу борада А. Қодирий, Ойбек, А. Қаҳҳор, С. Аҳмад, А. Ориповларни кўрсатиб ўтиш жоиздир. Ёзувчи С. Аҳмаднинг айтишича, А. Қаҳҳор баъзи ҳикоялари матнини 27 марта гача қайта ишлаган¹.

Ўзбекистон халқ ёзувчиси Мирмуҳсин шундай ёзади: «Адид ўзини таҳрир қилиши, асарларида ҳайкалтарошдек гадир-будур мармарни ишлаб, жонли инсон яратиши керак. Ф.Достоевскийнинг «Ака-ука Карамазовлар» романни қулёзмасини кўриб, оғзим очилиб қолди. Шу даражада кўп таҳрир қилинганки, кўчирувчи машиначиларга жуда қийин бўлган бўлса керак. Абдулла Қодирий, Ойбек қўлда ёзган, бир сидра осон ёзилган яхши асар йўқ, ҳар қандай зако ва етуклик ҳам таҳриру тер тўкишни тақозо этади»².

Куринадики, ёзувчилар сўз ва сўз бирикмаларининг бирини бошқаси билан алмаштирганда, меъёрга мослигини эмас, мақсадга қай даражада мувофиқ келишини кўзда тутадилар.

¹ Т.Кудратов. Ўша асар, 1993. 75-бет.

² Т.Кудратов. Ўша асар, 1993. 58-бет.

Нутқ ғаолиятида муаллиф ўз олдига қўйган мақсадни энг аниқ, энг түгри, энг яхши, энг таъсири, энг тушунарли қилиб ифодалайдиган сўзларни, сўз бирикмаларни, гапларни, топишга, танлашга интилади. Бу воситаларни яхлит қилиб, «мақсадга мувофиқлик» деб белгилаш мумкин. Сузловчининг у ёки бу сўзнинг, у ёки бу синтактик қурилма матнининг мақсадга мувофиқ тузилганини сезиши, шунга мувофиқ иш олиб бориши лозим. Меъёр ва мақсадга мувофиқликнинг биргаликдаги ҳаракати нутқ маданиятини мукаммаллаштиришdir.

Такрорлаш учун саволлар

1. Нутқнинг коммуникатив сифатлари нима?
2. Нутқнинг тўгрилиги нутқ маданияти учун қандай аҳамиятга эга?
3. Қандай нутқни биз аниқ нутқ деймиз ва унга қандай эришилади?
4. Нутқнинг мантиқийлиги нима ва у нимага асосланади?
5. Таъсирчанлик нима?
6. Таъсирчанликнинг қандай омилларини биласиз?
7. Нутқнинг мақсадга мувофиқлиги нима?

Таянч тушунчалар

Жаргон – (французча *jargon*). Бирор гурӯҳ вакилларининг, ўз нутқи билан кўпчилиқдан ажralиб туриш мақсадида, ўзича мазмун бериб, ишлатадиган сўз ва иборалари.

Вульгаризмлар – (лот. *Vulgaris*-оддий, содда) – дагал сўз, дагал ибора.

Коммуникация – (лот. *communicatio* – хабар, алоқа). Бирор мазмуннинг тил воситалари орқали берилиши, хабар қилиниши.

ТИЛ ВА НУТҚ. НУТҚ ОДОБИ. ТИЛ ВА МАДАНИЯТ

Тил – алоқа қуроли, тил – ҳаёт күзгуси, тил – маънавият белгиси. Инсонни ҳайвонот оламидан ажратиб, уни коинот сарварига ва гултожига айлантирган омил ҳам тилдир. Инсон ақлий фаолиятининг энг олий маҳсуллари, тафаккур «мевалари» тил ва нутқ орқали юзага чиқади.

Қадимги исломий манбаларда айтилишича, бани башарнинг яратувчиси Тангри таолонинг бир оғиз «бўл» деган сўзи билан олам яралган экан. Шунинг учун сўзга эътиқод, сўзга берилган таърифу тавсифлар, сўзнинг тарихий хизматига айтилган шарафлар чексиздир. Улуг Алишер Навоий сўзга шундай баҳо беради:

Сўздурки, нишон берур үлика жондин,
Сўздурки, берур жонга хабар жонондин.
Инсонни сўз айлади жудо ҳайвондин.
Билким, гужари шарифроқ йўқ ондин.

Сўзнинг тарихий – маданий, маънавий хизмати чексиз, албатта. Лекин тилнинг имкониятлари нутқ орқали, нутқ жараёнида очилади. Нутқ бўлмас экан, тилнинг чексиз имкониятлари юзага чиқмай қолаверади.

«Қобуснома»да Кайковус «Билгилким, ҳамма ҳунардан сўз ҳунари яхши», дейди. Бу сўзларда шундай ҳикмат борки, сўзга чечан, сўзамол, нотиқ киши ҳамма жойда обру – эътибор, ҳурмат топади. Бунга Алишер Навоий ҳаёти ва фаолиятидан кўплаб мисоллар келтириш мумкин. Зоро нутқ ва тафаккур салоҳияти уни вазири аъзам даражасига кўтарган эди.

Гарб донишманларидан Р.Эмирсоннинг таъкидлашича, «Нутқ – қудратли куч: у ишонтиради, ундейди, мажбур этади». Бу гапда нутқнинг шундай фазилати таъкидланаятпеки, у, биринчи навбатда, ишонтириш санъатидир. Ўқувчилар билан мулоқотда булаётган ўқитувчи ишонарли гапириши, нутқи далилланган, пухта асосланган бўлиши лозим. Ўқувчиларнинг ишончини, меҳрини қозонган ўқитувчинигина ҳақиқий устоз дейиш мумкин.

Қадимги нотиқлик санъати ҳарбий саркардалик санъати билан тенглаштирилган. Бу бежиз эмас. Чунки лашкар билан забт этиб бўлмайдиган давлатлар ва сарҳадларни сўз санъати билан бўйсундириш мумкин.

Алишер Навоий:

Олибмен тахти фармонимга осон
Черик чекмай Хитойдин то Хурросон,-

дейди. Черик-бу лашкар. Шоир лашкар тортмасдан Хитойдан Хурросонгача бўлган сарҳадни забт эттанилиги ҳақида фахрланиб сўзламоқда. Маълумки, Алишер Навоийнинг таъсир доираси ва даражаси ҳар қандай ҳарбий саркардадан ҳам устун бўлган. Султон Ҳусайн Бойқаронинг ўзи улут шоирни маҳсус рисоласида таърифлаб «Сўз соҳибқирони» деб атаган эди.

1. Сўзнинг сеҳрига, қудратига, саркарда бажара олмайдиган вазифани сўз соҳибқирони уddaлаганлигига яна бир ҳикоятни мисол қилиб келтириши мумкин. Ҳикоят мазмунига кўра Ҳусайн Бойқаро узоқда шикор билан машгул экан. Саройда малика оғир, бетоб ёттан экан. Кунлардан бир куни малика ҳаётдан кўз юмибди. Аммо подшоҳга ўлим хабарини етказишга ҳеч ким журъат этмабди. Шунда сарой аъёнлари сўз саркардаси Навоийга мурожаат қилишибди. «Шоҳга шум хабарни етказган киши, шубҳасиз, жазога маҳкум бўлади. Мушкулни фақат сизнинг тадбиркорлигинги, сухандонлигинги осон қилиши мумкин», — дейишибди. Шунда Навоий бир сатр шеър ёзид берибди. Уни чопар орқали Ҳусайн Бойқарога етказишибди. Подшоҳ ўқибди:

Сарвигулнинг соясида сўлди гул, нетмоқ керак?

Ҳусайн Бойқаро дарҳол мисранинг мазмунини тушунибди. Ҳеч бир талвасага тушмасдан, вазминлик билан шеърий саволга шеърий жавоб ёзибди:

Сарвидин тобут ясад, гулдин кафан этмоқ керак!

Сарой аҳли чопар келтирган хатни ўқиб, сўзниңг қудратига қойил қолишибди, дафн маросимига киришишибди.¹

Тил ва нутқ ўзаро боғлиқ ҳодисалар бўлиб, тил нутқ учун ашёдир, имкониятдир, нутқ эса воқеликдир, яъни нутқ тил материали асосида ташкил топади. Тил жамият аъзолари учун умумий бўлиб, руҳий ва моддий материалдан иборатдир.

Сўз, морфема, фонемаларнинг киши хотирасидаги образлари руҳий «материал» ҳисобланади. Нутқ яратиш жараёнида маълум товуш тизимда намоён бўладиган сўз ва морфемалар моддий материалдир. Тилнинг руҳий ҳодисалиги унинг хотираада сақланиши билан боғлиқдир.. Тилнинг моддийлигини нутқ жараёнида юзага келувчи товушлар белгилайди.

Биз хотирамизда сақданадиган қоидалардан тезкорлик билан фойдаланиб, бирор фикрни юзага чиқариш учун сўзлар грамматик маъно ташувчи морфемалар ва сўз шакллари, асосан, гапларни ҳосил қиласиз. Масалан, бизда китобнинг қаердан олингандигини билиш ҳақидаги фикр туғилди, дейлик. Уни қўйидаги савол шаклида юзага чиқарамиз: Сен китобни қаердан олдинг?

Бунда биз *сен*, *китоб*, *қаер*, ол лексемаларидан; *-дан*, *-динг* морфемаларидан ва сўроқ гап моделидан - қоидасидан фойдаландик. Мазкур гапни айтиш жараёнида хотирамиздаги лексемалар алоҳида аффикс морфемаларни олиб, сўз шаклларига айланди ва юқоридаги тартибни эгаллади. Тил руҳий ҳодисадан моддий ҳодисага айланди.

Нутқ тилдаги ифода воситаларидан фойдаланган ҳолда воқеликка айланган фикрдир. Нутқ нутқ аъзоларининг ҳаракатига кўра юзага келиб, икки хил бўлади: ички нутқ ва ташқи нутқ. Кишиларнинг товушларни - сўзларни талаффуз қилмасдан фикрлаши, мулоҳаза юритиши, ўйлаши ички нутқдир.. . Ўпкадан чиқсан ҳавонинг нутқ аъзоларига таъсири, шу таъсир натижасида уларнинг ҳаракати билан аниқ товушлар сифатида юзага келадиган нутқ ташқи нутқдир.

¹ Нусратулло Атоулло ўғли Жумахўжа «Истиклол ва она тилимиз». Т.: 1998, 47-6.

Нутқ ҳаракатдаги тилдир. Нутқ тил бирликларини ўзаро мантиқий боғлаб, уларни ҳаракатта келтиради. Нутқ сўз, сўз бирикмалари ва гаплардан иборат бўлади.

Нутқ, нутқ одоби инсоннинг маъниавиятини-маърифатини белгиловчи асосий мезондир. Демак, кишининг одоби, энг аввало, унинг нутқида кўринади. Нутқ одоби нима?

Нутқ одоби деганда, айтилиши зарур бўлган хабарларни, тингловчини ҳурмат қилган ҳолда, унинг кўнглига мос ҳолда адабий меъёрдаги ифодалар билан етказишидир. Хунук хабарни ҳам тингловчига беозор етказиш мумкин. Бунинг учун сўзловчи тилни, мукаммал билиши керак. Мулоим, ёқимли, одобли сўзлаш ҳам ўз-ўзидан пайдо бўлмайди. Унга ёшлиқдан ибратли кишиларга тақлид қилиш, улардан ўрганиш орқали эришилади. Уқувчи учун эса энг яхши намуна ўқитувчидир. Буни ўқитувчи ҳар доим ҳис қилиб туриши керак.

Нутқ одоби саломлашишдан бошланади. Саломлашишдаги хушмуомалалик ундан кейинги яхши суҳбатта дебоча бўлади, тингловчидан яхши кайфият пайдо қиласди. Саломлашишнинг аҳамияти ҳақида ҳинчларда шундай нақл бор: «Битта салом билан бешта нарсага – ўзини енгил сезиш, шон-шуҳрат топиш, қут-баракали, илмли бўлиш ва ниҳоят узоқ умр кўришга эришилади».

Ҳа, саломда гап кўп, саломлашиш, салом беришнинг ҳам ўзига яраша қонун-қоидалари бор. Афсуски, ўзимизнинг шарқона саломлашиш одобимиизга етарли даражада эътибор бермаяпмиз.

Аввало, ҳар бир муслим ва муслима саломлашиш ҳам фарз, ҳам қарз эканлигини яхши англаб етмоғи лозим. Чунки «Суз боши – салом», деганларидек, суҳбатдошлар мулоқоти «ассалому алайкум», «ваалайкум ассалом» жумлалари билан бошланади. Бу суҳбатдошларнинг таниш ёки нотанишлигидан қатъи назар ўзаро ҳурмат ва эҳтиром белгиси ҳисобланади. Аммо кейинги пайтларда бирор жойга кириб бораётган, телефонда суҳбат бошлаётган кишиларнинг саломлашишни унутиб бораёттанлигига тез-тез гувоҳ бўлиб қолмоқдамиз.¹

¹ Сиддиқ Мўмин. Сўзлашиш санъати, Фаргона 1997, 27 – бет.

Халқ тилида саломлашиш учун ҳам, хайрлашиш учун ҳам алоҳида нутқий воситалар мавжуд. Ўқитувчи уларни ўз ўрнида ишлатишда ҳамма учун ва ўз шогирдлари учун ўрнақдир.

Маданиятли киши ўз айбини бўйнига ола билиши, айби учун кечирим сўрашни ҳам билиши лозим. Ўз айби учун узр сўраш ўз гурурини ерга уриш эмас, балки одобилик, хушмуомалалик аломатидир.

Етук кишига хос фазилатлардан яна бири хайрлашув одобидир. Тилимизда хайрлашганда ишлатиладиган «хайр соғ бўлинг», «хайр, кўришгунча», «хайр, омонлиқда кўришайлик» каби таъсирчан иборалар мавжуд. Ўқитувчи синфдан чиқаётганда «хайр, соғ бўлинглар», «хайр, яхши қолинглар» ибораларини ишлатса, ўринли бўлади.

Болага яхшилик қиласан, айтилган юмушни, илтимосни бажарган кишиларга ўз вақтида миннатдорчилик билдириш одобини ҳам ўргатиб бориш лозим. Тилимизда рагбатлантиришни, миннатдорчиликни англатадиган чиройли ифодалар бор. Уларни кундалик муомалага киритиш, ўз ўрнида ишлатиш киши хулқини нақадар безайди. Ўқитувчи топшириқни яхши бажарган ўкувчиларни «оффарин», «баракалла», «раҳмат», «отангизга раҳмат», «миннаторман» каби сўзлар билан рагбатлантириши лозим.

«Ҳар бир кишининг маданийлик даражаси, ўқиб қанчалик тарбия кўрганлиги унинг ёзма ва оғзаки нутқидан билинади» (С.Иброҳимов).

Тилнинг дунёни билиш, билимларни тўплаш, сақлаш, кейинги авлодларга етказиш, руҳий муносабатларни акс эттириш, гўзаллик категорияларини воқелантириш каби қатор вазифаларни бажаришига қарамасдан, унинг асосий функцияси кишилар ўртасидаги алоқани таъминлашдир.

Нутқ маданияти жамият маданий-маърифий тарақ-қиётининг, миллат маънавий камолотининг муҳим белгисидир. Том маънодаги маданий камолотнинг муҳим белгисидир. Ҳақиқий маънодаги маданий нутқ шахс умуммаданий савиясининг муҳим жиҳатларидан биридир. Шунинг учун ҳам хозирда мамлакатимиздаги маънавий-маърифий ислоҳотлар ҳар қачонгидан ҳам долзарб ҳисобланади.

Республикамизнинг «Давлат тили ҳақида»ги, «Таълим тўғрисида»ги қонунларида, «Кадрлар тайёрлаш бўйича миллий дастури» ва бошқа жуда кўплаб ҳужжатларида маънавий-маърифий тарбияга, тил масалаларига алоҳида аҳамият берилади. Жамиятимизнинг ҳар бир аъзоси, ҳар бир мутахассис замон билан ҳамқадам бўлиши, энг аввало, ўз она тилининг садоқатли соҳиби бўлмоғи лозим.

Тил жамият билан, унинг маънавияти, маърифати ва маданияти билан биргалиқда юксалади.

Такрорлаш учун саволлар:

1. Тил қандай ҳодиса?
2. Алишер Навоий тил ва нутқни қандай таърифлайди?
3. Нутқ одоби нима?
4. Нутқий этикет нима?

Таянч тушунчалар

Одоб - муомалада ўзини тута билиш.

Нутқ одоби - адабий меъёрдаги нутқ.

Сўз - маъно ифодаловчи тил (нутқ) бирлиги.

НУТҚ МАДАНИЯТИ ВА УСЛУБШУНОСЛИК

Услубшуносликнинг тилда туттан ўрни бекиёсдир. Услубшунослик меъёрларни шакллантириш, машҳур тилшунос олим Г.О.Винокур таъкидлаганидек, нутқ маданиятининг ўз олдига қўйган асосий мақсади, унинг энг муҳим вазифасидир. Чунки услубий меъёрни яхши билмасдан, уларни мукаммал эгалламасдан туриб, нутқ маданиятига, маданий нутқقا эришиб бўлмайди.¹

Маълумки, ҳар бир сўзни ўйлаб, танлаб, уларнинг ҳар бир маъносига, маъно қирраларига яхши эътибор қилиб, ўринли ишлатиш ҳақида жуда кўплаб халқ мақоллари, ҳикматлари мавжуд. Бу ҳақда буюк файласуф Аристотелнинг «Поэтика» ва сўз мулкининг сultonи Алишер Навоийнинг «Маҳбуб ул-қулуб» асарларида ҳам қимматли фикрлар айтилган.

Тилда ҳар бир сўзни, грамматик формани, ҳар бир синтактик қурилмани ўз ўрнида, яъни шу сўз, шу грамматик шакл ёки синтактик қурилма (гап) ишлатилаётган вазиятни (tinglovchi savияси, уларнинг ҳолати кабилар) ҳисобга олган ҳолда тўгри қўллаш, уларнинг шу вазиятта энг мос тушадиганини танлаб, нутқ жараёнида улардан унумли фойдаланиш, энг ихчам ва фикрни лўнда ифодалайдиганини, энг содда ва ҳаммага тушунарлисими ишлатиш нутқнинг равонлигини, тушунарлилигини, аниқлигини таъминлади, уни гализилардан халос этади. Сўзларни, грамматик шаклларни бефарқ қўллаш, вазиятта мос тушмайдиган гапларни беихтиёр, назоратсиз айтиб юбориш, бўлар - бўлмасга у ёки бу сўздан ёки грамматик шакллардан фойдаланавериш, умуман, уларни ортиқча қўллаш, ўринли - ўринсиз такрорлайвериш нутқни бачканга қиласди, фикрни хиралаштиради, унинг таъсирчанлигига путур етказади.² Зоро, донолар айттанидек:

Нодонлардек юзлаб сўзни қилма қатор,
Донолардек бир сўз дегил, лек маънодор.
(Саъдий Шерозий)

ёки

¹ Ё.Тожиев ва б., Ўша асар. 90-бет.

² Ё.Тожиев ва б., Ўша асар. 91-бет.

Суз жою вақтига бұлар экан мос,
Сеҳру афсун учун у бұлар асос.
(Абдурахмон Жомий)

Маълумки, услугият - фикрни ифодалаш йұллари, тил воситаларини - материалларини тұгри танлай билиш ҳақидаги таълимот-услублар илми бўлиб, тилнинг вазифаларига мос равища бир неча кўринишларга эта: сўзлашув услуби, китобий услуб, илмий-оммабоп услуб, расмий, публицистик ва бадиий услуб кабилар. Ушбу фикр услугиятнинг таркибий қисмiga кирувчи грамматик услубшунослик ҳақида ҳам айтиш мумкин.

Грамматиканинг морфология ва синтаксис номлари остида икки қисмга ажратилиш ҳолати грамматик услубшуносликда ҳам сақланади, яъни у морфологик услубшунослик ҳамда синтактик услубшунослик каби икки кўринишда бўлади.

Грамматика сўзнинг ёки синтактик қурилманинг лугавий ва грамматик маъноларини, фикрий жаҳатни ўрганса, грамматик стилистика уларнинг қўшимча - экспрессив маъноларини, вазифавий хусусиятларини ўрганади.

Грамматика билан услубшунослик биргаликда фақат грамматик шаклларнинг нимани ифодалашини эмас, балки қандай ифодаланишини ҳам текширади.

Грамматик услубшуносликнинг бир қисми, бўлган морфологик услубшунослик ҳар бир грамматик шаклининг, сўз ясовчи воситалар ва ҳар хил бошқа шаклларнинг услубий хусусиятларини ўрганади.

Ўзбек тилида қўшимчалар доирасидаги маънодошлик (синонимия) ҳодисаси ҳам көнг тарқалган: шу сабабли // шу сабабдан; талабалардан бири // талабаларнинг бири; отта минди // отни миңди; савлатли // савлатдор // басавлат... каби.

Ўзбек тилида сўз ясовчи ва грамматик маъно ифодаловчи жуда кўп аффикслар ўз варианtlарига эга ёки бир-бири билан үзаро синонимик муносабатда бўлади. Масалан, жўналиш келишиги кўрсаткичи -та ҳозирги тилимизда -ка, -қа варианtlарида учраса, эски ўзбек тилида -та (борарға - қилурға, сўрарға) кўринишида

учрайди. Феъллардаги -гиз кўрсаткичи -киз, -ғиз, -қиз; -каз; -газ ва ҳатто, баъзан -кар (уткар, еткар) варианларида учрайди.¹

Тилимизда баъзан айрим грамматик шакл плеонастик (құш) құлланади. Бундай құллаш нутқда ортиқчаликни вужудга келтириши, нутқ равшанлигига путур етказиши, фикрни хиралаштириши, бачканалаштириши мумкин: тойчоқчагина, кичкинагина, ичилиб қўйилди, то мактабгача, Яңгиқишлоқ қишлоғи, бир калима сўз, ун йиллар ўтди. б та ўғил - қизларим бор, құлланишларда грамматик шакллар ёки сўзларнинг ўринисиз, мақсадсиз құлланиши натижасида ана шундай ҳол юз берганини кузатамиз: кичкинагина типидаги құлланишларида -тина, солиниб бўлинди құлланишидаги -ин, ичилиб қўйилди типидаги құлланишларда одинги сўздаги -ил, то мактабгача құлланишида то элементи (бунда баъзан кучайтириш ифодаланиши мумкин, ана шундай вақтда то элементининг ишлатилиши ўзини оқлади), кейинги бирикмаларда қишлоғи, калима сўзлари, ун йиллар ўтди, олтига ўғил - қизларим бор, ҳар бир далилларни бирикмаларида -лар аффикси ортиқча ишлатилган ва нутқда гализлик тутдирган.

Бироқ, шуни ҳам айтиш керакки, грамматик шакл ёки бошқа воситаларни плеонастик құллаш ҳамма вақт ҳам нутқда ортиқчалик тутдиравермайди. Баъзан жуда ўринли, тушунган ҳолда, маълум бир мақсадни кўзда тутиб, шундай қилинса, нутқни равон қиласди, фикрни аниқ, лўнда, бор нозикликлари билан ифодалашга ёрдам беради, нутқ таъсирчанлигини оширади, маънони кучайтиради, бўрттиради: Улуг айём кунлари; шунча йил туз - намак бўлдик; беш панжасини оғзига тиқади; айтганини қилмай қўймайди; биз ўзимиз айтиб қўямиз типидаги құлланишларда ана шу ҳолни кузатамиз. Тўгри, намак, калима, айём, панж сўзлари форс-тожик тилларида туз, сўз, кун, беш сўзларига тўгри келади. Бироқ, ўзбек тилида улар, биринчидан, бошқа маънода құлланилиши мумкин бўлса, иккинчидан, кучайтирувчи восита вазифасини бажарувчи сифатида ишлатилиши мумкин. Жумладан, улуг айём

¹ Е.Тожиев ва б., Ўша асар, 90-бет.

кунлари бирикмасида айём сўзи кун маъносида қўлланган эмас, у маълум бир санани ифодалаган, беш панжасини бирикмасида панжа сўзи бармоқ маъносида, бир қалима сўз бирикмасида қалима сўзи сўз лексемасининг аниқловчиси бўлиб келган ва ақлли, фикрли, лўнда сўzlари маъносида қўлланган; туз-намак қўлланишида эса ўзбек тилида, оғзаки нутқда кўп учрайдиган нон - пон, чой - пой типидаги ҳолатни кузатамиз.

Бундан ташқари, бу қўлланища туз - намакнинг ибора ҳолига келиб қолгани кўзга ташланади ва у бирга турдик, бирга бўлдик бирикмалари ифодалаган маънони англатади. Худди шу бирикмада улардан биттасини қўллаш ҳеч мумкин эмас.

Кейинги мисолда инкор формасининг (-ма) иккала сўзда ҳам иштирок этиши тасдиқ маъносини анча кучайтириб, бўрттириб баён қилишни таъминлаган.¹

Грамматик услубшунослиқда айрим грамматик шаклларнинг ўрнини алмаштириб қўллашнинг ўзига хос томонлари борлиги кенг ўрганилиши керак. Адабий меъёрда ҳар бир кўрсаткичнинг ўзак-негизларга қўшилишдаги ўрни қатъий белгиланган. Аммо маълум бир услубий мақсадни қўзда туттган ҳолда уларнинг ўрнини алмаштириш мумкин: Қалбимни сен кўзимданми англадинг (Ойбек); Осмондаги булутларнинг хўмрайишиданми қўрқдингиз (Ойбек); боринглар — борларинг, кетинглар-кетларинг; борганми эди — борган эдими, айтиб эдимми — айтибми эдим; даданг уйдаларми-даданг уйдамилар; айтмабмидим — айтмаб эдимми (оғзаки нутқда).

Келтирилган мисолларга диққат қилсак, биринчи икки гапда -ми юкламаси аслида, адабий меъёрга кўра, англадинг ва қўрқдингиз сўзларига қўшилиб келиши керак эди: англадингми, қўрқдингизми типида. Аммо ёзувчи бу шаклни олдинги сўзга қўшади ва бу билан ўзига хос экспрессивлик ҳосил қиласди, таъсирчанликни оширади, нутққа поэтиклик ато этади. Кейинги мисолларда -инг ва -лар аффиксларининг ўрнини алмаштириш ҳурмат ёки ҳурматсизлик маъноларини ифодалашга хизмат қилган бўлса, борганми эди — борган эдими типидаги қўлланиш-

¹ Ё.Тожнев ва б., Ўша асар, 94-бет.

ларда маънони кучайтириш, нутққа экспрессивлик ато этиш, таъкидлаш, жонлилик, жўнлик, тасвирийлик ўз ифодасини топган.¹

Куриниб турибдики, ҳозирги ўзбек тилшунослигига грамматик шаклар услубшунослигини ўрганиш алоқида аҳамиятта эгадир. Грамматик шакларни ўз ўрнида тўгри ва мақсадга мувофиқ қўллаш, улардан ўринли фойдаланиш нутқимизнинг таъсир кучини оширади, уни ҳар хил гализликлардан халос этади.

Такрорлаш учун саволлар

1. Услубият нима?
2. Грамматик услубшунослик нима?

Таянч тушунчалар

Услубшунослик – адабий тил услуби?

Кўшимча- шакл ва сўз ўзгартирувчи ҳамда ясовчи аффикс.

¹ Е.Тожиев ва б., Ўша асар, 96-бет.

НУТҚ ВА ТЕРМИНОЛОГИЯ

Ҳозирги ижтимоий-иктисодий ҳамда илмий-техник туб ўзгаришлар даврида жамият тараққиёти билан бевосита боғлиқ ҳолда янги-янги фанлар ва тушунчалар юзага келмоқда. Ўзбек тилида ҳам янги терминлар пайдо бўлмоқда, илгаридан ишлатиб келинган қатор лексемалар янги маъно касб этмоқда. Демак, терминология соҳасида ҳам қатор муҳим масалаларни ҳал қилиш вазифаси турибди.

Бугунги кунда терминологиянинг амалий ва назарий масалаларини янада чуқурроқ ўрганиш, терминларни яратиш ва уларни қўллашни тил қонуниятлари асосида тартибга солиш давлат аҳамиятига молик муаммога айланди. Шунинг учун она тилимизнинг турли терминологик системасини янада теранроқ тадқиқ этиш, терминологиянинг турли масалаларини атрофлича ўрганиш ҳозирда муҳим ва жиҳдий масалалардан бири бўлиб қолди.

Ўзбек тилига Давлат тили мақоми берилгунга қадар ва у амал қила бошлигандан кейин қатор матбуот ходимлари, ҳатто айрим тилшунослар Давлат тили ҳақидаги конунни тўлиқ жорий этиш ўрнига, унинг айрим бандларига деярли эътибор бермай, кўпдан буён қўлланиб келинаёттан ва омма нутқига сингиб кетган кўплаб терминларни, уларнинг мазмунини чуқур ўрганмай туриб, янгидан, нотўғри сўзлар - лексемалар билан алмаштира бошлища. Ҳатто «термин», «терминология» кабилар «атама», «атамашунослик» лексемалари билан алмаштириб қўлланадиган бўлди, «атама», «атамашунослик» каби тушунчаларнинг умумхарактерга эгалиги эътиборга олинмади. Чунки, «атама» дейилганда, ономастика (топонимия, антроономия, ойконимия кабилар)га алоқадор лексик бирликлар ҳам тушунилади. Шунга кўра, аввалдан истеъмолда бўлган байналмилал «термин» ва «терминология» лексемаларини қўллаш мақсадга мувофиқдир.

Терминология муайян фаннинг тушунчалар системаси билан ўзаро муносабатда бўлган терминларнинг жами сифатида таърифланади. Ҳар қандай тушунчалар

системасига муайян терминлар системаси тўғри келади. Терминологик системалар фан тараққиёти билан биргалиқда ривожланиб боради. Терминлар умумистеъмолдаги сўзлардан фарқли равишда жорий қилиниб, уларнинг кўлланиши маълум даражада назорат остида бўлади. Ўз-ўзидан терминлар пайдо бўлиб қолмайди, аксинча, улар заруриятта айланган ҳолда «ўйлаб топилади», «ижод қилинади». Шунингдек, оддий сўздан фарқли равишда, терминнинг маъноси контекстга боғлик бўлмайди, муайян лексема терминологик маъносида ва ўз терминологик майдонида кўлланар экан, айни маъно сақланиб қолаверади. Бироқ кўп маъноли терминларнинг аниқ маъносини ажратиб олиш учун контекстнинг зарурлиги шубҳа туғдирмайди.

Терминологик бирикмаларнинг кўп лексемалилиги, яъни улар компонентларининг сони нечтагача бўлиши кейинги йилларда терминшуносларнинг дикқат-эътиборини жалб этиб келмоқда.

Ҳақиқатан ҳам кейинги йилларда миқдоран ортиб бораётган кўп компонентли бирикма терминлар тушунча мазмунини тўлароқ ифодалашга хизмат қиласа-да, уларни амалда кўллаш ва ёдда сақлаб қолиш анча нокулайдир. Аслини олганда, бундай терминлар икки, нари борса уч, тўрт компонентдан иборат бўлиши лозимки, натижада, бирикма терминларнинг компонентлари, тегишли белгиларни тўлароқ акс эттириш мақсадида, аникловчилар, сифатдошли ўрамлар кўшиш орқали ҳосил қилиниши керак. Бу тушунчани ифодалашнинг дастлабки босқичига ҳос ҳолат бўлиб, кейинчалик тушунча ҳақида муайян тасаввур юзага келгач, у қадар аҳамиятсиз белгиларни ифодалаган компонент (сўз)лар қисқартирилиши, бино-барин термин ихчамроқ ҳолга келтирилиши мумкин. Бироқ бу жараён бошбошдоклик, таваккалчилик асосида эмас, балки маълум қонун-коидалар асосида мантикий равишда амалга оширилиши лозим. Термин муаммоси ҳақида фикр юритар эканмиз, термин нима? деган аниқ саволнинг туғилиши табиийдир.

Термин касбий маънно билдирувчи, касбий тушунчани ифодаловчи ва шакллантирувчи айрим обьектлар ва улар ўртасидаги алоқаларни муайян касблар нуқтаи назаридан билиш ҳамда ўзлаштириш жараённида ишлатиладиган сўз ёки бирикмадир.

Ҳақиқатан ҳам шундай, чунки ҳар бир соҳанинг тармоқнинг термини борки, у ўша соҳа, тармок доирасида кўлланади, аникроқ қилиб айтганда, касб-хунар эгасининг нутқини шакллантиради, ўзаро нутқий муомала учун шартшароит яратади.

Бу ўринда шуни қайд этиш лозимки, муайян касб-хунар ёхуд мутахассисликка эга бўлган кишилар кўпинча у ёки бу соҳанинг ўзига хос специфик терминлари билан иш кўради. Масалан, иқтисодчиларнинг ёзма ёки оғзаки нутқида картель, клиринг, товар обороти, майда мулкчилик, маблағ ажратиш, рента каби тор доирадагина кўлланиладиган терминларнинг ишлатилиши табиий ҳолдир. Ўз-ўзидан аёнки, бу хилдаги терминлар иқтисодиётдан узоқроқ бирор касб эгасининг нутқида ишлатилмайди. Шу билан бирга, иқтисодиёт соҳасининг қатор терминлари ҳам борки, улар муайян тил эгаларининг деярли барчаси нутқида баб-баравар ишлатилаверади.

Масалан, бозор, мол, савдо, савдо-сотиқ, пул, харидор, бозорчи, олиб-сотар, чайқовчи кабилар . шулар жумласидандир.

Ҳар бир соҳанинг ўзига хос тушунчалари бор. Бу тушунчаларнинг жами шу соҳанинг тушунчалар системасини ташкил этади. Шу соҳага оид тушунчаларни ифодаловчи маҳсус терминлар ҳам мавжуд. Ана шу терминларнинг жами шу соҳанинг терминалогик тизимини ташкил этади. Яъни шу соҳа терминалогияси бўлади. Жумладан, математика, физика, биология, химия, тилшунослик, адабиётшунослик, медицина ва ҳоказо. Фанларнинг ўзларига хос терминлари мавжуд; қўшув, олув, квадрат, илдиз, тангенс, котангент, синус, косинус; заряд, кучланиш, босим, ҳаво оқими, молекула, микроорганизм; морфология, сифат, эга, кесим, ўзак, негиз, қўшимча, аруз, газал, туроқ кабилар. Куринадики, терминалогия «тор

маънода маълум бир соҳага оид махсус лексика» бўлса, «кенг маънода умумий лугат таркибининг айрим соҳаларда ишлатиладиган қисмидири» (С.Ф.Акобиров).¹

Терминларни қўллашда маълум камчиликлар содир булаётган экан, бунинг сабаблари ҳам мавжуддир: 1. Нутқ муаллифи терминнинг туб маъносини тўгри англаб етмайди. Натижада, уни мантиқан мос келмайдиган сўзлар билан бириктиради ва жумла тузади. Унингча, термин тўгри ишлатилганда туюлади. Масалан: Унинг соchlаридан келаётган жуда ингичка бир ҳинди мушк иси бошимни айлантиради, гапида ингичка сўзи ўринсиз ишлатилган. 2. Муаллиф уз нутқига жиддий эътибор бермайди, уни кузатмайди, унга баҳо бермайди. Натижада терминлар пала - партиш ишлатилиб юборилади. Баъзан эса онгли равишда мавжуд терминларни яхши билгани ҳолда анъанавий қўлланилиб келинаётган, ҳамма учун тушунарли бўлган терминлардан воз кечиб, узини шу фаннинг билимдони қилиб кўрсатиш мақсадида ҳеч ким учун тушунарли бўлмаган, қўлланилиши узини оқлаш - оқламаслиги ҳали номаълум бўлган терминларни қўллаш ҳоллари ҳам учрайди. Бу билан нутқ муаллифи узини гўё «янги нарса» айтган ҳисоблади. 3. Тилни чуқур билмасак, унинг синтактик ва семантик имкониятларини эгалламаслик натижасида нутқда терминлар нотўгри ишлатилиб юборилади. 4. Сўз ясалиши, жумладан, терминларнинг ясалиш қонун-қоидаларини яхши билмаслик натижасида нотўгри терминлар - сўзлар ҳосил қилинади ва уларнинг нутқда ишлатилиб юборилиши ҳам сўзловчи ва тингловчи ўртасидаги алоқани қийинлаштиради: «Шу яшаёттан жойимда ножойлигимдан эмас нимаданлигини ўзим ҳам билмайман, тушунтирилиши, аммо...» (А.Аъзам).

Келтирилган мисолдаги ножой сўзининг ясалиши гализдир. Чунки ўзбек тилида таркибида о унлиси бўлган ундош - унли -ундош таркибидаги бир бўгинли сўзларга но префикси қўшилиб, янги сўз ҳосил қилиш меъёр эмас: нонон, ножон ясалишлари учрамагани ҳолда ноңиз, жониз ёки бенон, бежон ясалишлари меъёр ҳисобланади. Бундан ташқари, баъзан, ҳар хил сабабларга кўра, термин

¹ Р.Қўнгурев, Э.Бегматов, Ё.Тожиев Нутқ маданияти ва услубият асослари. -Т.: 1992. 151-бет.

ясашда, терминология талабларига зид иш тутилади. Маълумки, терминлар ихчам, айтилиши ва ёзилиши қулай бўлиши керак. Бунга зид равишда, масалан, физик хоссалар тишида термин ясашлар учрайди. 5. Баъзан мавжуд термин бор бўлгани ҳолда, уни билмаслик оқибатида, бошقا сунъий терминлар ҳосил қилиш ёки мавжуд терминни ўз мустақил қарашларига мос равишда ўзгартириш, айрим ҳолларда эса, тушунчани, ҳодисани ўз нуқтаи назаридан баҳолаган ҳолда уни мавжуд термин билан ифодалаш ҳоллари учрайди.¹

Мустақилликка эришганимиздан сўнг терминларни ўзбекчалаштириш йўлида бир қатор ютуқлар билан бирга маълум камчиликларга ҳам йўл қўйилди. Бир тушунчани ифодалаш учун турли сўзлар ишлатиљди: район - ноҳия - туман; институт - олий илмгоҳ - олий таълимгоҳ - дорилмуаллимин; журнал - мажалла - жарида - ойнома - ойбитик; газета - рўзнома - ҳафттанома, қўналга - учаргоҳ - учардаргоҳ - тайёрагоҳ (аэропорт) каби. Атамаларни тартибга солиш бўйича «Атамашунослик қўмитаси» томонидан кўпгина хайрли ишлар амалга оширилди. Масалан: тилимизда муқобили ёки уни ясаш имкони бўлмаган ҳолларда байнамилал атамаларнинг ўзи ишлатилавериши тўгрисида шундай дейилади: «...кейинги тараққиёт давомида кўплаб машиналар, техника воситалари, илм-фан тушунчалари ўз номи билан ҳаётимизга кириб келган. Предмет ёки тушунчаларни ифодалайдиган бундай атамалар ўз сўзимиз бўлиб қолган ва лугат бойлигидан ўрин олган: трактор, автомобил, трамвай, аэропорт, атом, ядро, нейтрон, физика, техника кабилар»².

Шу бўлимда фикр юритилган лисоний ҳодисалардан маълум бўлдики, тил имкониятида шундай сўзлар борки, улар алоҳида муайян семантик майдон сифатида фан билан фан тараққиёти билан фандаги янгиликлар, ўзгаришлар билан бевосита боғлиқ ҳолда юзага келади, яшайди. Маълумки, бундай сўзлар терминлар номи билан юритилиб, фан учун хизмат қиласди. Аниқроги, фан ҳақида сўз борар экан, уни терминсиз тасаввур қилиб бўлмайди.

¹ Р.Қунгиров, Э.Бегматов, Ё.Тожиев Нутқ маданияти ва услубият асослари. -Т.: 1992. 155-бет.

² Ўзбек тили атамашунослиги. Фан, -Т.: 1992 й. 21 - бет.

Чунки фаннинг «ҳаёти», фаолияти, «ижодкорлиги» термин орқалидир, термин биландир. Термин фаннинг кураш қуролидир, яратиш, яшаш қуролидир, унинг мавжудлигидир.

Термин ҳақида фикр юритилар ва унга изоҳ берилар ҳамда унинг муҳим белги-хусусиятлари саналар экан, биринчи навбатда, унинг илмийлик хусусияти кайд этилиши, айни хусусиятнинг доминанта эканлиги айтилиши лозим. Чунки термин, даставвал, илмийлик хусусиятига - семасига (маъно компонентига) кўра ажралиб туради. Терминнинг қолган барча хусусиятлари: аниклиги, бир маънолилиги, эмоционалликдан ҳоли эканлиги, қўлланиш камровининг торлиги, чегараланганилиги кабилар унинг - илмийлик моҳиятидан, тушунчасидан келиб чиқади. Термин айнан мана шу нуктасига кўра умумистеъмолдаги сўзлардан, атамалардан фарқ килади, ажратилади.

Шунингдек, сўз, атама - кенг, умумий;

Термин - тор, хусусий;

Сўз, атама - нисбатан мавхум, абстракт;

Термин - аниқ, конкрет;

Сўз, атама - илмийлик тушунчасига (семасига эга эмас);

Термин - илмийлик тушунчасига (семасига) эга;

Атама - эскирган, нофаол;

Термин - фаол, харакатчан;

Сўз - эмоционалликка, экспрессивликка эга;

Термин - эмоционалликка, экспрессивликка эга эмас;

Сўз - жамиятга, умумга, турли соҳа вакилларига оид;

Термин - фанга, фан вакилларига оид;

Сўз - алоқа қуроли;

Термин - фан қуроли;

Сўз-келиб чиқишига кўра бирламчи;

Термин - келиб чиқишига кўра иккиласми. У жамият тараққиётининг муйян даврида фан билан фан тараққиёти билан, фан фаолияти билан юзага келган.

Сўз - лексикада ўрганилади, лексикологиянинг текшириш обьекти;

Термин - терминологик лексикага оид сўз сифатида терминологияда ўрганилади ва бошқалар.

Сўзниң ҳам, терминнинг ҳам ҳаёти ҳалқ билан, жамият билан боғлиқ. Чунки жамият бор экан, сўз ҳам, термин ҳам яшайверади,

жамиятга, фанга хизмат қилаверади, муайян вазифани бажараверади.

Жамиятда, тил ва жамият диалектикасида терминларнинг кўлланиши, уларнинг турли сабабларга кўра лисоний жараёнга кириб келиши ва фаол ишлатилиши мутлақо табиий бўлиб, бу тил сиёсатининг, жамият тараққиётининг объектив, мантикий, зарурий маҳсули ҳисобланади. Кириб келаётган терминларнинг ўзбекча муқобили бўлган такдирда ҳам улардан воз кечиб бўлмайди. Уларни ҳам билишимиз ва улардан ҳам ўринли фойдаланишимиз лозим. Чунки улар дунё миқёсида фаоллиги билан, фан учун хизмат қилиши билан муҳимдир.

Шунингдек, жамият бор экан, фан, тараққиёт бор экан, уларнинг (терминларнинг) функционал қамрови, доираси кенгайиб бораверади. Бу жараён жамият тараққиётининг объектив маҳсули сифатида ижобий баҳоланиши лозим. Айни жараёнларнинг олдини олиш ва унга қарши асоссиз кураш олиб бориш диалектик фалсафани - методологияни, тил ва жамият диалектик муносабатини тушунмаслик, назария билан амалиётнинг узвийлигини тан олмасликдир.

Хуллас, термин фан, техника, санъат, адабиёт, сиёсат кабиларнинг «вакили», фаолият қуроли, яшаш усули сифатида тилнинг лексик системасида алоҳида эътиборга, фан тараққиётида муҳим аҳамиятга эга бўлган факат ўзигагина хос қатор хусусиятлари билан ажралиб турувчи, жамиятга, унинг тараққиётига фаол хизмат қилувчи ва жамият илмий тараққиёти даражасини кўрсатувчи муҳим мезондир, фан тараққиётининг энг асосий кўзгусидир.¹

Такрорлаш учун саволлар

1. Сўз ва атаманинг фарқи нимада?
2. Истиклолдан сўнг ўзбек терминологиясида қандай ўзгаришлар бўлди?

Таянч тушунчалар

Термин - бир маънодаги сўз.
Атама - атоқли от; термин.

¹ Р.Расулов. Термин хусусиятлари. СамДУ ахборотнома. 2005. №2, 68-71-бетлар.

НОТИҚЛИК САНЬЯТИ ТАРИХИДАН

Нотиқлик санъати оғзаки ва ёзма нутқни тингловчиларга жонли, ифодали ва таъсириш етказиш малакасини эгаллаштыр. Нотиқлик санъати мураккаб санъат булиб, уни эгаллаш кишидан қунт ва чидам, малака ва тажриба талаб этади.

Кишилик жамиятининг бирор бир жабхаси йўқки, унда нотиқлик санъати ёки унинг элементлари қатнашмаган бўлса. Масалан: бирор бир раҳбарнинг ўз ходимларига қарата сўзлаган нутқида ҳам, ўқитувчининг ўқувчиларига берадиган сабогида ҳам, хуллас, ҳамма - ҳамма ерда нотиқлик санъати ўз мавқеига эга бўлган.

Нотиқлик санъатининг ижтимоий мавқеи шу қадар кенг ва сертармоқки, уни ҳар бир соҳада меъёри, мазмуни ва шакли, ўзига хослиги, таъсир кучи ва томонлари жиҳатидан алоҳида - алоҳида кўриб чиқиш учун маълум бир вақт, имконият талаб қилинади.

I. Нотиқлик турлари. Нутқ кўринишлари:

I. Сиёсий-ижтимоий нотиқлик:

1. Сиёсий-ижтимоий ва сиёсий иқтисодий мавзудаги нутқ.
2. Сессия, конференциядаги нутқ.
3. Сиёсий нутқ.
4. Дипломатик нутқ.
5. Сиёсий шарҳ.
6. Ҳарбий ватанпарварлик нутқи.
7. Митинг нутқи.
8. Илмий-оммабоп нутқ.

II. Академик нотиқлик:

1. Ўқув юртлари маъruzalari.
2. Илмий нутқ (маъruzalар).
3. Илмий шарҳ.
4. Илмий ахборот.

III. Суд нотиқлиги:

1. Қораловчи (прокурор) нутқи.
2. Жамоатчи-қораловчи нутқи.

3. Оқловчи (адвокат) нутқи.
4. Жамоатчи-оқловчи нутқи.
5. Ўз – ўзини ҳимоя қилиш нутқи.

IV. Ижтимоий-маниший нотиқлик:

1. Мадҳия (юбилей ёки мақтов нутқи).
Таъзия (мотам) нутқи.
Табрик нутқи (тост).

V. Диний нотиқлик:

1. Хутба.
2. Ваъз.¹

Нотиқлик санъати тур ва кўринишлари жиҳатидан ана шундай шаклларда намоён бўлади. Бироқ бу тасниф нотиқлик санъатининг бутун борлигини ҳар томонлама акс эттиради, деган гап эмас. Чунки, нотиқлик санъати ҳам борлиқ билан ҳамнафас яшайди, замон талабига мослашади, не-не янги кўринишларни вужудга келтиради ва б.

Кўплаб фанларнинг бешиги бўлган қадимги Юнонистон (Греция) нотиқлик санъати соҳасида ҳам жаҳон маданияти тарихининг энг ёрқин саҳифаларини яратди.

Юнон нотиқлигининг энг қадимий сарчашмалари ҳақида деярли ҳеч бир ёзма маълумот қолмаган. Нотиқлик санъати ҳақидаги илк маълумотларни эса фақатгина Гомернинг (эрамиздан олдинги XII аср) «Илиада» ва «Одиссея» номли достонларидан олиш мумкин.

Гомер достонлари маълумотига қараганда қадимги Юнонистон тупрогида эрамиздан аввал, ана шу даврларда, Нестор, Менелай, Одиссей, Ахилл каби бир талай машҳур нотиқлар бўлганлар. Гомер турли воқеалар тасвири жараёнида йўл-йўлакай эслаб ўтган юқоридаги тўртта нотиқларнинг нотиқлик санъатининг тўртта йўналишга мансублиги, улардан айримларининг эса маҳсус нотиқлик мактабларида таҳсил олганликларини қайд этади. Хусусан, Ахиллнинг Феникс исмли сўз устаси дарсхонасида сабоқ

¹ С.Иномхўжаев, Нотиқлик санъати асослари. -Т. 1982. 7-бет.

олганлигини айтади. Ушбу фикрлар шуни кўрсатадики, нотиқлик санъати ўша даврларда худди ҳарбий мутахассислик ва бошقا шу каби ижтимоий - сиёсий зарур мутахассисликлар қатори маҳсус мактабларга эга бўлган. Юнонистонда кейинчалик аристократия, демократия тузумининг ўрнатилиши натижасида давлат ишларида, ҳалқ мажлисларида, сенат кенгашлари ва суд жараёнларида мамлакатнинг ҳар бир эркин фуқароси иштирок этиш, кўрилаёттан масала юзасидан эркин муҳокама юритиш ҳуқуқига эга бўлган. Бу ҳол кенг омма орасида ҳам нотиқлик санъатининг ривожланиши учун жуда қулай шароит яратди. Чунки нотиқлик санъати ҳар бир фуқаро учун зарурий эҳтиёжга айланган эди. Шу боис барча давлат арбобларидан тортиб, ҳалқ мажлисларининг иштирокчиси бўлган эркин фуқаролар оммаси нотиқлик санъатининг асосларини эгаллаш учун курашар ва мақсадга эришиш учун маҳсус устоз - ўқитувчилардан дарс олишарди. Бадавлат оиласлар эса ўз фарзандларини болалик чогиданоқ шу мўътабар санъат билан қуроллантиришга уринар ва фарзандларини маҳсус нотиқлик санъати мактабларига бериб ўқитарди. Ўз - ўзидан маълумки, ана шу оммавий эҳтиёж туфайли нотиқлик санъатининг бошлангич, ўрта ва олий таълим даражасидаги мактаби мавжуд бўлиб, уларда минг-минглаб кишилар маҳсус таълим оларди.

Лекин шуни унутмаслик керакки, юнон демократияси нечоғлиқ демократия бўлмасин, бироқ у ҳозирги тушунчадаги энг прогрессив маънодаги демократия эмасди. Гап шундаки, антик Юнонистоннинг давлат системаси қулдорлиқдан иборат эди. Эркин фуқаролардан ташқари яна икки тоифа бор эдики, улар қуллар ва четдан келган, келгинди, деб камситилувчи кишилар бўлиб, улар эркин фуқаролар эга бўлган ҳуқуқлардан фойдаланишга мутлақо ҳақлари йўқ эди.

Суд ишларида ўрнатилган тартиб нотиқлик санъатининг юксалишига катта бир туртки бўлади. Суд жараённада даъвогар ҳам, ҳимояланувчи ҳам - ҳар бири ўз манфаатини ҳимоя қилиш учун курашарди. Суд ҳукмининг қайси томон фойдасига ҳал бўлиши кўпинча судланувчи шахс ёки даъвогарнинг нотиқлик санъатидаги маҳоратига

боглиқ әди. Қай томон үзининг мантиқий, асосли даил ва маълумотлари билан суд ҳайъатини ишонтира олса, ҳукм үшанинг фойдасига чиқарилар әди. Лекин ҳамма судланувчи ёки даъвогарлар ҳам етук нотиқ бўлган рақибларининг тазиикига дош беришлари қийин әди. Шунинг учун ҳам антик суд тизимиning қоидаларига кўра бундай кишиларга у ёки бу киши номидан сўзловчи нотиқлардан ёрдамчи олишга рухсат бериларди. Суд жараёнида бошқа бирор манфаатини кўзлаб, нутқ сўзловчи ана шу тоифадаги нотиқларга синегорлар дейилиб, уларнинг нутқи синегория деб аталарди. Бора-бора эса ана шу синегорлар тоифасидан суд ҳайъатининг ажралмас қисми бўлган ҳозирги тушунчадаги адвокатлар келиб чиқдики, бу маънода синегорлар институти чинакамига ижобий, демократик рол ўйнади, деб айтиш мумкин.

Синегорлар нотиқлик санъати ва ҳуқуқшуносликдан маҳсус таълим олган кишилар бўлиб, ана шу суд жараёнидаги қатнашувчилар ҳисобига ўз ҳимояларидағи кишилардан хизмат ҳақи олиб, тирикчилик қилувчи профессионал нотиқлар әди. Шу маънода уларни ихтисослашган нотиқлар, деб айтиш мумкин. Чунки суд нотиқлиги олдида бирорни оқлаш учун улар бор билимларини ва маҳоратларини ишга солишга мажбур эдилар. Бугина эмас, улар даставвал олган ишларини ипидан игнасигача ўрганиб чиқишилари ва ниҳоят жонли сўз санъатига оид бор маҳоратларини ишга солиб, суд жараёнида ютиб чиқишига ҳаракат қилишилари лўзим әди. Шунинг учун ҳам синегорлар суд нотиқлиги тараққиётига катта ҳисса қўшдилар.

Логографлар ҳам синегорларга жуда ўхшаш кишилар бўлиб, аслида уларни ҳам синегорлардан ажралиб чиқсан муайян ихтисосли кишилар, деб айтиш мумкин.

Логографлар нутқ матнларини тузувчи ёки ёзиб берувчи кишилар әди. Синегорлар ҳам ёзиб, ҳам ҳимоя қилган бўлсалар, логографлар кўпроқ ёзиб бериш билан шугулланардилар. Бироқ бу уларнинг шахсан нутқ сўзлашларини истисно қилмасди.

Бу касб эгалари ўз ихтисосликлари тақозосига кўра ҳуқуқшунослик, нотиқлик ва нутқ матнини ёзища иқтидорли кишилар бўлганлар. Чунки улар қонуншунос

мутахассис, таъсирчан, мантиқий изчилини ва ишонтирувчи нутқларнинг ёзувчиси, ўрни келганда нотиқ сифатида ўз ҳимояларидағи кишиларни кенг омма олдида, демократик суд олдида оқлаб чиқишилари керак эди. Забардаст нотиқлар нутқига ўрганиб қолган афиналиклар ва суд ҳайъати олдида бу ишни бажариш жуда мушкул бўлган. Шунинг учун ҳам логография билан энг билимдон, зеҳни ўткир, тадбиркор кишиларгина шугулланганлар. Шуниси ҳам борки, логография билан муваффақиятли шугулланиб келган кишиларнинг кўпчилиги бора-бора ё йирик давлат арбоби даражасига кўтарилиган ё яхшигина бадиий ижодкор-ёзувчи бўлиб етишган.¹

Юнонистон - жаҳон нотиқлик санъатининг йирик намояндаларини етказиб берди. Перикл, Лисий, Демосфен, Аристотель ана шулар жумласидандир.

Перикл йирик сиёсий арбобгина бўлиб қолмай, кўзга кўринган нотиқ ҳам эди. Перикл нутқларининг бирорта матни ҳам бизга қадар етиб келмаган. Лекин унинг уста, кўзга кўринган нотиқ бўлганлиги ҳақида грек тарихчisi Фукидид маълумот беради. Перикл нутқи фикрнинг чуқурлиги, шаклнинг соддалиги, самимийлиги билан, тингловчилар руҳиятини эътиборга олганлиги билан характерланарди.²

Эрамиздан олдинги V аср охири ва IV аср бошларида яшаб ўтган таникли суд нотиқларидан бири Лисий эди. У уста логограф ҳам бўлиб, ўз ҳимоясидағи айбланувчиларга нутқ матнини ёзиб берарди. Лисийнинг нотиқлигига хос хусусиятлардан бири ҳамма нотиқлар учун зарур бўлган усул-фикрни янгича шаклга солишини жуда осон эгаллаганлигидир. У гапириши лозим бўлган кишининг характеристикини, ижтимоий аҳволини жуда ҳам аниқ тасвирлаб берувчи нутқ матнини ишлаб чиқишига уста эдикӣ, бу нутқ фақат ўша сўзловчигагина хос бўларди.

Лисийнинг нотиқ сифатидаги иккинчи хусусияти, ҳикоячилик санъатини эгаллаб олганлигидир. У ҳар қандай воқеликни содда, жонли, қизиқарли шаклда ҳикоя қилишга

¹ С.Иномхўжаев. Нотиқлик санъати асослари. -Т.: 1982. 66-67-бетлар.

² Б.Үрринбоев А.Солиев. Нотиқлик маҳорати. -Т.: 1984. 17-бет.

уста эди. Унинг нотиқлик санъатидаги учинчи хусусият услубидаги аниқлик, соддалик ва табиийлик эди.¹

Қадимги Юноистоннинг буюк нотиқларидан яна бири Демосфенdir. Демосфен эрамизгача 384 - йилда туғилиб, 322 - йилда вафот этган. У дастлаб узини ҳимоя қилувчи суд нотиги сифатида танилган. Кейинчалик у логографлик қиласи.

Демосфен нотиқлик санъатини ўрганиш учун жуда кўп вақт сарфлайди. Унда жисмоний камчиликлар мавжуд эди, овози паст ва диксияси ёмон бўлган, кифти асабий равишда титраб турган. Маълумотларга қараганда Демосфен овозини ўстириш учун оғзига майдо тошларни солиб, дengiz қирғоғида нутқ сўзларди ва тўлқин шовқин - суронини босиб кетишга ҳаракат қиласи. Кифтнинг титрашидан қутулиш учун шифтта қилични шундай илдирадики, унинг ўткир учи кифтга яқин турари ва кифти титрагудек бўлса, қиличнинг учи тегиб оғритарди. Шу йусинда олиб борилган узлуксиз машқлар Демосфенга жисмоний камчиликларни бартараф қилишга имкон берган. Тинимсиз меҳнат туфайли у машҳур нотиқ булиб етишди.

Демосфен нутқи унинг характерини акс эттирувчи ойна эди. Ундаги кучли ватанпарварлик туйгуси нутқларида ўз ифодасини топарди.

Демосфендан кейин ўзининг нотиқлик таланти билан ном чиқарган Аристотель эрамиздан олдинги 335 йилда нотиқлик санъати назарияси - «Риторика» асарини яратди.

Бу асар уч қисмдан иборат:

1. Нутқ хизмат қилиши лозим бўлган тамойиллар таҳдили.

2. Нотиқ учун зарур бўлган шахсий хусусият ва қобилият.

3. Нотиқ нутқида қўлланиладиган нутқ техникаси, нутқ усуслари.

Аристотель нутқ услубига алоҳида эътибор беради. Аристотельнинг нотиқ услуби ҳақидаги фикрлари ҳозирги кунда ҳам ўз аҳамиятини йўқоттан эмас. У нотиқ нутқи услубининг лаёқатлилиги, унинг аниқлиги билан белги-

¹ Б.Уринбоев А.Солиев. Нотиқлик маҳорати. -Т.: 1984. 18 – бет.

ланади, деб жуда тўғри қўрсатади. Агар нутқ аниқ бўлмаса, нотиқ ўз мақсадига эриша олмайди, тингловчиларга кераклича таъсир этолмайди. Таниқли файласуф, айрим нотиқлар нутқида эпитет, ўхшатиш, метафора ва бошқаларнинг үринсиз қўлланишини қоралайди ва уларни тўғри қўллай билиш нутқнинг таъсирчанлигини оширишда муҳим аҳамиятта эга эканлигини айтади.¹

Рим нотиқлик санъати юонон нотиқлик санъатининг давоми сифатида юзага келди. Римдаги иқтисодий ва сиёсий усишнинг характери нотиқлик санъатининг янги типини яратди.

Юнонистонда бўлганидек, Римда ҳам нотиқликнинг, асосан, уч турини қўрсатиш мумкин: суд нотиқлиги - оқловчи ва қораловчи, сиёсий нотиқлик, мақтов нотиқлиги. Булардан ташқари, Юнонистонда бўлганидек, нотиқлик санъатини ўқитиши учун хизмат қилувчи ўқув - машқ нотиқлиги ҳам мавжуд эди.

Римда урушнинг кучайиб кетганлиги ҳарбий саркардалар нутқининг ривожланишига ҳам имкон берди.

Римлик нотиқлардан бири эрамиздан илгари III - II асрларда яшаб ўтган давлат арбобларидан Марк Партиус Като ёки Катондир. Катон нотиқ сифатида нутқ санъати назарияси ва амалиёти масалалари билан маҳсус шугулланган.

Кейинчалик Римда aka-ука Тиберий ва Кай Гракх, Марк Антоний, Марк Туллий Цицерон қаби таниқли қатор нотиқлар етишиб чиқадики, булар ичидаги буюк ва сўзамоли нотиқ Цицерон эди. Цицерон ва Демосфен қадимги нотиқларнинг энг буюклари эди. Демосфен кўпроқ үзининг сиёсий нотиқлиги билан шуҳрат тоғган бўлса, Цицерон суд нотиқлиги билан танилди. Албатта, Цицерон нутқлари сиёсий жиҳатдан ҳам кучли эди. Римда, умуман, сиёсий томонни четлаб ўтган бирорта ҳам яхши нотиқ бўлмаган.

Цицерон тимсолида нотиқлик санъатининг назарияси ҳаёт тажрибаси ва назарияси билан муваффақиятли равища қўшиб олиб борилди. У нотиқлик санъати назариясининг айрим томонларини ишлаб чиқибгина

¹ Б. Үрингбоев А. Солиев. Нотиқлик маҳорати. -Т.: 1984. 19 - бет.

қолмай, ўз нотиқлик чиқишилари билан буни тажрибада исбот этди. Цицерон нутқининг муваффақиятли чиқиши учун нотиқ қўйидагиларга алоҳида эътибор берни лозимлигини курсатади:

1. Нотиқнинг ўзига ишончи мустаҳкам бўлиши керак. Бунинг учун эса нотиқ ўз нутқида олга суриладиган фикрга тўла ишонч ҳосил қилиши лозим.

2. Нутқ тўлиқ исботли далилларга эга бўлиши керак.

3. Материални тўплаш нутққа тайёргарликнинг асосицир.

4. Материални тўгри жойлаштириш-экспозицияга алоҳида эътибор бериш лозим. Жойлаштириш шундай бўлсинки, у материални бутунлай ўзлаштириб олишга енгиллик яратсин. Бунинг учун эса нутқни аниқ қисмларга бўлиш лозим.

5. Ҳар қандай соҳада ҳам нутқнинг муваффақиятини билиш ҳал этади. Агар нотиқ ўз нутқи қаратилган соҳани яхши билмаса, у қанчалик санъаткор бўлмасин, ўз тингло чисини жалб этолмайди.

І. Цицероннинг нотиқлик санъати назарияси ва тар а оид учта асари маълум: «Нотиқлик ҳақида», «F» ва «Брут» (ёки «Таниқли нотиқлар ҳақида»).¹

им нотиқлик санъатининг буюк назариётчиларидан ~~жинтилиандир~~. Марк Фабий Квинтилиан нотиқлик ~~жинтилиандир~~ йирик нотиқ ва назариётчи сифатида шуҳрат ~~жинтилиандир~~. Унинг «Нотиқ билими ҳақида» номли асари ~~жинтилиандир~~. Квинтилиан Цицерон ва бошқа Рим нотиқлари ~~жинтилиандир~~ қўшилган ҳолда, ҳамма нотиқ биринчи навбатда ~~жинтилиандир~~ булиши лозимлигини айтади. Шунингдек, у нотиқ ~~жинтилиандир~~ олижаноб булиши лозим, бусиз ҳеч қачон ~~жинтилиандир~~ нотиқ даражасига кўтарила олмайди, деб билади.

Квинтилиан Римдаги нотиқлик мактабининг асосчиси қисобланади. Унгача нотиқлик билимини бериш хусусий мактабларда амалга оширилган.

Умуман қадимги Юнонистон ва Римнинг нотиқлик санъати тажрибалари ўрта аср ва кейинги давр нотиқларининг вужудга келишида муҳим роль ўйнайди.

¹ Б.Ўрибоев А.Солиев. Нотиқлик маҳорати. -Т.: 1984. 22 – бет.

Ўрта Осиё халқлари, жумладан, ўзбек халқи ҳам қадимдан сўзга чечан, бадиий дидли кишиларни қадрлаб келган. Ўша даврда нотиқлик санъати - **воизлик**, нотиқлар - **воиз**, нутқ эса **ваъз** деб аталган.

Ўрта Осиё халқлари, хусусан, IX-XV асрларда дунё маданияти тараққиётининг энг олдинги, етакчи сафларида туриш даражасига кутарила олди. Ўрта аср фани, маданияти Хоразмий, Фаргоний, Форобий, Ибн Сино, Беруний, Қошгарий, Жомий, Навоий, Бобур каби улуг сиймоларнинг номлари билан характерланади.

Бу мутафаккир, шоир, санъаткорлар яшаган давр Шарқ тарихида **Ўйғониш даври** деб аталди. Бу даврда маданият, санъат, илм - фан равнақ топди. Фан ва маданият таргиботчилари - воизлар етишиб чиқди. Воизликни қадрловчи фикрлар вужудга келди.¹

Кайковуснинг XI аср Шарқ педагогикаси тарихида гоят қимматли асарлар қаторида турувчи «Қобуснома»сида ҳам нотиқлик шарҳлари учун алоҳида боб ажратилганлиги бу санъатта бўлган, унинг санъаткорига бўлган қизиқишининг орта борганлигини кўрсатади. «Қобуснома»нинг «Сухандонлик билан баланд мартабага эга бўлиш ҳақида» деб номланган еттинчи бобида ва ҳунарни эгаллашга бағишлиланган олтинчи бобида нотиқлик сирларига доир билдирилган мулоҳазалар нафақат ўша даврда, балки ҳозирда ҳам катта аҳамиятта эга.

Кайковус ҳамма ҳунарлар ичида сўз ҳунари-нотиқликни аъло деб билади. У нотиқликни **эгаллашни** йўли, биринчидан, «тинимсиз меҳнат, ўрганишдир»,

Иккинчидан, -нутқинг гўзал бўлсин, - дейди. «Су икки томони бордир: бири гўзал томони, иккинчиси ху томонидир. Халқ олдида гапирадиган сўзинг гўзал бўлси, бу сўзни халқ қабул қиласин».

Учинчидан, ҳар бир фикрни ифодалашда тингловчи қалбига тўғри йўл топа билиш, шаклга эътибор бериш масаласи.

Туртинчидан, ҳар бир сўз тўғри ва асосли бўлмоғи лозимлигини уқтиради.

¹ Б.Үринбоев ва б. Ўша аср. 24 – бет.

Бешинчидан, ҳар бир нутқ маълум илмий асосга эга бўлсагина, таъсирчан бўлади. Яъни нутқ қаратилган предметни яхши ўрганиб чиқиши лозимлигини таъкидлаб: «Билмаган илмдан гапирмагил... Билмаган илм маърифатни биламан деб, даъво қилсанг ҳеч нарса ҳосил бўлмайди ва беҳуда заҳмат чекасан», - дейди... Нутқни эгаллашдан мақсад ҳалқ дилига йўл топа билишдир, деб билади муаллиф ва «агар кўнгилларга севимли бўлишни истасанг, ҳалойиқнинг мақсадини сўзла», - дейди.¹

Умуман мусулмон шарқи маданиятининг салмоқли зарварақларини ташкил этувчи нотиқлик санъати тарихига оид талайгина манбалар бор бўлса-да, улардан ҳеч бири Алишер Навоий қолдирган мерос каби қимматли ва бой эмас.

Алишер Навоий ўз даврининг буюк мутафаккири, сўз устаси бўлиш билан бирга кишиларга яхши сўз билан таъсир эта билиш санъатини жуда ҳам қадрловчи, улуғловчи, бундай санъат усталарига эътибор қилиб, эҳтиром кўрсатувчи бир шахс эди. Навоий омма ўртасида яхши нутқнинг таъсири ва тарбиясини ҳам чуқур ҳис этади. Нотиқликдаги яхши ва ёмон томонларни кўра билиш ва уларни фарқлай олишга чақиради:

Тўтию шорик агар нотиқдуурур,

Ҳар бирига ўзга бир мантиқдуурур.

Алишер Навоий «Маҳбуб ул-қулуб» номли фалсафий асарининг 24-фаслини «Насиҳат аҳли ва воизлар зикрида» деб атайди ва бунда воизлик санъатига, ваъзга, воизга ўз муносабатини билдиради.²

Навоий воиз қандай киши бўлиши кераклиги ҳақида шундай фикр юритади: «Воиз Ҳақ сўзни тарғиб қилиши, Пайгамбар сўзидан четта чиқмаслиги керак, энг аввал унинг ўзи Ҳақ ва пайгамбар йўлига кириши, сўнгра эса насиҳат билан элни ҳам шу йўлга солиши лозим. Ўзи юрмаган йўлга элни бошламоқ - мусофирини йўлдан адаштириб биёбонга ташламоқ ва сахрода уни йўқотмоқдир. Ўзи мастнинг элни ҳушёрликка чақириши - уйқучи кишининг одамларни бедорликка даъват этганига

¹ Б.Үрринбоев ва б. Ўша асар.. 28-29- бетлар.

² Б.Үрринбоев ва б. Ўша асар. 31-бет.

үхшаш бир нарсадир». Демак, воиз, аввало, ўзи шариат ва тариқат йўлига кирган нотиқ бўлиши керак экан.

Навоий наздида, «Ваъзхон шундай бўлиши керакки, унинг мажлисига буш кирган одам тўлиб чиқсин, тўла кирган одам эса енгил тортиб, холи қайтсин. Воиз олим ва ҳалол иш кўрувчи бўлса, унинг насиҳатидан четта чиққанлар гуноҳкор бўлади. Агар у бошқаларга буюрса-ю, ўзи қилмаса, унинг сўзлари ҳеч кимга таъсир этмайди ва фойда келтирмайди. Воиз билимдон, ҳалол иш кўрувчи, сидку садоқат билан фаолият кўрсатувчи шахс бўлиши билан бирга, халқнинг руҳиятини яхши биладиган, халқнинг дарди билан яшайдиган бўлиши керак. Ана шундагина унинг ваъзига юрак-багри гам-аламга, дарду ташвишларга тўлиб кирган киши дардларидан фориг бўлиб, кўнгли бушаб, енгил тортиб чиқади. Қалбида маънавий руҳий бўшлиқ бўлган одам эса бундай воизнинг суҳбатидан олам - олам маънавий завқ олиб, кўнгли, шуури фикрий нурга тўлиб чиқади.

Алишер Навоийнинг муҳлиси, шогирди ва дўсти бўлган Ҳусайн Воиз Кошифий Шарқнинг машҳур алломаларидан бири бўлган. У ахлоқ, тарих, тасаввуф, нужум (астраномия) риёзиёт, фикр соҳаларига доир қирқдан ортиқ асар яратган. Унинг «Футувватномаи сultonий», «Ахлоқи Мұхсыниий», «Жавоҳир ут - тафсир», каби ўнлаб асарлари беш юз йилдан бери шарқона одоб, ва ахлоқ дастури сифатида юртма-юрт, қўлма - қўл ўқиб келинмоқда.

Ҳусайн Воиз Кошифийнинг нутқлари ўзининг жозибадорлиги билан ҳар қандай кишини жалб қила олган. Айтишларича, унинг бундай сўз санъатидаги маҳоратини Алишер Навоий билан бирга Султон Ҳусайн Бойқаро ҳам юксак баҳолаган ва улар ўз асарларини аҳоли ўртасида расмий ижро этиш лозим бўлган пайтларда бу ишга Ҳусайн воизни муносиб кўрганлар. 898 (1492) йил 8 - ноябрь куни буюк шоир, Навоийнинг устози Абдураҳмон Жомийнинг дағн маросимида Алишер Навоий ўзининг багишлов шеърини ўқиб эшилтиришни, шу маросимда

ваъз айтган Ҳусайн воизга топширганлиги бунинг далилидир.¹

Алишер Навоий үзининг «Мажолис ун-нафоис» асарида Ҳўжа Муайяд Меҳнагий, Мавлоно Риёзий, Муин воиз каби яна бир қанча воизлар ҳақида ҳам атрофлича фикр билдиради.

Шунингдек, мумтоз меросимизда ахлоқ-одоб ургатувчи воизнинг ўз одоби ҳақида кўп фикр юритилади. Абу Ҳомид Муҳаммад ибн Муҳаммад ал - Газзолийнинг «Охиратнома» асарида ҳам шундай. Газзолий воизларнинг воизи бўлиб, воизларга дастур ул-амал тариқасида панд-насиҳат айтади. У воизнинг тили – нутқига, воизнинг услубига алоҳида эътибор қаратади: «Мабодо, ваъз ўқитишдан бошқа иложинг қолмаса, икки нарсада эҳтиёт бўл: бирламчи-сўзларинг ортиқча ибора-ю ишоратлар, асли пуч ҳикоятлару маънисиз байтлар ила ясанган, яъники сертакаллуф бўлмасин! Чунки Оллоҳ таоло такаллуф қилувчиларга газаб қиласи, уларни дўст тутмайди. Ҳаддан ташқари сертакаллуфлик воизнинг батамом хароб, қалбан гафлатда эканидан далолат қиласи». Дарҳақиқат, нотиқнинг нутқи асосий мақсадга қаратилган, ҳар қандай ортиқча сўз ва иборалардан холи бўлиши керак. Аксарият нотиқлар нутқларини сертакаллуф, жимжимадор сўз ва иборалар билан безашга ҳаракат қиласидар. Улар нутқларининг чиройли бўлишини истайдилар ва унинг ташқи чиройига зўр берадилар. Аслида эса нутққа чинакам зеб берадиган нарса фикрдир. Воизни эшитимли қилувчи омиллардан бири ҳаётий ва ибратли ҳикоятлар ва байту газаллар билан омихта гапиришдир. Албатта, меъёри иштасаллик лозим.

Такрорлаш учун саволлар

1. Нотиқлар деб кимларга айтилади?
2. Нотиқликнинг қандай кўринишлари бор?
3. Воиз деб кимга айтилади?
4. Нотиқликнинг воизликдан қандай фарқи бор?

¹ Б.Үринбоев А.Солиев. Нотиқлик маҳорати. -Т.: 1984. 34-бет.

НОТИҚЛИКНИНГ ТУРЛАРИ

Нотиқлик маҳорати жуда ҳам қадимий тарихга эга. Бу санъат ғарбда ва шарқда қадимдан ривожланган. Шарқ нотиқларидан Мавлоно Риёзий, Ҳусайн Воиз Кошифий, Муин Воиз, Навоий ва Бобурларнинг нутқлари ва асарлари бунинг ёркин далилидир. Ҳар бир даврда нотиқлик санъатига ўзига хос эътибор қаратилган, нотиқлик санъати ўша даврнинг ғоя ва мағкурасига бўйсундирилган. Шунга қарамасдан, нотиқлик маҳоратини ифодаловчи бир қатор омиллар мавжуд.

Маълумки, ҳар бир киши ўз нутқининг мазмунли ва таъсиран бўлишини, қолаверса, нутқ жараёнидаги ҳолат ҳам нотиқка ўз таъсирини кўрсатади: тингловчиларнинг кам ёки кўплиги, аудиториянинг катта ёки кичиклиги, қатнашувчиларнинг таркиби ва савияси, нотиқнинг тажрибаси ва маҳорати. Қайси касб эгаси бўлишидан қатъий назар ҳар қандай киши ҳам, нотиқлик маҳоратини эгаллаши мумкин. Бунинг учун энг аввало, кучли кизиқиш ва ўз устида узлуксиз, тинимсиз ишлаш керак. Бу ўринда шуни таъкидлаш лозимки, машҳур ва таникли нотиқлар бу мақсад йўлида тинимсиз меҳнат ва машқ қилганлар.

«Нотик» - сўзи араб тилидан олинган бўлиб, у нутқ, мантиқ сўzlари билан ўзакдошdir. Нутқ сўз ва тафаккурнинг узвий боғлиқлигига намоён бўлади. Нотик бошқа одамлар хулқ-авторига ва фаолиятига таъсир кўрсатиш мақсадида уларга сўз орқали таъсир этувчи шахсdir. Нотиқнинг тафаккури ва онги узвий боғлиқdir. Нотик мантиқий фикрлаш хусусиятига эга бўлган ҳамда идроки, хотираси, ўй-хаёллари, иродаси, сўзамоллиги, гапга чечанлиги, билимлилиги билан оддий одамлардан фарқланувчи шахсdir.

«Аскиячи» - арабча «закий» сўзидан олинган бўлиб, «хозиржавоб, ўткир зеҳнли» деган маъноларни англаатади. Жамоат олдида маълум мавзу бўйича бадний сўзда ўз қобилиятини намоён қилиб тортишувчи киши - аскиячи дейилади. Аскиядга икки ва ундан ортиқ киши ёки маълум гурӯҳлар ўзаро мусобақалашади. Аскиячи хозиржавоб бўлиши, кўп маъноли кулгили, таъсирили ва қочиримли сўзлаши лозим. У она тилининг бойликларини яхши билиши, киноя, қочирим, ҳазил, масхара, кесатик, ўхшатиш, муболаға каби санъатлардан унумли фойдаланиши лозим. Аскиячининг вазифаси кулги орқали одамларга завқ бериш,

уларнинг билими ва ақлини чархлаш, ҳозиржавоб бўлишга ўргатишдир.

Аскиячиликнинг турлари кўп: пайров, сафсата, ўхшатдим, қоғия, лақаб ва бошқалар.

Ўзбек халқи қадимдан тўй, сайил ва байрамларда аския бўйича мусобақалар ўтказиб келади. Аскиячилик ривожига Дехқон Шерназаров, Эрка қори Каримов, Юсуфжон Шакаржонов, Ака Бухор Зокиров, Ижроқумбува Аминов, Абдулҳай маҳсум Қозоков ва бошқалар катта ҳисса қўшишган.

«Бадиҳагўй» - арабча бадиҳа - гўй - сўзловчи сўзларидан олинган бўлиб, ҳозиржавоб ва чечан кишиларнинг шеърий йўсинда бирданига сўз, шеър ёки қўшиқ айтишидир. Бадиҳагўй асарни ижод этади ёки унга маълум бир ўзгартишлар киритади. Бадиҳа эркин тарзда ижод ва ижро этилган асар бўлиб, бадиҳагўйдан катта тажриба ва юксак иқтидор талааб этади. Бадиҳагўйликнинг тур ва жанрлари кўп бўлиб, энг кўп тарқалгани баҳшичилиқдир. Пўлкан, Эргаш Жуманбул ўғли, Фозил Йўлдош ўғли, Ислом шоир ва бошқалар баҳшилик (бадиҳагўйлик) санъатига муносиб ҳисса қўшганлар.

«Воизлик» - арабча «ваъз» сўзидан («даъват», «хитоб» маъносида) олинган бўлиб, исломда одамларни эзгуликка ва яхшиликка чакиравчи, жамоат олдида нутқ сўзловчи шахсни англатади. Ал Басрий исломдаги ilk воиз бўлган. Таниқли олимлар, шоирлар, дин арбоблари ҳам воизлик санъатига муносиб ҳисса қўшишган. Айниқса, Мавлоно Риёзий, Ҳусайн Воиз Кошифий, Жалолиддин Румий ва бошқалар ўз нутқлари билан машҳур бўлганлар. Воиз хушвоноз, ишонтирадиган, таъсирчан гапирадиган, талаффузи аниқ ва равшан, юксак билимли ва маданиятли, бир неча тилларни эгаллаган шахс бўлган. Кейинчалик воизликнинг аҳамияти ошиб нафақат исломий маъруза, балки сиёсий ва халқаро аҳволга бағишлиланган маъруза, баҳс ва мунозарани қамраб олган. Жума намози ва ҳайит кунларида воизлар халқ олдида нутқ сўзлаганлар. Воизлик санъатининг ривожланиши натижасида унинг янги тармоқлари вужудга келган: хатиблик - диний ва сиёсий маъруза; музаккирик - диний-ахлоқий масалалар; дабирлик - давлат миқиёсидаги ёзишмалар ва уни ўқиб бериш.

«Маддоҳ» - арабча «мадҳ» («мақтов», «таъриф») сўзидан олинган бўлиб, бирор шахс ёки нарса, воқеани мадҳ этувчиидир. У

асосан диний мавзуларда, хусусан, Мұхаммад пайғамбар ва чориёрларнинг ҳәёти ҳамда хислатлари ҳақидаги маълумотлардан бадиҳа тарзида айтувчи ҳисобланади. Диний байтларни, ғазалларни ва ҳикояларни баланд овозда кенг ҳалқ оммаси олдида равон ва ифодали айтиш маддоҳнинг асосий вазифаси ҳисобланади. Демак, маддоҳлик диний айтиш йўли бўлиб ижроидан нотиқлик маҳоратини талаб қилган. Кейинчалик маддоҳ сўзининг яна бир маъноси юзага келди. Бирор шахсни, хислатни ёки ғояни ҳаддан ортиқ мақтovчи ҳам маддоҳ деб юритила бошлади.

«Суҳандон» - форсча «суҳан» («сўз») сўзидан олинган бўлиб, сўзга чечан, сўз устасини англатади. Суҳандон турли мавзуларда нутқ сўзлайдиган маданиятли ва маърифатли шахс ҳисобланади. Унинг аудиторияси ниҳоятда катта: турли байрамларда кенг ҳалқ оммаси олдида, маросим ва тадбирларда, анжуман ва кечаларда ва бошқаларда.

Мумтоз адабий меросимизнинг билимдони Нусратулло Атоуллоҳ ўғли Жумахўжа сухандонликнинг ўтмишдаги ва ҳозирдаги аҳволоти борасида фикр юритиб, унинг расмий ва норасмий давраларида талаблари билан боғлиқ мулоҳазаларни илгари суради. «Суҳандонликнинг куйидаги асосий шартлари бор: биринчидан, у маънавий-ахлоқий етук, маърифатли зот бўлсин, иккинчидан - ёши улугроқ, ҳаётий тажриба кўрган бўлсин, учинчидан - эл танийдиган ва элни танийдиган бўлсин, тўртинчидан - нутқий камчилиги бўлмасин, бешинчидан - кўриниши кўркам, нуроний ва ёқимтой бўлсин, олтинчидан - давра ташкилотчиси ёки тўй-маърака эгасига яқин бўлсин, еттинчидан - давра қатнашчилари, хонадон ахли, меҳмону мезbonларнинг асосий қисмини танийдиган киши бўлсин».

«Диктор» - лотинча «диктор» («сўзловчи») сўзидан олинган бўлиб, радио ва телевидениеда нутқ сўзловчи шахсадир. Диктор сўзи икки маънода қўлланилади: 1) телекамера ёки микрофонда тайёр матнни хуш овозда ифодали ва тўғри талаффузда ўқиб берувчи шахс; 2) матнга қарамасдан уни равон ва чиройли гапиравчи шахс.

Дикторнинг иккинчи маъносига хос хислатга эга бўлган нотиқлар диктор сўзини сухандоннинг синоними сифатида ишлатишади. Нотиқлик санъатининг назарий ва амалий масалалари бўйича таниқли мутахассис Раҳимбой Жуманиёзов «Нутқий маҳорат» қўлланмасида бу ҳақда шундай ёзади: «Бошқа тилдан ўзлашган сўзлар кўпинча, маъно торайиши ва кенгайиши билан

кириб келади. Сухандон сўзи ҳозир диктор маъносида қўлланимокда. Аслида, нотўғри. Диктор бўлиш мумкин, сухандон бўлолмаслик мумкин. Диктор тайёр матнни ёқимли талаффуз, дикция билан ифодали тарзда ўқиб берувчидир. Дикторларни сухандонлик маҳоратини эгаллаганлари ҳам борлигини инкор этиб бўлмайди. Диктор матн билан қаттиқ боғланса, сухандон матн билан эркин муносабатда бўлади. Нутқий малакага, кўникмага эга бўлмаган диктор тилимизнинг соғлигини ҳам, бойлигини ҳам намойиш эта олмайди. Чинакам диктор нутқ техникиси, яъни овоз, нафас, интонация, пауза, оҳанг каби нутқнинг ифода воситалари, машқий жараён билан чегараланиб қолмасдан, балки нутқий маҳорат, нутқий фаолият қирраларини эгаллашга интилиши, назарий маълумот ва амалий машгулотни уйғунлаштира олиши зарур. Ифодали ўқиши, матн мазмунини етказишига дахлдор техник ва назарий воситаларни билиш ва унга амал қилиш ҳар доим аҳамиятлидир. Диктор юқоридагиларни кундалик машқ орқали шакллантириб боради» (20-бет).

Қиссаҳон (қиссагўй) - афсона, эртак, достонларни равон ва ифодали ўқийдиган киши бўлиб, турли тадбирларда, тўй ва байрамларда ўз маҳоратини намойиш қиласди.

«Қироатхон» - таъсирчан, ифодали ўқийдиган шахс бўлиб, қиссаҳон унинг бир кўрининишидир. Қироат мусиқийликка мойиллиги билан ажralиб туради. Арабий қироат талаби, тажвид қоидалари билан ўқилувчи Қуръон тиловати бунга мисолдир. Қуръон ёддан ёки манбанинг ўзидан ўқилади ҳамда қироатга риоя этилади. Таниқли сўз санъаткорларнинг номи билан аталувчи навоийхонлик, бобурхонлик, бедилхонлик кабилар қироатхонликка мисол бўла олади.

НУТҚИЙ САНЪАТЛАР

ОҒЗАКИ НУТҚ

1. Войзлик
2. Нотиқлик
3. Сухандонлик
4. Қиссагўйлик
5. Ровийлик
6. Бадиҳагўйлик
7. Аскиячилик
8. Маддоҳлик ва ҳоказо.

ЁЗМА НУТҚ

1. Дабирлик
2. Котиблиқ
3. Муншийлик
(мирзолик) ва ҳоказо.

Адабиётлар

1. И.А.Каримов. «Барқамол авлод орзуси». Т.: 2000.
2. Алишер Навоий. «Маҳбуб ул - қулуб». Т. 1983.
3. А.Ф.Мұхиддинов. «Ўқув жараёнида нутқ ғаолияти» Т.: 1995.
4. А.Аҳмедов. «Нотиқлик санъати». Т.: 1967.
5. А.Ортиқов, А.Ортиқов. «Нутқ маданияти ва нотиқлик санъати». Т.: 2002.
6. Б.Үринбоев, А.Солиев. «Нотиқлик маҳорати». Т.: 1984
7. В.Г.Костаморов. «Культура речи и стиль». М.: 1960.
8. Ё.Тожиев, Н.Ҳасанова, Ҳ.Тожиматов, О.Йўлдошева. «Ўзбек нутқи маданияти ва услубият асослари». Т.: 1994.
9. Кайковус. «Қобусном»а. Т.: 1994.
10. К.Назаров, С.Усмонов, Қ.Тоҳиров «Юристнинг нутқ маданияти». Т.: 2003.
11. М.Миртоҷиев, Н.Маҳмудов. «Тил ва маданият». Т.: 1992.
12. Н.Маҳмудов. «Маърифат манзиллари». Т.: 1999.
13. Н.Жумахўжа. «Истиқдол ва она тилимиз». Т.: 1998.
14. О.Ҳакимова «Мантиқ ва нутқ маданияти». Т.: 2002
15. Р.Қўнгурров, Э.Бегматов, Ё.Тожиев. «Нутқ маданияти ва услубият асослари». Т.: 1992.
16. Р.Расулов. «Истиқдол талаби», Гулистон жур. № 2. Т.: 1994.
17. Р.Расулов. «Тил ҳаётимиз кўзгуси». Нафосат жур. № 2. Т.: 1993.
18. Р.Расулов. «Ўзбек тили феълларининг маъно тузилиши». Т.: 2001.
19. Р.Расулов, И.Умиров. «Ўзбек тили тасвирий ифодаларининг изоҳли лугати». Т.: 1997.
20. С.Иномхўжаев. «Нотиқлик санъати асослари». Т.: 1982.
21. С.Мўмин. «Сўзлашиб санъати». Т.: 1997.
22. Т.Құдратов «Нутқ маданияти асослари». Т.: 1993.
23. Э.Бегматов, А.Бобоева, М.Асомиддинова, Б.Умурқулов. «Ўзбек нутқи маданияти очерклари». Т.: 1988.
24. Қ.Мўйдинов, К.Ваҳобова. «Нутқ маданияти» (маъруза матилари) 2001.
25. Н.Ҳусанов. «Ўқитувчининг нутқ маданияти» (маъруза матни). 2003.
26. Р.Жуманиёзов. «Нуткий маҳорат». Т.: Адолат, 2005.

ҒАРБ МАДАНИЯТИ ТАРИХИДА НОТИҚЛИК САНЬАТИНИНГ ЎРНИ

Саволлар:

1. Нотиқлик санъати дастлаб қаерда шаклланган?
2. Нотиқликнинг санъат даражасига кўтарилишига нима сабаб бўлган?
3. Нотиқлик ҳақида илк бор маълумот берган асар қайси?
4. Нотиқликнинг қандай турлари бўлган?
5. Қадимги Юнон ва Рим нотиқлиги ҳақида нималар биласиз?

Топшириқлар

1. Қуйидаги Юнон нотиклари, уларнинг нотиқлик санъати, ҳаёти ва ижоди ҳақида адабиётлардан фойдаланиб, маълумот топинг.

Перикл¹. Перикл эрамиздан олдинги V асрнинг бошларида (500-429) яшаган таниқли нотиклардан биридир.

Эрамиздан олдинги V асрнинг 50-30 йиллар Афина давлатининг сиёсий-иқтисодий ва маданий жиҳатдан ривожланиш даври бўлди. Бу пайтда давлат бошида Перикл турган бўлиб, шунга кўра айни давр тарихда «Перикл асли» деб ҳам юритилади... Перикл асли ҳарбий қўмондон бўлиб, Эрон-Юнон урушида катта маҳорат қўрсатади ва шу туфайли ватандошларининг эътиборини қозонади... Перикл ўз даврининг давлат арбобигина эмас, йирик нотиги ҳам бўлган.

¹ Ушбу бўлимдаги Юнон нотиклари ва улар ҳақидаги маълумотлар С.Иномхўжаевнинг «Нотиқлик санъати асослари». Т.: 1982. китобидан олинганд.

Клеон. Клеон Переклдан кейинги машхур нотиқ бўлиб, нафақат Афинада, балки ундан ташқарида ҳам сўзга чечанлиги билан шуҳрат қозонган...

Клеон ўз нотиқлик мактаби билан мавжуд расмий нотиқлик услубларига қақшатқич зарба берган ва бунга ўз замондошларини ҳам эргаштира олган.

Лисий. Лисий қадимги Юнон нотиқлик санъатининг жаҳоншумул мавқеига эга бўлган намояндаларидан биридир. Унинг отаси Сицилияning Сирақуз шаҳридан бўлиб, жуда йирик дастмоядор, саноат корхоналарининг эгаси эди... Лисий тахминан эрамиздан олдинги 459 - 380 йиллар орасида яшаб, 80 йилча умр кўрган. У 444 - йилда жанубий Италиядаги Сибарис шаҳрига боради ва у ерда Сирақузлик Тисийдан нотиқлик санъатини ўргана бошлайди... Лисий логографлик билан шугулланниб, ўз маҳорати билан тингловчиларни, суд ҳайъатини маҳлиё этиб, уларнинг меҳру муҳаббатини қозонган.

Исократ (эрамиздан олдинги 436-338 йиллар). Исократ нотиқлик, фалсафа ва ҳуқуқшунослик соҳасида ўз замонасининг энг йирик фан ва маданият арбоблари бўлган Суқрот, Тисий, Горгийлардан таълим олди. У 329 - йили Афинада нотиқлик мактабини очади ва унга қарийб 40 йил давомида раҳбарлик қиласди.

Исократнинг нотиқлик мактаби жуда катта шуҳрат қозонади. Шунинг учун ҳам бу мактабга фақат Афиналиклар эмас, балки Юнонистоннинг барча бурчакларидан ўқувчилар оқиб кела бошлайдилар.

Исей (эрамиздан олдинги тахминан 420-350 йиллар). Исейнинг логографик ва нотиқлик фаолиятига хос бўлган хусусиятлардан бири унинг сўзга чечанлигиdir. У ўзининг ана шу иқтидори, нотиқлик маҳорати туфайли қулига тушган ҳар қандай ишни ўзи ва мижози фойдасига ҳал қила оларди. У, асосан, логографлик билан шугулланган. Исей логографлик ва нотиқлика Лисий ва Исократ каби машҳур сўз усталарига эргашди.

Ликург. Ликург ўз даврининг гуманист нотиги, давлат, фан ва маданият арбоби. Унинг ёши Демосфендан сал улугроқ булиб, 324-йили вафот эттан.

Ликург нотиқлик санъати асослари, фалсафа ва юриспруденция бўйича Платон ва Исократдан маҳсус таълим олган. Истеъоди ва нотиқлик маҳорати туфайли Афина давлатининг энг йирик нотиқлари ва арблори сафида жой олган. Эрамиздан одинги 388-йилдан бошлаб, у давлат хазиначиси сифатида (ҳозирги тушунчада молия министри) Афина иқтисодини бошқаради.

Демосфен (тахминан 384-322 йиллар). Демосфен давлат арбоби ва ўз даврининг йирик нотигидир. Тарихчиларнинг маълумотларига кўра Демосфен фалсафани Платондан, нотиқлик асосларини Исократдан ўрганганди.

Демосфен Афина нотиқлигининг йирик намояндаси булиб, унинг техник машқлари, нутқ талқини жараёнидаги усуллари нутқ устида ишлаш услублари, тил имкониятларидан фойдаланиш ва нотиқликнинг талқиний ифода воситаларини моҳирона ишга sola олиши каби фазилатлари ҳозирги давр нотиқлиги учун ҳам амалий ва назарий аҳамиятта эга.

Эсхин (эрамиздан аввалги 390 - йилда туғилган). Эсхин камбагал оиласдан бўлгани туфайли нотиқлик санъати асосларини маҳсус мактабларда эмас, мустақил ўрганишга мажбур бўлган.

Эсхин логографиядан дарс олмаганлиги учун унинг нутқ текстлари, тили композицион жаҳатдан унча аҳамият касб этмади. Аммо Эсхиннинг нотиқлик фаолиятида талаффузининг бурролиги, театр декламациясига усталиги алоҳида ўрин тутади. У ўзининг юксак савияли, таъсиричан декламацияси билан тингловчилар қалбини ром эттан ва шунинг учун ҳам бўлса керак, «Аттикалик ўнта нотиқ қонуни» га киритилган.

Гиперид (эрамиздан олдинги 389 - йилда туғилган). Гиперид ўрта ҳол оиласда тутилган. Гиперид Демосфеннинг замондоши булиб, айrim тарихчилар нотиқлик борасида уни Демосфендан ҳам юқори қўядилар.

Гиперид нотиқликни Исократдан, фалсафани Платондан ўрганган. Ўз даврида Афина давлатининг йирик сиёсий арбоби ва нотиги бўлиб танилган.

Гиперид нотиқ сифатида жуда соддаликка ва аниқликка интилган.

Динарх (эрамиздан олдинги 361-360- йилларда ту²илган). Динарх Афина нотиқлик санъати тушкунлик сари юз туттан даврнинг намояндадаридан биридир.

Динарх фалсафа бўйича Аристотельдан, нотиқлик ва юриспруденциядан эса Феофрастдан таҳсил олган. Амалда эса нотиқликда Лисий, Гиперид ва Демосфенга эргашди.

Куйидаги Рим нотиқлик санъатининг намояндадари тұғрисида адабиётлардан фойдаланган ҳолда, маълумот топинг.

Рим нотиқлик санъати Юнон нотиқлик санъатининг давоми сифатида юзага келган. Римдаги иқтисодий ва сиёсий үсишнинг характеристикалари санъатининг янги типини яратди.

Римлик нотиқлардан бири эрамиздан илгари III-II асрларда яшаб уттан давлат арбобларидан *Марк Партиус Като* ёки *Катон*дир. Катон нотиқ сифатида нутқ санъати назарияси ва амалиёти масалалари билан махсус шугулланган. Лекин унинг нутқларидан жуда кам қисми бизгача етиб келган.

Катон ўз нутқида қарама-қарши қўйиш усулини жуда уринли қўллади. Унинг нутқида далиллар кучлилигидан ҳеч ким қарши гапира олмасди. Шу билан бирга нутқнинг жонлилиги, масалани қисқача баён қила билиш, қўйилган масалани ёрқин кўрсата билиш учун нутқига нафосат багишларди.¹

Катон нотиқ сифатида шу қадар кучли маҳорат эгаси здики, бу борада унга Цицерон ҳам тан бериб ёзади. «Ҳаммасини янада чиройлироқ, янада нафисроқ қилиб айтиш мумкин, аммо ҳеч нарсани ундан кучлироқ ва жонлироқ қилиб айтиш мумкин эмас». Темперамент билан

¹ Б.Үрінбоев А.Солиев. Нотиқлик маҳорати. -Т.: 1984. . 21 – бет.

сўзлаш борасида Цицерон деярли ҳеч кимга шу қадар юксак баҳо бермайди.

Ака-ука Гракхлар. Ака - ука Гракхлар эрамиздан олдинги II асрда яшаб ўтишган. Акаси **Тиберий** ва укаси **Кай Гракхларнинг нотиқлик** истеъдоди уларнинг гоявий-ижтимоий қарашлари заминида очилди ва шуҳрат қозонди. Улкан давлат арбоблари бўлган ака - ука Гракхлар Италияда ер реформаси учун кураш олиб бордилар.

Хуллас, ака - ука Гракхлар жаҳон нотиқлик санъати тарихида ўзларининг ёрқин дунёқарашига, аниқ идеал ва мустақил ифода услубига эга бўлган сиймолардир. Шунинг учун ҳам улар асрлар оша жаҳон нотиқлик маданиятининг курки бўлиб келяпти.

Марк Антоний (эрамиздан олдинги 143-87 йиллар). Рим нотиқлик санъатининг йирик намоёндаси, давлат арбоби Цицерон ўзининг «Нотиқ ҳақида» номли рисоласида Марк Антонийни ўзи билан тенг кўрган.

Марк Антоний давлат консули ва цензорлик мартабаларида ишлаб, асосан, халқ мажлислари ва сенатда сўзларди. Нотиқ сифатида характерли хусусияти шундаки, у кўпинча аввалдан тайёрланмасдан, экспромт – бадиҳа тарзида нутқ сўзларди.

Цицерон. Марк Туллий Цицерон эрамиздан олдинги 106 йилнинг 3-январида Лация деган кичик шаҳарга қарашли Арпина деган жойда туғилган. У, асосан, суд нотиқлигида шуҳрат қозонган сўз санъаткорларидан биридир. Цицерон эрамиздан олдинги 63-йилда олий лавозимга – консулликка сайланади. Цицерон эрамиздан олдинги 43-йилда 6-декабрдан 7-декабрга ўтар кечаси Антоний кишилари томонидан ўлдирилади. Тарихий маълумотларга кўра Цицерондан 150 та нутқ, қолган бўлиб шундан 58 таси бизгача етиб келган.

Булар:

1. Фалсафа мавзуларида ёзилган 12 та асар.
2. Нотиқлик тарихи ва назариясига оид 7 та рисола.
3. Жами 800 тача мактуб

Цицероннинг ҳаёти, ижоди, фалсафий ва адабий қарашлари, нотиқлик маҳорати ва бу соҳадаги таълимоти ҳозирги кунда ҳам амалий ва назарий аҳамиятта молиқдир.

Цицерон ва Демосфен қадимги нотиқларнинг энг буюклари эди. Демосфен кўпроқ ўзининг сиёсий нотиқлиги билан шуҳрат топган бўлса, Цицерон суд нотиқлиги билан танилди. Албатта, Цицерон нутқлари сиёсий жиҳатдан ҳам кучли эди.¹

Марк Фабий Квинтилиан. Рим нотиқлик санъатининг буюк назариётчиларидан бири Квинтилиандир (35 йилда туғилиб, 96 йилда вафот этган). Унинг «Нотиқ билими ҳақида» номли асари мавжуддир. Квинтилиан Цицерон ва бошқа Рим нотиқлари фикрига қўшилган ҳолда ҳамма нотиқ, биринчи навбатда, билимли бўлиши лозимлигини айтади. Шу билан бирга Квинтилиан ахлоқ принципларини олга суради. У нотиқ ахлоқли, олижаноб бўлиши лозим, бусиз ҳеч қачон ҳақиқий нотиқ даражасига кўтарила олмайди, деб билади.²

Топширик

Гомернинг «Илиада» ва «Одиссея» достонларидан нотиқлик санъати тасвирланган асар қаҳрамонларининг нутқларидан намуна ёзинг.

Адабиётлар

1. С.Иномхўжаев Нотиқлик санъати асослари. Т. 1982.
2. Б.Үринбоев, А.Солиев Нотиқлик маҳорати. Т. 1984.
3. А.Алимұхамедов Антик адабиёт тарихи. Т. 1969.
4. Р.Қўнгурров, Э.Бегматов, Ё.Тожиев Нутқ маданияти ва услубият асослари. Т. 1992.
5. К.Назаров, С.Усмонов, Қ.Тоҳиров Юристнинг нутқ маданияти. Т. 2003.

¹ Қаранг: Б.Үринбоев, А.Солиев. Ўша асар. 22 – бет.

² Қаранг: Б.Үринбоев, А.Солиев. Ўша асар. 24 – бет.

ШАРҚ МАДАНИЯТИ ТАРИХИДА НОТИҚЛИК САНЪАТИНИНГ ЎРНИ

С а в о л а р

1. Ваъз нима? Воиз ким?
2. Шарқ нотиқлиги ҳақида нималар биласиз?
3. Гарб нотиқлиги билан Шарқ нотиқлигининг қандай умумий ва фарқлї томонлари бор?
4. Шарқда нотиқлик ва нутқ маданияти масалалари билан шугулланган олимлардан кимларни биласиз?
5. Нотиқлар қайси жиҳатлари билан воизлардан ажралиб туради?

Топшириқлар

Қуйидаги буюк мутафаккирларнинг нотиқлик санъати ва нутқ маданияти масалаларига бағишланган асарлари ҳақида маълумот топинг.

Абу Наср Форобий. Абу Наср Муҳаммад ибн Муҳаммад ибн Узлуг ибн Тархон Форобий 872-873 - йилларда (260 ҳижрий йилида) Арис суви Сирдарёга қўйиладиган ердаги Фороб деган жойда туғилган. XIII - XIV аср тарихчиларининг гувоҳлик беришича Фороб Шошнинг (Тошкентнинг) шимолрогида жойлашган. Шунингдек, манбаларда Фороб яқинидаги Суткант шаҳри ҳақида ҳам маълумотлар учрайди.¹

Абу Наср Форобий ҳам IX - X асрларда - иқтисодий ва сиёсий зиддиятлар кучайган бир даврда яшаб ижод этди. У илмнинг турли соҳаларини мукаммал билган ва улар ҳақида мустақил фикрлар баён қилган буюк алломадир. Нутқ ва ақл тарбиясига оид илмлар тўғрисида Форобий қимматли фикрлар айтган.

Форобийнинг айтишича, мантиқ шундай бир санъатки, киши нотиқлиқдан адашиб қоладиган бўлса, тўғри фикрлашга олиб келувчи ва ақл ёрдамида бирор хулоса чиқариладиган бўлса, хатоларнинг олдини оловчи

¹ М.М.Хайруллаев. Форобий. -Т.: 1991. З-бет.

нарсаларни ўз ичига олади. Унинг ақлаға муносабати грамматика санъатининг тилга муносабати қабиdir.¹

Абу Али ибн Сино (980–1037). Ўрта аср Шарқининг буюк алломалари орасида машҳур табиб, файласуф, шоир Абу Али ибн Сино алоҳида ўрин тутади. Унинг турли соҳалар билан бирга таълим – тарбия, ахлоқ ва нутқ ҳақида ҳам фикрлари мавжудки, улар билан яқиндан танишиш нотиқлик санъатини мукаммал ўрганишга ёрдам беради. Яхши дўст қайси йўл билан ахлоқий камчилик-ларни тузатишда бошқаларга ёрдам бериши мумкинлиги масаласига ибн Сино алоҳида эътибор беради ва нотиқ қуидагиларга амал қилиши лозим деб билади:

1. Насиҳат (Нутқ - Б.Ў ва А.С) қўупол оҳангда берилиши керак эмас.
2. Суҳбатдошнинг илм даражасини ҳисобга олиш зарур.
3. Насиҳатта (ваъзхонликка) кўп берилмаслик керак, уни ўртоқлик суҳбати тарзида олиб бориш керак.
4. Насиҳатни мулойим оҳангда, ёлғиз олиб бориш керак.
5. Агар таъна қилмоқчи бўлсанг, бошқалар камчилиги билан қиёслаб таъна қил.
6. Агар ўз эътиқодингни айтмоқчи бўлсанг, фақат бир фактга таянма, балки кўп масалалар билан исботла, суҳбатдошингни буни юрагига яқин олишга, шу нарса ҳақида ўйлашга ва ҳақиқатни излашга ишонтир.
7. Агар суҳбатдошинг сенинг гапларингга эътибор билан қулоқ solaёттан бўлса, суҳбатни охиригача давом эттири ва ҳеч нимани сир сақлама, лекин унинг эътиборсизлигини сезсанг, гапни бошқа мавзуга бур.²

Унсурулмаолий Кайковус. Унсурулмаолий Кайковус Каспий денгизининг жанубий қиргогида яшаган Гilon қабиласидандир. У 412 – ҳижрий, 1021-1022 – милодий

¹ Қаранг: Б.Үринбоев, А.Солиев. Ўша аср. 25 – бет.

² Қаранг: Б.Үринбоев, А.Солиев. Ўша аср. 27 – бет.

йилида майда феодал оиласида туғилди. «Қобуснома»ни 475-жижрий, 1082-1083 милодий йилида яратди. Бу ҳақда Кайковус асарида: «Сана 475 да бошладим» - деб маълумот беради. Бу даврда Кайковус 63 ёшда бўлиб, анчагина кексайиб қолган эди, у ўглига: «Писарам, ман пир шудам» - деб ўзининг қариганлигидан маълумот беради ва ўз асари «Қобуснома»ни ўглига багишлайди.

«Қобуснома» 44 бобдан иборат бўлиб, булардан тўрт боби диний характердадир, қолган 40 боби ҳаётий воқеаларни ифода этади.

Кайковус ўз асарида ёшларнинг хулқ - авторига алоҳида эътибор берди. Уларга инсонпарвар бўлишни, ҳалқа ширин муомала қилишни таъкидлади. Шунингдек, дўст ва душманга қандай муносабатда бўлиш каби масалаларни ҳам асарида ёритди.¹

Абу Райхон Беруний. Дунё маданияти ва маънавияти тараққиётига улкан ҳисса қўшган, фан тарихида жуда катта из қолдирган қомусий олимларимиздан яна бири Абу Райхон Муҳаммад ибн Аҳмад ал Берунийдир. Абу Райхон Беруний, У.И.Каримовнинг таъкидлашича, милодий 973 – йилнинг 4 - сентябрیدа (жижрий 362-йил зулхижжа ойининг 2 - кунида) Хоразмнинг қадимий пойтахти Қиятда таваллуд топди. 1009-1017 – йилларда Хоразмшоҳ Абу-л-Аббос Маъмун ибн Маъмун саройида хизмат қилиб, катта обру - эътибор қозонган. 1017 йилда Маҳмуд Газнавий Хоразмни босиб олгандан сўнг Хоразмдаги бир қанча олимлар қатори Беруний ҳам Газнага йўл олишга мажбур бўлди ва умрининг охирига қадар шу ерда ижод қилди.

У ўз давридаги барча фан соҳалари буйича қалам тебратиб, 150 дан ортиқ асар қолдирди. Бизгача етиб келган асарлари орасида «Хронология», «Ҳиндистон», «Геодезия», «Минералогия», «Масъуд қонуни» ҳамда «Сайдана» номи билан машҳур бўлган «Китоб ас-сайдана фи-т-тибб» асарлари тадқиқотчилар томонидан маҳсус ўрганилди ва араб, рус, инглиз, немис ва бошқа тилларга таржима қилиниб, нашр этилди.²

¹ Қаранг: Кайковус Қобуснома. 11, 21 - бетлар.

² А.Нурмонов. Ўзбек тилшунослиги тарихи. -Т.: 2002. 13-14 бет.

Маҳмуд Кошгари. Тилшунослик тарихида Маҳмуд Кошгари салмоқди ўрин эгаллади. У тилшуносликнинг жуда кўп соҳалари буйича қалам тебратди. Қиёсий – тарихий тилшуносликнинг отаси, фонетист – фонолог, лексиколог, лексикограф, туркий тиллар сарф ва нахв илмининг асосчиси саналади.

С.Муталибов таъкидлаганидек, Маҳмуд Кошгари яратган «Девону лугатит турк» асари фақат ўша давр учунгина катта воқеа булиб қолмай, бугунги туркология фани учун ҳам ўз қимматини сақлаб келмоқда. У ҳақли равишда туркология фанининг асосчиси ҳисобланади.¹

Маҳмуд Кошгарийнинг ҳаёти ҳақида жуда оз маълумотта эгамиз. Унинг тўлиқ исми Маҳмуд Ибн-ул Ҳусайн Ибн Муҳаммад-ал-Кошгарийdir. Маҳмуд Кошгарийнинг тугилган йили аниқ эмас. Лекин «Девон»нинг охирида бу «китоб умрини охирига етказганини» қўйидаги мисраларда баён қиласди:

«Кучанди билагим, егуди тилагим,
Тилинди билагим, теграб ангар жартилур».

Лугат ёзилганда муаллифнинг кексайиб қолганлигини ҳисобга олсак, у XI аср бошларида тугилган деб ҳисоблаш мумкин.²

Маҳмуд Қошгарийнинг туркий тилларга багишлиланган иккита асар ёзганлиги маълум. Улардан бири «Жавоҳирун нахв фил лугатит турк» («Туркий тилларнинг (синтаксиси) жавоҳирлари» деб, иккинчиси эса «Девону лугатит турк» («Туркий сўзлар тўплами») деб аталади.

Унинг семасиология соҳасидаги фикрлари ҳам жуда қимматли. У сўзларнинг маъноларини изоҳлабгина қолмай, маъно ўзгаришлари юзасидан ҳам нозик кузатишлар олиб борганлиги маълум. Маънонинг кенгайиши, торайиши ва маъно кўчиш усуллари билан бирга сўзлардаги омонимия ва синонимия ҳодисалари ҳам асарда тилга олинади.

Маҳмуд Кошгарийнинг бошқа тиллардан сўз олиш масаласидаги позицияси уни бизнинг давримизга яқинлаш-

¹ Қаранг. А.Нурмонов. Ўша асар, 26–28 – бетлар.

² Қаранг. А.Нурмонов. Ўша асар. ўша бетлар.

тиради. Чунки Маҳмуд Кошгарий турмушда ишлатила-диган асбоб ва бошқа нарсалар, кийимлар, овқатлар, дорилар номлари сифатида кирган чет сўзларни зарур ва фойдали деб ҳисоблаган, бундай сўзларни ўз асарига киритган. Аммо она тилида мавжуд бўлган сўзлар ўрнида чет сўзлардан фойдаланишини зарарли деб ҳисоблаган. Масалан, ўгузларнинг қумғон сўзи ўрнида форсча офтоба сўзини ишлатишларини у танқид қилади.

Маҳмуд Кошгарийнинг «Девону лугатит турк» асари тарихий диалектология учун, айниқса, қимматли материал ва фикрлар беради. Бу материаллар ўзбек халқ тилининг шаклланишини ёритиш учун жуда ҳам муҳимдир.¹

«Девону лугатит турк»нинг адабий қиммати ҳам бениҳоя каттадир. Унда уч юзга яқин шеърий парча ва кўплаб мақол ҳамда ҳикматли сўзлар бўлиб, шоир бундай шеърий парчаларга қисқа-қисқа шарҳлар беради, халқ мақолларининг моҳиятини ёритиб, уларнинг ишлатилиш ўрнини ҳам кўрсатади.

Ардам боши тил² – адаб ва фазилатнинг боши тил, деб таъкидлайди.

Абу-л-Қосим Маҳмуд аз-Замахшарий. Унинг тўлиқ исми Абу-л-Қосим Маҳмуд ибн Умар ибн Муҳаммад (баъзи манбаларда Аҳмад) бўлиб, у ҳижрий 467 сана ражаб ойининг йигирма еттинчисида чоршанба куни (милодий ҳисобда 1075 -йилнинг 19 - марта) Хоразмнинг катта қишлоқларидан бири Замахшарда таваллуд топган ва шу боисдан ҳам аз Замахшарий тахаллусини олган.³

Аз-Замахшарийнинг отаси унчалик бадавлат эмасди. Лекин ўз даврининг саводли, анча тақводор, диёнатли кишиси бўлган, аксар вақтини Қуръони карим тиловати ва тоат - ибодат билан ўтказиб, Замахшардаги бир масжида имомлик ҳам қилган. У хулқ - автори яхши, ширинсухан ва гоятда мурувватли киши бўлиб, бу фазилати билан эл орасида катта обрў - эътибор топган. Аз - Замахшарийнинг

¹ Усмонов. Умумий тилшунослик. -Т. 1972. 50-52 бетлар.

² Н.М.Маллаев. Ўзбек адабиёти тарихи. -Т. 1976. 107 – бет.

³ Абу-л-Қосим Маҳмуд аз Замахшарий. Нозик иборалар, -Т. 1992. 4-бет.

онаси ҳам тоятда тақвадор ва диндор аёллардан ҳисобланган.¹

Аз-Замахшарий дастлабки билимни она юрти Замаҳшарда ўз даврининг ўқимишли кишиларидан санаалган отасидан олади. Унинг шахсий ҳаётига доир маълумотлардан яна шу нарса маълумки, унинг бир оёги бўлмай, ёғоч оёқда юрган. Манбаларда чўлоқлигининг сабаблари ҳақида ҳам турли - туман ривоятлар келтирилади. Тарихчилардан баъзилари, қаҳратон қишида совуқ олганлигидан, деб ёйса, айримлари, болалигига отдан йиқилган дейди, яна бошқаси ёшлигига бир ножӯя иш қилиб қўйганлиги учун онасининг қарғишига учраган, деб ёzádi.² Аммо ёшлигидан илмга ҳавасманд Маҳмуд олдинига Хоразмда - мадрасада, кейинчалик Бухорода ҳамда донги кетган мадрасаларда таҳсил олади.

Аз-Замахшарий даврининг буюк олимни даражасига кўтарилди. У тилшунослик, адабиёт, жўғрофия, тафсир, ҳадис, фикҳ ва илми алқироатта оид эллиқдан ортиқ асарлар яратди. Уларнинг кўпич бизгача етиб келган.

¹ Қаранг: Абу-л-Қосим Маҳмуд аз-Замахшарий. Ўша асар. 5 – бет.

² Абу-л Қосим Маҳмуд аз-Замахшарий, Ўша асар. 6-бет.

Замахшарий хикматларидан намуналар:

- Агар тилингнинг ортиқча сўзлашига эга бўла олмасанг, унда тизгининг жиловини шайтонга топширган бўласан.
 - Мен рўзадорман дейсан-у, аммо ўзинг бўлса биродаринг гўштини ейсан, (гийбатлар ва хўрликлардан сўзлайсан).
 - Тилингдан чиққан садақа (яъни панду насиҳатинг ва мавъизаю ҳасананг) баъзан қўлингдан (мол-дунёнгдан) чиққан садақангдан кўра хайрлироқдир.
 - Кўп сўз-иборалар борки, одамларга улар фасоҳатли кўринса-да, Аллоҳ наздида улар номақбулдир – сўзловчини ҳам эшитувчини ҳам мулзам қилур.
 - Кўп ортиқча сўзлашув эшитувчини ранжитар.
 - Виждон азобиу таънадан тўгри бўлмаган одамни (кимсани) таълим-тарбия ва қийнаш ҳам тўгрилаши амримаҳол.
 - Тилию дили тўгри ва ҳақгўй бўлган одамнинг хатою нуқсони кам бўлур.
- Ўз ваъдасида турмаганда турли-туман важ карсонлар кўрсатувчи кимса ҳеч қачон мард ва ҳимматли инсон бўлолмайди.
- Алдамчилик ва ҳийлакорлик билан машҳур бўлган бурсақ деган йиртқич ҳайвондан ҳам кўра баъзи Бани одамлар кўпроқ алдамчироқдир.
 - Тот тепасидаги қояларни кўчириш миннат эшитиш юкларига нисбатан енгилроқдир.
 - Бирор масалада фикр – мулоҳаза қила бошлиганингда ҳеч бир ошиқма, ҳар томонлама ўйлаб, обдон фикрлаб иш туттин.

— Сидқидил ва сахий кимсанинг қалбидан бошқа нарсани сирларнинг сандиги қилма, яъни ҳар бир учраган кимсани сирдош этмагин.

— Эй бутам, тилингни ёмон сўзлардан сақла.

— Кимки баҳт - иқболли, солиҳ кишиларнинг этагига ёпишса, у албатта муроду мақсадига эришиб, хайру барака топар.¹

Юсуф Хос Ҳожиб. Юсуф Хос Ҳожиб XI асрнинг атоқли шоири, донишманди ва давлат арбобидир. Унинг ҳаёти ва фаолияти ҳақида маълумот берувчи ягона манба унинг «Қутадғу билиг» («Саодатга йўлловчи билим») достонидир. Бу достон ҳижрий йил ҳисоби билан 462- (милодий 1069-70) йилда ёзилган. Муаллиф достоннинг муқаддимасида ёши эллиқдан ошганини таъкидлайди. Шунга қараб Юсуф Хос Ҳожиб XI асрнинг 20 – йиллари арафасида туғилган, деб айта оламиз. Юсуф Хос Ҳожибинг ватани – Баласогун (Қуз ўрда) XI-XII асрларнинг йирик савдо-сотиқ ҳамда маданий марказлари-дан бири эди. Бу шаҳар икки марта қорахонийларнинг пойтахти ҳам бўлган эди.²

«Қутадғу билиг»нинг уч қўлёзма нусхаси маълум. Бу нусхалар «Вена» (ёки «Ҳирот»), «Қоҳира» ва «Наманганд» нусхалари деб юритилади. Биринчи нусхаси XIX асрнинг 20 йилларида Истамбулда топилди. – Ҳирот нусхаси. Иккинчи қўлёзма нусхаси 1896 йилда Қоҳирада топилди. – Қоҳира нусхаси, 1913 йилда Намангандада топилди – Наманганд нусхаси.³

«Қутадғу билиг» жами Наманганд нусхасида 6500 байтта 13000 мисрага яқин булиб, у 73 фасл-бобга бўлинган. Ўн бир боби достоннинг муқаддимаси булиб, асосий қисми 12-бобдан, Кунтуғди деган ҳукмдорнинг таърифи билан бошланади.⁴ «Қутадғу билиг» ахлоқий – таълимий асардир. Унинг ахлоқ ва одоб масалаларига багишлиланган

¹ Абу-л Ҳосим аз-Замаҳшарий. Ўша асар. 48-77-етлар.

² Боласогуннинг вайроналари Қиргизистоннинг Тұқмоқ шаҳри яқинида бўлган қадимги Оқпешин шаҳри ўрнида ҳозир ҳам бор. Н.Маллаев, «Ўзбек адабиёти тарихи». -Т. 1976. 111-бет.

³ Н.Маллаев, Ўша асар, 11-бет.

⁴ Н.Маллаев, Ўша асар, 16-бет.

махсус бобларигина эмас, балки ижтимоий-сиёсий масалаларга багишиланган махсус бобларида ҳам Юсуф Хос Ҳожиб ўз ахлоқий - таълимий қарашларини ифодалайди. Ҳалқнинг турли табақаларига ўгит беради, уларга панд-насиҳат қилади. Унинг ахлоқий - таълимий фикрлари жиддий аҳамиятга эга бўлиб, маданият ва маърифатни равнақ топтиришга, олижаноб инсоний хислатларни тарғиб қилишга қаратилган.

«Қутадгу билиг» дидактик достони ахлоқ ва одобга доир қимматли панд - насиҳатларни ўз ичига олади. Достон тил одоби, севги ва садоқат, ростгўйлик ва ҳалоллик каби масалалар ҳақида ҳикматли сўзлар сўзлайди, майхўрлик ва мутакаббирликни танқид қиласди, кишининг юриш - туриши, ўзини тутиши ҳақида ўгит беради. Булар достоннинг бутун мазмуни ва моҳиятига сингдирилади

«Қутадгу билиг»нинг бир неча боби бевосита ахлоқ ва одоб масалаларига багишиланган. Шундай боблардан бири «Тил ардами» («Тил одоби») деб аталган 7-боб бўлиб, унда шоир ўқиши ва билим олишда тилнинг аҳамияти, қисқа ва мазмунли сўзлаш, тилга ортиқча эрк бермаслик ва бошқалар ҳақида ибратли ўгитлар беради:

Уқушқа билигка бу тилмачи тил,
Яруттачи арни йўриқ тилни бил.
Кишиг тил оғирлар булур қут киши,
Кишиг тил ужузлар ярир ар баши.
Тил асрлан турур, кўр эшикда ятур,
Ая авлут орсиқ бошингни ятур.
Тилин эмгамиш эр наку тер эшит,
Бу сўз ишқа тутгил ўзунга иш эт.
Мани эмгатур тил эзи ўг талим,
Бошим касмасуни касайин тилим.
Сўзунгни кўдазгил бошинг бормасун,
Тилингни кўдазгил тишинг синмасун...
Эсанлик тиласа санинг бу ўзунг,
Тилингда чиқарма яргисиз сўзунг.
Билиб сўзласа сўз билигка сонур,
Билигсиз сўзи ўз бошини еюр.
Ўгуш сўзда ортуқ осиғ кўрмадим,

Яна сўзламишида осиг булмадим.
Ўгуш сўзлама сўз бирар сўзла оз,
Туман сўз тугунин бу бир сўзда ёз.
Санга сўзладим ман сузум, эй ўгул,
Санга барди бу панд узум, эй ўгул...¹
Ўқувга, билимга тилмоч – бу тил,
Кишини рўшноликка чиқарган равон тил деб
билигин.

Кишини тил эъзозлайди, киши у туфайли баҳтта
эришади,
Кишини тил қадрсиз қиласди, эр бошини ёради.
Тил ҳовлида (яъни қафасда) ёттан арслон
кабидир,
Эй, қафасдаги (маккор) ваҳший бошингни ейди.
Тили туфайли озор топган киши нима дейди,
эшит,

Бу сўзга амал қилгин, ўз фойданга ишлат:
Тил мени жуда кўп кулфатларга солади,
(У) бошимни кесмасин, (мен) тилимни кесайин.
Сўзингта эҳтиёт бўл, бошинг кетмасин,
Тилингта эҳтиёт бўл, тишинг синмасин...
Сенинг ўзинг эсонлик тиласанг,
Тилингдан яргисиз сўзингни чиқарма.
Билиб сўзласа, сўз донолик саналади,
Нодоннинг сўзи ўз бошини ейди.
Кўп сўзда ортиқ фойда кўрмадим,
Яна (кўп) сўзлашдан наф топмадим.
Сўзни кўп сўзлама, бир оз озроқ сўзла.
Туман минг сўз тугуни (жумбоги)ни шу
бир сўзда еч.
Мен сўзимни сенга сўзладим, эй ўғил,
Бу пандни ўзим сенга бердим, эй ўғил.

Юсуф Хос Ҳожиб шоир сифатида бадий сўзнинг
қиммати ва таъсир кучини алоҳида таъкидлайди, ўз сўзини
кўп ўринда «шоир тилидан» (донишмандлар тилидан)
сўзлайди ва яхши сўзни ҳар қандай олтин-кумушдан ҳам
ортиқроқ билади:

¹ Н.Маллаев. Ўша асар, 128-бет.

Кумуш қолса олтун манинг санга,
Они тутмагил сан бу, сўзга тенг-а:
Кумуш ишка тутса тугар олқинур,
Сўзим ишга тутса кумуш қизгонур.

Мендан сенга кумуш, олтин қолса,
У (лар)ни сен бу сўзга тенг тутмагин.
Кумушни ишга солсанг тутайди, олқинади,
Сўзимни ишга тутсанг, (сен учун)
кумуш қозонади.¹

Аҳмад Юғнакий. Аҳмад Юғнакий истеъдодли шоир ва донишманд мураббийдир. Ундан сақланиб қолган ягона адабий мерос «Ҳибатул - ҳақойик» («Ҳақиқатлар армугони»), бадиий сўз санъати ва адабий тилнинг жуда қимматли ҳамда нодир ёдгорлигиdir.²

Адиб Аҳмад Юғнакийнинг шахсий ҳаёти ва туғилиб ўстган ери ҳақида маълумотлар кам. Айрим манбаларда адибнинг ҳаёти ҳақида берилган маълумотлар тўлиқ эмас.

«Ҳибатул - ҳақойик»нинг ким томонидан ёзилгани, муаллифнинг исми, отасининг исми, унинг қаерда яшагани, бошқа адилларга нисбатан туттан мавқеи, жисмоний заифлиги ҳақида асарда қисқача маълумотлар мавжуд:

Адиб Аҳмад отим, адаб, панд сўзим,
Сўзум мунда қолур, борур бу ўзум.

Отим – адиб Аҳмад, сўзим-панд-насиҳат, адаб беришдан иборат, сўзим эса бу дунёда қолиб, ўзим у дунёга кетаман.³

Шоирнинг отаси Маҳмуд Юғнакий эканлигини шахсан ўзи айтиб ўтиши Аҳмад Юғнакий чиндан ҳам Юғнак деган шаҳарда туғилиб ўстнлиги ва у ерда ижод эттанилигига ҳеч қандай шубҳа қолдирмайди. Бундан ташқари Алишер Навоий «Насойимул - муҳаббат» деган асарида адиб Аҳмад Юғнакий ҳақида маълумот беради.

¹ Н.Маллаев. Ўша асар. 128–129 – бетлар.

² Н.Маллаев. Ўша асар, 138-бет.

³ Н.Маллаев. Ўша асар, 139-бет.

«Ҳибатул-ҳақойик»нинг 1480 йилда кўчирилган нусхаси 235 байт, 11 бобдан ташкил топган.¹ (Асар нусхалари ҳақида турлича маълумотлар бор).²

Асарнинг бешинчи боби (40-62 - байтлар) билим мақтовори ва жоҳилликнинг зарарига, олтинчии боби (63-86-байтлар) тил одобига багишланган.

«Ҳибатул - ҳақойик» дидактик достон бўлиб, ахлоқ-одоб масалалари ундаги кўпчилик бобларнинг тематик асосини ташкил этади. Шоир тил одоби, сахийлик, бахиллик, камтарлик, эзгулик ва бошқалар ҳақида худди Юсуф Хос Ҳожиб каби замонасининг пешқадам мураббийси сифатида фикр юритиб, кишиларга ўтиг беради.

Рост, соглом ва мазмунли сўзлашни, керак бўлганда, сир сақлай олишни мақтаб, лақмалик, ёлғон сўзлаш ва сергапликни қоралаган шоир тилни тийиш одобнинг боши дейди:

Эшиттил, биликлик нақу теб аюр:
Адаблар баши тил кутазмак турур.
Тилинг бакта тутғил, тишинг синмасун,
Қоли чиқса бакта тишингни сиор.
Сонип сўзлаган эр сўзи сўз соги;
Ўкуш янгшаган тил эй олмас ёғи.
Сўзунг бўшуруг эсма йига тут тилинг,
Етар бошқа бир кун бу тил бўшуруги.
Хирадлиқму, бўлур тили бўш киши?
Тилим бошни еди бу тил, сўз бўши...
Ики ненг бирикса бир ерда қоли,
Буқанди ул эрга мурувват йўли:
Бир ул янгшир эрса кераксиз сўзин,
Икинч ялғон эрса ул эрнинг тили...

(Эшиттил, олимлар нима деб айтурлар: адабларнинг боши тил сақлашадир. Тилингни тий, токи тишингни синдириласин, агар тилингни тиймасанг, тишинг синади. Эр киши эҳтиёт билан соглом сўзлади, кўп гапирган лақма

¹ Қаранг: Н.Маллаев. Уша асар, 140-бет.

² Қаранг: Аҳмад Юғнакий Ҳибатул - ҳақойик. Т. 1971. 10-11 бетлар.

тил аёвсиз душмандир. Бекор сўз сўзлашдан сақлан, тилнинг бўшлиги бир куни бошга етади. Тили бўш одам ақлли бўлармиди? Бу тилнинг бўшлиги киши бошини ейди... Агар кишида икки нарса бирикса: у ўринсиз сўзлар билан лақмалик қилса, иккинчидан, унинг сўзлари ёлғон бўлса, у киши учун мурувват йўллари бекилади...)¹

Шоир кишиларни бирорни аччиқ ва ёмон сўзлар билан ранжитмасликка чақириб, тилнинг яраси битмас ярадир дейди:

Ўчуктурма эрни тилин, бил, бу тил
Башақтурса, бутмас, бутар ўқ боши.

(Тилинг билан ўч ҳиссини қўзгама, бил, ўқ яраси битиб кетади-ю, лекин тил яраси битмайди).

Шоир достоннинг тўртинчи бобида сахийлик ва баҳиллик ҳақида сўзлаб, ҳиммат ва сахийликни баҳиллик ва зиқналикка қарама - қарши қўяди, бу масалаларга доир пандомиз мулоҳазаларини қисман бўлса - да, бошқа бобларга ҳам сингдиради, бадиий тил воситаларидан, хусусан, ўхшатишлардан ва халқ мақоллари ҳамда таъбирларидан фойдаланади.

Ахи арни ўтгил ўтар эрса сан,
Бахилга қатиг ё ўкун кизлагил.

(Мақтамоқчи бўлсанг, сахийларни мақта, баҳилларга ўқ-ёйни тўгрила).²

Алишер Навоий.

Алишер Навоий 1441-йил 9-февралда Ҳирот шаҳрида туғилди.

Шарқ маданиятининг салмоқли зарварақларини ташкил этувчи нотиқлик санъати тарихига оид талайгина манбалар бор бўлса-да, улардан ҳеч бири Алишер Навоий қолдирган мерос каби қимматли ва бой эмас.

¹ Қаранг: Аҳмад Ютнакий. Ўша асар. 10 – 11–бетлар.

² Н.М.Маллаев. Ўша асар. 143-бет.

Навоий ўз даврининг буюк мутафаккири, сўз устаси бўлиш билан бирга, кишиларга яхши сўз билан таъсир эта билиш санъатини жуда қадрловчи, улуғловчи, бундай санъат усталарига эътибор қилиб, эҳтиром кўрсатувчи бир шахс эди.

«Ҳақ йўлида ким санга бир харф ўқитмиш ранж ила,
Айламак бўлмас адо онинг ҳақин юз ганж ила», —

деб ҳар бир кишини билимли бўлиб етишишига сабабчи бўлган устозини эъзозлашга даъват этган. Навоий омма ўртасида яхши нутқнинг таъсири ва тарбиясини ҳам чуқур ҳис этади. Навоий нотиқлиқдаги яхши ва ёмон томонларни кўра билиш ва уларни фарқлай олишга чақиради. Навоий нотиқлик санъатининг буюк қудратига алоҳида эътибор беради. У «Маҳбуб ул - қуруб» номли фалсафий асарининг 24-фаслини «Насиҳат аҳли ва воизлар зикрида» деб айтади. Бунда воизлик санъатига, ваъзга, воизга ўз муносабатини билдиради. Навоийнинг фикрича, воиз қуйидаги хусусиятларга эга булиши лозим:

1. Воизнинг сўzlари таъсирчан ва фойдали бўлмоги лозим. Воиз керакки «қолаллоҳ» сўз айтса.
2. Нутқ тингловчи учун янгилик билимлар ва ўзгаришлар хабарчиси бўлмоги лозим. «Ваъз бир муршид ва огоҳ ишидур ва аниг насиҳатин қабул эттан мақбул кишидур».
3. Нотиқнинг ўзи бирор соҳани эгаллаган бўлиши ва ундан сўнг ваъз орқали кишиларга таъсир этиши лозим.
4. Нотиқ олим ва билимдон ҳар нарсадан хабардор кишидур. «Воизким, бўлғай олим ва муттақий-анинг насиҳатидин чиққан шақий».
5. Нотиқнинг сўзи билан иши бир бўлмоги лозим. Акс ҳолда нутқнинг таъсири бўлмайди. «Улки буюриб ўзи қилмагай, ҳеч кимга фойда ва асар аниг сўзи қилмагай».

Алишер Навоий нотиқлиқда қисқалик ва равшанликни ёқтиради. Бу жиҳатдан унинг «Маҳбуб-ул қуруб»

асаридағи 60 - танбеки ўринлидир. «Чин сўз мұтабар, яхши сўз мұхтасар. Күп дегувчи мумил, муқаррар дегувчи лояъқил» (яъни: Чин сўз эътиборли, яхши сўз қисқа бўлади. Күп сўзловчи зериктирувчи, қайта гапирадиган - ақдан озган), - дейди. У тутуруқсиз гап билан кишиларнинг гашига тегувчиларни ақли паст, носоғлом кишилардир, деб баҳолайди. «Улким, димогида ҳабт - сўзида йўқ рабт (кимнинг димогида иллат бўлса, сўзида боғланиш йўқ).¹

Димоги саҳиҳ - гуфтори фасиҳ (мия соглом бўлса, гап-сўз ҳам ёқими ва хатосиз бўлур). Сўзи ҳисобсиз-ўзи ихтисобсиз (бошвоқсиз). Сўзида паришонлик, ўзида пушаймонлик».²

Навоий воизлик санъатида ном қозонган-Хожа Муайяд Меҳнагий, Мавлоно Риёзий, Мавлоно Хусайн Воиз Кошифий, Мавлоно Муин Воизлар ҳақида ўзининг «Мажолисун нафоис» номли тазкирасида фикр билдирган.

Хожа Муайяд Меҳнагий

Алишер Навоий қадрлаган воизлардан бири - Хожа Муайяд Меҳнагий машҳургина эмас, балки нотиқ, донишманд, юксак билим эгаси бўлган, мавжуд билимларни ўрганиб қолмасдан, уларни такомиллаштирган, тўлдирган. У мозорда шайхлик қиласа - да, ўзини халқа жуда яқин туттан ва ўз билимини уларга беришга интилган: «ваъз мажолиси багоят гарм ва пуршўр воқеъ бўлур эрди».³

Хўжа Меҳнагий муваффақиятлари ва маҳоратининг калити билим доирасининг кенг, мазмунан чуқур эканлигида эди. Навоий ибораси билан айтсақ, у «зоҳир улумин» бўлган, яъни ўша даврда аждодларимиз тўплаган билимларнинг деярли ҳаммасини пухта ўзлаштирган, бунинг устига уларни бойиттан ҳам.

Меҳнагий ўз даврининг зўр сухандонларидан бири, ҳокисор шайх бўлишига қарамай, беназир донишмандлиги, зўр воизлик заковати туфайли ҳатто тож-тахт, аркони

¹ Б.Ўринбоев, А.Солиев. Ўша асар. 31-бет.

² Б.Ўринбоев, А.Солиев. Ўша асар. 32-бет.

³ Қараанг. Б.Ўринбоев, А.Солиев. Ўша асар. 32-бет.

давлат аъёнларини ҳам таъзим қилдира оладиган нотиқ эди.¹

Мавлоно Риёзий

Алишер Навоийнинг ёзишича: «Ваъз айтиб, минбарда ўз ашъорин ўқур, йиглаб важди ҳол қилур». Кўринадики, Риёзий нутқ сўзлаганда, унинг таъсирчанлигини таъминлашда, ижрочиликни биринчи уринга қўяди. Керак бўлганда, ўз нутқини кишилар қалбига яқин олиб, улар билан бирдамликни, қайгусига, изтиробига шерикликни билдириш мақсадида йиглашгача бориб етадики, бу нутқ ижрочилигидаги улкан қобилиятдан далолат беради.

Мавлоно Риёзийнинг халқа яқинлигини, нутқининг таъсирчан ва эмоционаллигини таъминлашда, унинг ижтимоий келиб чиқиши ва аҳволи ҳам муҳим рол ўйнаганилиги кўзга ташланади. Риёзий аввал Зова вилоятида қози бўлади.²

Хулоса шуки, бой илм соҳиби, ҳаёт - мамот учун аёвсиз кураш оловида тобланган ва воизлик санъатида шуҳрат қозонган Риёзий ўзининг дарбадар, хокисор қисмати билангина эмас, балки гоявий эзгу амаллари, ижрочилик услублари, мураббийлик маҳорати билан ҳам замондошлари орасида яққол ажралиб турган. Тахаллусидан ҳам, сезилиб турибдики, у узлуксиз риёзот чеккан, аммо мاشаққатли меҳнати, мардонавор жасорати ва беназир воизлик маҳорати, маърифатпарварлиги туфайли ўзига мангу ҳайкал ўрнатиб кетган сухандондир.³

Ҳусайн Воиз Кошифий

Ҳусайн Воиз Кошифий XV асрда яшаган сабзаворлик воиз ва буюк ахлоқ муаллимидир. Унинг номи ўз замонидаёқ эл оғзига тушган ва машхур бўлган. Ҳусайн Воиз Кошифий ўз даврининг забардаст олими, астрономи, шоири ҳам эди. Эрон олими Сайд Нафисий Кошифийнинг 40 та асари борлигини айтади. Навоийнинг эътироф қилишича, Ҳусайн Воизнинг «Оз фан бўлгайким, даҳли бўлмагай, хусусан, ваъз, иншо (насрий шеър усулида

¹ А.Ортиқов, А.Ортиқов. Нутқ маданияти ва нотиқлик санъети. -Т.: 2002. 18-бет.

² Б.Уринбоеv, А.Солиев. Уша аср, 32-бет.

³ А.Ортиқов, А.Ортиқов. Уша аср. 19-бет.

ёзиладиган хат) ва нужумки (юлдузшунослик, астрономия), анинг ҳаққидур ва ҳар қайсисида мутааййин (кўзга кўринарли) ва машҳур ишлари бор...». Унинг нутқлари жўшқин ва эҳтиросли бўлганлигидан кишиларни кўплаб жалб этар эди.

Ҳусайн Воиз нутқларининг таъсиричанлиги, жозибадорлиги ҳақида эслаб, унинг угли Фахриддин Али Сафий «Латойифут тавойиф» номли асарида шундай воқеани келтиради:

Кунларнинг бирида аҳли мажлисга Мавлоно Сайд-Гиёсиддин деган машҳур сўз устаси кечикиб келган. Шу мажлисда Абдураҳмон Жомий ҳам бор экан. Сайд-Гиёсиддин кириб келиши билан Жомий ундан сўрабди:

- Нечук кечикдингиз, Мавлоно Гиёсиддин?
- Мени маъзур тутинг, устод, — дебди Гиёсиддин, — келаёттан эдим, масжиди жомеъда Ҳусайн Воиз нутқ сўзлаёттан экан, шунга маҳлиё бўлиб қолибман.

Кошифийнинг нутқлари ўзининг жозибадорлиги билан ҳар қандай кишини жалб қила олган. Айтишларича, унинг бундай сўз санъатидаги маҳоратини Алишер Навоий билан бирга Султон Ҳусайн Бойқаро ҳам юксак баҳолаган ва улар ўз асарларини аҳоли ўртасида расмий ижро этиш лозим бўлган пайтларда, бу ишга Ҳусайн Воизни муносиб кўрганлар.

Ҳусайн Воиз Кашифийнинг нутқлари мазмундорлиги, таъсиричанлиги, ўзига жалб этиш қувватини мужассам эттанлиги, унинг техникасини ўрганиш ҳозирги давр нотиқлиги учун ҳам характерлидир.¹

Мавлоно Муин Воиз

Алишер Навоий давридаги машҳур нотиқлардан бири. У ҳақда Навоий: «Ҳоло ўзи даги азим воиздурур ва муридлари кўп» — деб ёzádi. Кўринадики, Муин Воиз нотиққина бўлиб қолмай, ўзининг нотиқлик мактабига, шогирдларига ҳам эга бўлган. Унинг нутқи, ижрочилик маҳоратини таҳдил этиб, Навоий: «Минбар устида девановор илк ташламоги ва таҳтани тепмоги кўпдур ва ўзин «Муин девона» била таъбир қилур ва кўп баланд ва

¹ Қаранг: Б. Үринбоев, А. Солиев. Ўша асар. 1984. 34-бет.

паст сўзлар айтур. Чун жунунга мұтариф, ҳар нав сўз айтса мазурдур...» - деб ёзади.

Бундан англашиладики, Муин Воиз нутқнинг ижрочилик томонига алоҳида эътибор қилган ва бутун хатти-ҳаракатларини, имо-ишораларини ишга сола билганки, гарчи у ўзини «Муин девона» деб эълон қилган бўлса-да, унинг «девона сифат» гаплари ҳалқ дилига яқин бўлганлигидан йигилганларга манзур бўлган.

У ҳар қандай мансабдан воизликни аъло билган ва ўз акаси Мавлоно Низомиддин унга Ҳирот шаҳри қозилигини икки марта тавсия этса-да, уни рад этган. Шу туфайли, унинг акаси: «Муини мо қобиляти бисъёр дошт, ни зинаюни чубин ўро зоеъ соҳт» (Муинимизнинг қобиляти кўп эди, уни бу ёғоч зинаюя (минбар) ишдан чиқарди), деганлигини Навоий қайд этади.¹

Воизлик санъати Ўрта Осиё ҳалқарининг, хусусан, ўзбек миллатининг маънавияти тарихида зарҳал ҳарфлар билан ёзилишига арзигулик саҳифаларни бизга мерос қилиб қодdirган.

Адабиётлар

1. А.Ортиқов, А.Ортиқов. Нутқ маданияти ва нотиқлик санъати. Т.: 2002.
2. А.Нурмонов. Ўзбек тилшунослиги тарихи. Т.: 2002.
3. Аз – Замахшарий. Нозик иборалар. Т.: 1992.
4. Аҳмад Юғнакий. Ҳибатул – ҳақойик. Т.: 1971.
5. Б.Ўринбоев, А.Солиев. Нотиқлик маҳорати. Т.: 1984.
6. М.М.Хайруллаев. Форобий. Т.: 1991.
7. Н.М.Маллаев. Ўзбек адабиёти тарихи. Т.: 1976.
8. С.Иномхўжаев. Нотиқлик санъати асослари. Т.: 1982.
9. С.Усмонов. Умумий тилшунослик. Т.: 1972.
10. Т.Қудратов. Нутқ маданияти асослари. Т.: 1993.
11. Р.Қўнгурров, Э.Бегматов, Ё.Тожиев. Нутқ маданияти ва услубияти ва услубият асослари. Т.: 1992.
12. У.Турсунов, Б.Ўринбоев, А.Алиев. Ўзбек адабий тили тарихи. Т.: 1995.

¹ Қаранг: Б.Ўринбоев, А.Солиев. Ўша асар. 1984. 35-бет.

ХАЛҚ ОҒЗАКИ ИЖОДИДА НУТҚ ОДОБИ МАСАЛАЛАРИ

Саволлар

1. Ўзбек халқ оғзаки ижоди нима учун халқ қадриятларининг тарбиявий қисми ҳисобланади?
2. Мифлар нима?
3. Мақоллар ва маталлар ўртасидаги фарқ нимада?
4. Топишмоқлар бошқа жанрлардан қайси хусусиятлари билан фарқланди?
5. Афсоналар қандай хусусиятлари билан мифлардан фарқланади?
6. Латифа ва лофларнинг умумий хусусияти нимадан иборат?
7. Эртаклар бошқа жанрлардан қандай хусусиятлари билан фарқланади?
8. Халқ қўшиқларининг қандай кўринишлари бор?
9. Нима учун асқия фақат ўзбек халқ оғзаки ижодига хос жанр ҳисобланади?
10. Достончилик анъаналари ҳақида нималар биласиз?

Топшириқлар

1. Ўрта Осиёда яшайдиган халқларнинг ўтмиш ҳаёти билан боғлиқ мифлар ҳақида ёзинг.
2. «Халқ мақолларини биламан» мавзууда ижодий мусобақага тайёрланинг (ёзма тарзда, масалаларни изоҳланг).
3. Топишмоқлар айтиш ва уларни топиш бўйича мусобақага тайёрланинг (ёзма тарзда).
4. Мустақил равища афсона ва ривоятлар ёзиб олинг ва таҳлил қилинг.
5. Афанди образи учрайдиган латифалардан ёзиб келинг.
6. «Эртакларда нутқ одоби масаласи» мавзусида ёзма иш ёзинг.
7. Аллалардан ёд олинг.
8. Асқияда нутқ маданияти мавзусида ёзма иш ёзинг.
9. Достонлардан парчалар ёдланг.
10. Маросим қўшиқларидан намуналар келтиринг (ёзинг).

ХАЛҚ ОҒЗАКИ ИЖОДИДАН НАМУНАЛАР (МАЖМУА)

Мақоллар

1. Айтар сұзни айт,
Айтмас сұздан қайт.
2. Ҳақ сұзга ўлим йўқ.
3. Оз сұз – соғ сұз.
4. Тилни билиш – дилни билиш.
5. Нотиқ маҳмадона бўлса, мажлиснинг бурди кетар.
6. Тилдан қоқилишдан кўра, оёқдан қоқилиш афзал.
7. Гапнинг тагини гап очар.
8. Бефойда сұзни айтма, фойдали сұздан қайтма.
9. Яхши гап билан илон инидан чиқади.
10. Айтилган сұз отилган ўқ.
11. Севдирган ҳам тил, бездирган ҳам тил.
12. Гапни оз сұзла, ишни кўп кўзла.
13. Кўп билган оз сұзлар, оз бўлса ҳам соғ сұзлар.
14. Қиличнинг заҳри кетса ҳам, сұзнинг заҳри кетмас.
15. Оталар сўзи – ақлнинг кўзи.

Топишмоқлар

1. Зарга сотилмас, зўрга топилмас. (вақт)
2. Отлари ҳар хил, ёшлари бир хил. (ҳафта кунлари)

3. Темир қўргон ичида Қизил тойчоқ ўйнайди. (*Тил*)
4. Бир нафасда оламни кезар. (*Фикр*)
5. Юғургандан ўтади,
Бир вақтда етади,
Ўқ эмас, отилади,
Күш эмас, учади (*Фикр*).
6. Узоқнинг у ёгинда,
Яқиннинг бу ёгинда.
Кўринмас кўзга,
Тинч бермас бизга (*Хаёл*).
7. Асалдан ширин,
Заҳардан аччиқ (*Сўз, гап*).
8. Бирорни сўйдирар,
Бирорни куйдирар (*Сўз, гап*)
9. Оғзимни очдим, учди кетди,
Самарқанду Бухор бориб етди (*Сўз, гап*).
10. Оғиздан чиққанча меники,
Оғиздан чиққани элники (*Сўз, гап*).
11. Ўт эмас, куйдирар,
Пичоқ эмас, сўйдирар (*Ёлғон сўз*).
12. Ким суялди,
Ўша уялди (*Ёлғон сўз*).
13. Тинмас битта
Тинглар мингта (*Радио*).
14. Катта қути, кўзи бор,
Кўп томоша, сўзи бор (*Телевизор*).
15. Асал эмас, ёқади
Ари эмас, чақади (*Гап, сўз*).

16. Жұшиб күйлар акаси
Рақсга тушар укаси *(шамол, үсімлік).*

Хазил сўроқлар ва сўз ўйини

1. Нима ҳамма тилда ҳам гапиради? *(акс садо).*
2. Одамзодда нима кўп? *(умид, режа).*
3. Дунёда нима чаққон? *(фикр).*
4. Дунёда нима югурек? *(фикр).*
5. Дунёда нима қиммат? *(ростлик).*
6. Дунёда нима куринмайди? *(севги).*
7. Юмуқ кўз билан нимани қўриш мумкин? *(туш).*
8. Қайси жойда осмон паст бўлади? *(сувда).*
9. Денгиз остида қандай тош бўлмайди? *(куруқ тош).*
10. Дунёда бир нарса борки, у бўлмаса ҳеч ким бир - бирини танимайди, у нима? *(исм)*
11. Юки бўлса юради,
юксиз тўхтайди. *(осма соат).*
12. Ёмғир ёғиб турганда, қарга
қандай дарахтта қўнади? *(хўл дарахтта).*
13. Қора мушук қай вақт уйга
осонгина кира олади? *(эшик очиқ бўлса).*
14. Бир оиласда чолу кампир яшайди.
Уларнинг икки ўғли бор.
Ҳар бир ўглининг биттадан синглиси бор.
Шу оиласда нечта жон бор?

(5 та: чолу кампир, икки ўтил, бир қиз)

15. Аңхор бўйида уч қарагай ўсади. Уларнинг ҳар бирида учтадан йўтон шохи бор, ҳар бир йўтон шохида бештадан новда бор. Ҳар бир новдада етти дондан олма бўлса, ҳаммаси бўлиб нечта дона олма бор?

(битта ҳам олма йўқ, қарагайдага олма бўлмайди)

Р И В О Я Т

Ўтмишда ови юрса ҳам дови юрмай, тобора камбагаллашиб бораётган бир деҳқон йул четида ўйланиб турса, фақиргина йўловчи ўтиб қолибди. Шунда деҳқон:

— Эй донишманд, нима эксам, мен бойиб кетаман? — деб маслаҳат сўрабди.

Йўловчи унга лиёз экишни тавсия этибди. Қарангки, нотаниш йўловчининг гапига кирган деҳқон ўша йили чиндан ҳам бойиб кетибди. Шодлигидан босар — тусарини билмай қолган деҳқонга яна ўша одмигина йўловчи учраганида:

— Эй гадо, нима эксам, мен янада бойиб кетаман? — деб иккинчи маротаба мурожаат қилибди.

Шунда у яна бир экиннинг номини айтиб, йулида давом этибди. Фалакнинг гардишини қарангки, кейинги йили деҳқоннинг омади чопмай, илгаригидан ҳам камбагаллашиб кетибди.

Бундан гоятда газабланган деҳқон ҳалиги йўловчини сабрсизлик билан кута бошлабди. Ниҳоят, у нотаниш йўловчи билан дуч келибди ва :

— Эй нотавон йўловчи, нега мени алдадинг? Сенинг гапингга кириб, янада бойиш ўрнига буткул камбагаллашиб кетдим-ку?, — деб газаб қилибди.

— Ўзингни бос, — дебди йўловчи. — Биринчи йили сен менга «донишманд» деб мурожаат қилдинг. Мен сенга донишманднинг жавобини бердим. Натижада сен бойиб кетдинг. Кейинги сафар эса менга «гадо» сўзини муносиб

кўрдинг ва мен сенга гадонинг жавобини бердим, - деган экан...¹

«Е тўним, е...» афанди.

«Афанди бир куни тўйга борган эди, усти-боши эски бўлганлиги учун унга ҳеч ким эътибор бермади. У тўйхонадан тезда чиқиб, бир ошнасининг кийимларини кийиб, яна қайтиб келди. Афандини иззат-икром билан тўрга ўтказдилар, одига турли-туман ноз-неъматлар келтириб қўйдилар. Бу аҳволни кўрган Афанди устидаги тўнга қараб:

— Бу овқатлардан е, тўним, е!, — дейди.

Ажабланган одамлар бунинг сабабини сўраганларида у:

— Мадомики, бутун ҳурмат, эҳтиром янги тўнга экан, таомни ҳам у есинда, — деб жавоб берибди».²

«Луқмони ҳаким йўлда бораётсалар, бир уйдан нола эшитилибди. Кирсалар, хаста одам оғриққа чидаёлмай дод дер эмиш. Табиблар келиб, уни бутун-эрта улади, дейишибди экан. Луқмони ҳаким хастанинг билак томирини ушлаб кўриб дебдиларки: «Дардингизга даво бор. Илон заҳри сизга шифо бергай». Хаста дебдики: «Илон заҳрини мен қандай топай? Бир бедаво бўлсам... Ё мени шу аҳволда ташлаб кетаверасизми? Оллоҳ менинг зоримни эшитиб, Луқмони ҳакимга рўбаро қилганида эди, у зот мени ташламас эдилар». Луқмони ҳаким бу нолани тинглаб, айтибдиларки: - «Зинҳор ташламасман». Хуллас, ҳазрат Луқмони ҳаким илонзорга бориб, бир ёшроқ илонни бўғзидан бўтиб турибдилар. Шунда илон иттифоқо тилга кирибди ва дебдики: «Эй инсон фарзанди, сен нечун мени бўтаётирсан? Оллоҳнинг менга берган жабрлари камми эди?». «Оллоҳ сенга қандай жабрлар қилди?», деб сурабдилар Луқмони ҳаким. «Мени кўримсиз қилиб яратди, одамлар кўрсалар мендан қочадилар. Мени ертубан қилиб қўйди, судралиб юришга маҳкум этди. Энди сен мени бўғиб, жонимни оларсанми?». Луқмони ҳаким

¹ Қаранг. Сиддиқ Мўмин. Сўзлашиши санъати. Фаргона, 1997. 60-бет.

² Сиддиқ Мўмин. Ўша асар. 81-бет.

дебдилар: «Шундай қимасам бир одам ҳаётдан кўз юмар». Илон дебди: «Ажаб! У одамни сақлаб қолмоқ учун менинг үлдирасанми? Ахир у ҳам Оллоҳнинг бир маҳлуки, мен ҳам. Бир жонни сақламоқ учун иккинчисини маҳв этмоқ шартми? Эй инсон боласи, сен айт: мен бирорни чақсам, менинг заҳримни даф эта оласанми?» Луқмони ҳаким айтибдилар: «ҳа, даф эта оламан». Илон дебди: «Унда менинг заҳрим кучли эмас экан. Дунёда шундай заҳар борки, сен уни зинҳор даф эта олмассан!». «Қандай заҳар?. Қора қуртникими?», - дебдилар Луқмони ҳаким. «Э, йўқ, - дебди илон. - Дунёда энг кучли заҳар - одамнинг заҳри. Бунга даво йўқтур. Одам одамни чақса, албатта, ўлим ҳақдир! Оллоҳ биз - илонларни тубан қилиб яратди. Аммо биз бир-бирилизни чақмаймиз. Сиз - одам болаларини юқори қилиб яратди, сиз бир-бирингизни чақиб үлдирасиз. Сен сақлаб қолмоқчи бўлаётган хастага менинг заҳрим даво эмас, янгишма. Уни ўз дўсти чақдан. Унинг заҳрига даво топа олмассан. Бунга хатто Луқмони ҳаким ҳам даво топмагай. Қуй, у ўлаверсин, азобларидан кутула қолсин...»¹

МЕХР БАЙТЛАРИ

(Аллалардан намуналар)

Тоғлардаги шунқорим-а, алла,
Богимдаги булбулим-а, алла,
Бешикдаги қоплоним-а, алла,
Қўлимдаги ботирим-а, алла.

Улгайиб ўса, алла,
Кўқдаги юлдузим-а алла,
Белгинамнинг қуввати-я, алла.
Кўзгинамнинг гавҳари-я, алла.

Алла айтиб юрайин-а, алла.
Қўзичогим болам-а, алла,
Катта бўлиб жоним-а, алла,
Ватанга содик бўл-а, алла.

¹ Т.Малик Шайтанат III китоб 315-бет.

Кўзимнинг нури-я, алла,
Мехр-оқибатли бўл-а, алла.

* * *

Тўйиб – тўйиб ўпай сени,
Ширин дўмбогим, алла.
Қучогимда яшаб турган,
Машъал чирогим, алла.
Эрка ўғлим катта бўлгин,
Қўриқчи бўлгин, алла.
Бошга келган балоларни,
Йўқ қилиб тургин, алла.

Алла-алла айтайин, алла,
Устингга тўним ёпайин, алла,
Бу гариблик ҳасратин, алла,
Кимларга бориб айтайин, алла.

Ухла, эркам, ол ором,
Алла-алла жон болам, алла.
Мендан зурриёд, мендан ном,
Богда очилган лолам, алла.

Сенга қўйдим яхши от, алла,
Яхши ниятдур мурод, алла,
Юрту элга суюнсанг, алла.
Сенга бўлгуси қанот, алла,

Осмонда учган қушлар, алла,
Секин чиқар товушлар, алла,
Мени солма қайгуга, алла,
Болам тўйсин уйқуга, алла.

Бошингда ўлтираман,
Алла айтиб тун бўйи, алла.
Юрагимни пайванд қилай,
Сенга жоним шу кўйи, алла.

Алла десам бор бўлгин, алла,
Менга номус-ор бўлгин, алла,
Катта бўлган чогингда, алла,
Халққа вафодор бўлгин, алла.

Улгай болам, гул Ватан, алла,
Ботир бўлиб ўсгил қўзим, алла,
Сени кўриб бу чаманда, алла,
Яйрай-қувонай, юлдузим, алла.

Алла айтай жоним болам,
Ухлаб қолгин-а, алла...
Бешикларда роҳатланиб,
Ором олгин, алла...

Үйларимни ёритувчи,
Ёргу юлдузим, алла-ё...
Дилларимни равшан қилгин,
Равшан чирогим, алла...

Арслон билакли, шер юракли,
Қоплонгинам бўлгин-а, алла,
Катта бўлиб Ватанингта,
Содиқ бўлгина, алла...¹

¹ Қаранг: Тафаккур чечаклари (Ўзбек халқ қўшиқлари). –Т. 1992.

Адабиётлар

1. Ақл ақлдан қувват олади. Ҳикматли сўзлар. Т.: 1967.
2. Ипак йўли афсоналари. Т.: 1993.
3. Маҳмуд Саттор. Ўзбекнинг гапи қизиқ. Т.: 1994.
4. М.Абдураҳмонов. Ўзбек топишмоқлари. Т.: 1991
5. Н.М.Маллаев. Ўзбек адабиёти тарихи. Т.: 1976.
6. О.Мадаев, Т.Собитова. Халқ оғзаки поэтик ижоди. Т. 2001.
7. Оз – оз ўрганиб доно бўлур. Т.: 1998.
8. С.Мумин. Сузлашиш санъати. Фарғона. 1997.
9. Т.Малик. Шайтанат. I-II-III-IV китоб. Т.: 1997.
10. Тафаккур чечаклари. Ўзбек халқ қўшиқлари. Т.: 1992.
11. Ш.Шомақсудов, Ш.Шораҳмедов. Маънолар маҳзани. Т.: 2001.

КАЙКОВУСНИНГ «ҚОБУСНОМА» АСАРИДАГИ СУХАНДОНЛИК ХУСУСИДА

Саволлар

1. Шарқ алломаларининг ахлоқий - тарбиявий асарларидан қайсиларини биласиз?
2. Кайковус қачон ва қаерда тугилган?
3. «Қобуснома» қачон ёзилган?
4. Кайковус «Қобуснома»ни кимга багишлаб ёзган?
5. «Қобуснома» қайси тилларга ва кимлар томонидан таржима қилинган?
6. «Қобуснома» неча бобдан иборат ва унда қандай воқеалар берилади?
7. Асарда кишилар неча тоифага ажратилган?
8. Сўзлар неча тоифага ажратилган?

Топшириклар

1. «Қобуснома»ни синчиклаб ўқиб чиқинг.
2. Ҳаётдан «тўрт нав сўзларга» мисол ёзинг.
3. «Халойиқ ҳам тўрт нав»ига ҳаётдан мисол ёзинг.
4. Асарнинг еттичини бобини синчиклаб ўқинг ва гапириб беринг.
5. Бадиий адабиётлардаги нутқ одоби ҳақидаги ҳикоялардан кўчириб ёзинг.
6. Асарнинг еттичини бобидаги ҳикояларни кўчириб ёзинг.

Кайковус «Қобуснома». Кайковус қаламига мансуб «Қобуснома» асари шарқ халқлари орасида маълум ва машҳурдир. Асаддаги мўъжаз ривоятлар, ихчам латифалар, кичик-кичик ҳикоятлар уни янада жозибали, ўқишли бўлишини таъминлаган.

XI асрнинг 82-83-йилларида Гарбий Эрон подшоҳининг набираси Кайковус ибн Искандар ўз ўғли Гилоншоҳга багишлаб «Насиҳатнома»сини яратади ва ўша давр анъанасига кўра уни бобоси подшоҳ Шамсулмаолий Қобус шарафига «Қобуснома» деб атайди.

«Қобуснома» асрлар мобайнида Гарб ва Шарқ мутафаккирларининг эътиборини ўзига жалб этиб келган. Олимлар «Қобуснома»ни диққат билан ўргандилар ва ўз тилларига таржима қилдилар. Масалан: 1702-1705 - йилларда турк тилига, 1786-1787 - йилларда Муҳаммад Сиддиқ Рашидий томонидан татар тилига таржима қилинади.

Бундан ташқари 1886 - йилда рус тилига, шу йили француз тилига, 1811 - йилда немис тилига, Е.Э.Бертельс томонидан 1953 - йилда иккинчи марта рус тилига таржима қилинади. Демак, XIX асрданоқ асар инглиз, фаранг, олмон, рус тилларига таржима қилинади. 1935 - йилда Текронда Саид Нафисий томонидан босмадан чиқарилди.

1860 - йилда «Қобуснома» илк бор ўзбек тилига буюк шоир ва мутафакир Муҳаммад Ризо Оғаҳий томонидан таржима қилинди. Оғаҳий таржималари ичida «Қобуснома» алоҳида ўринлардан бирини эгаллади. Бу нодир асар 1965-1973 ва 1986-йилларда адабиётшунос олим Субутой Долимовнинг катта саъӣ-ҳаракатлари туфайли уч марта нашр қилинган эди. 1994-йилда «Қобуснома» Муҳаммад Ризо Оғаҳий таржимаси асосида ҳозирги замон ўзбек адабий тилида яна С.Долимов томонидан нашрдан чиқарилди.¹

Асарнинг еттинчи боби: Сухандонлик била баланд мартабали бўлмоқ зикрида.

Киши сухандон, сухангўй (нотиқ бўлиши керак. Аммо эй фарзанд, сен сухангўй бўлғил ва лекин дуруггўй (ёлғончи) бўлмагил. Росттўйлиқда ўзинг шуҳрат қозонғил, токим бирор вақт зарурат юзидин ёлғон сўз десанг қабул қилгайлар. Ҳар сўз десанг ҳам рост дегил ва лекин, ёлғонга ўхшагон ростни демагилким, ростта ўхшаган дуруг дуругга ўхшагон ростдин яхшидур, недийким ул дуруг мақбул бўлар, аммо ул рост мақбул бўлмас. Демак, номақбул ростни айтишдан парҳез қил, токи менинг била Абу Сувор Шопур билан Абу ал-Фазлнинг орасиндаги воқеа сенинг бошингда содир бўлмасин.

¹ Қаранг. Қобуснома. -Т. 1994, 3-9 бетлар.

ҲИКОЯТ

Билгил, мен амиралмъумин замонида бир йил ҳаждан қайтиб келиб, Ганжада қарф тутдим..

Ҳиндистонга кўп газот қилмиш эрдим, Румга ҳам юриш қилмоқни ўйлардим. Абу Сувор Ганжада улуғ подшоҳ эрди. Ул бағоят хушманд, одил, саҳий ва фозил киши эрди. Бир куни мени кўруб, кўп ҳурмат қилди ва менинг била сўзлашмоқ мақсадинда ҳар турли сўз сўрар ва мендин маъқул жавоб эшитар эрди. Менинг сўзларим унга маъқул тушиб, кўп карамлар қилиб, менга кўнгул қўйди. Мен ҳам унинг эҳсонларин кўриб, унга кўнгул қўйдим. Шул сабаб била бир неча йил Ганжада муқим бўлдим ва ҳамиша подшоҳнинг мажлисида ҳозир эрдим. Подшоҳ мендан ҳам турли сўзларни сўрар эрди. Бир куни сўз орасига менинг вилоятим тушди ва мендин Гургон қишлоғи ҳолидин сўради. Вилоятларнинг ажойиб - гаройибларидин сўз очилди. Сўз асносинда мен дедим: «Гургонда Сиёвакс дегон бир кент бордур ва унинг бир чашма суви бордурким, ул кентдин узоқроқдур. Хотинлар жам бўлуб, ҳар бири бир кўза кўтариб, ул чашмага бориб сув олурлар ва кўзани бошларига кўтариб, барчаси ҳамроҳ булиб уйларига қайтадилар. Уларнинг орасида бир хотин кўза кўтармай, барчадин илгари юруб, йулига эҳтиёт бўлуб, назар ташлаб боради. Нединким ул ерларда бир кўк қурт бордур. уни сизак дерлар. Агар ул қуртдин бирини топсалар, йўлдин олиб, йироқقا ташлайдурлар, токим хотинлар ул қуртни билмай босиб ўлдумасунлар. Агар сув кўтаргон хотинлардин бири қуртни босиб ўлдурса, бошига куторгон кўзадаги сув сасиб, бадбўй булиб кетади. Шундан кейин аввал сувни тўкиш, кўзани ювиш керак бўлади ва кўзани тозалағон хотин қайтиб бориб чашмадин сув олади.

Мен бу сўзни дедим, аммо амир Абу Сувор туршруй (бадбуруш, қовоги солиқ) булиб, мендин юз ўғурди ва бир неча кун менга бурунгидек (аввалгидек) мулоқот ва илтифот қилмади.

Бир куни Фирузон Дайлимий бу аҳволни менга айтди: «Амир сендин гина қилиб деди: «Фалон киши бағоят донодур, аммо ёш ўғлонларга айттудек ёлғон сўзни менга

айтадур. Унингдек кишидан менингдек подшонинг олдида бунингдек дуруг сўзни айтмоқ муносиб эмасдур».

Мен бу сўзни эшигхондин сўнг дарҳол Ганжадан Гургонга бир киши юбориб, уламонинг шаҳодати била бир гувоҳ хат талаб қилдим. Гургоннинг барча уламо, қозилари бу кентнинг, қуртнинг ҳоли ва қиссаси ростлиги ҳақида гувоҳ бўлишиб, бу бобда бир хат ёзиб юбордилар..

Бу хат тўрт ой муддатида менга етиб келди. Мен уни подшоҳга кўргуздум. Подшоҳ уни ўқиди ва табассум қилиб деди: «Мен ҳуд¹ таҳқиқ² булурманким, сенингдек кишидан ёлғон сўз зоҳир бўлмагусидир, хусусан, менингдек подшоҳнинг олдида... Аммо тўрт ой муддатида икки юз одил кишининг гувоҳлиги била бир рост сўзни айтмоқ муносиб эмасдур. Бунингдек сўзлар аввал исбот этилгай, ундин сўнг ул сўзни қабул эттайлар.

Эй фарзанд билғилки, сўз тўрт нав бўлур, ундоқим ҳалойиқ ҳам тўрт нав бўлғондек. Бири улким, билур ва билғонин ҳам билур. Ул олимдур, унга тобе бўлмоқ керақдур. Бири улдурким, билмас ва билмагонин билур, ул қобилдур, унга ўргатмоқ керак. Бири улдурким, билур ва билғонин билмас, ул уйқудадур, уни бедор қилмоқ керақдур. Бири улдурким, билмас ва билмагонин ҳам билмас, у жоҳилдур, ундин қочмоқ керақдур. Аммо деб эрдимки, сўз ҳам тўрт навдур; бири, билинмайтурғон ва айтилмайтурғон; иккинчиси, айтилатурғон ва билинатурғон: учинчиси, ҳам билинатурғон ва ҳам билишга заруратсиз, аммо айтса бўлатурғон, тўртинчиси, билантурғон ва айтилмайтурғон. Аммо айтилмайтурғон ва билинмай турғон ундоқ сўздуруки... дунёнинг салоҳи унга боғлиқдир. Ул сўздин айтгувчига ҳам, эшигувчига ҳам кўп наф етар. Аммо билинатурғон, бироқ айтилмайтурғон ундоқ сўздирким, бир муҳташам одамнинг айби сенга маълум бўлур. Лекин ақл тариқидин хаёлга келсанг, уни айтмоқ бешармликдир. Чунки айтсанг ул муҳташамнинг ҳаҳри ё у дўстнинг озори сенда ҳосил бўлур, ёҳуд ўз бошинга улуг шўриш ва гавғо пайдо қилурсан. Шул важдин ҳам бул сўз билинатурғон, аммо айтилмайтурғон

¹ Ҳуд - уз, ўзим.

² Таҳқиқ - бирор нарсанинг ҳақиқатини излаш.

сўздур. Бу сўзларнинг яхшироги ҳам билинатургон ва ҳам айтилатургон сўздур.

Бу тўрт нав сўзнинг икки юзи бордур. Бири хуб ва бири зишт. Ҳар сўзни ҳалойиққа зоҳир қилсанг, яхши юз била зоҳир қил, токи мақбул бўлсун ва ҳалойиқ сенинг сўз била баланд мартабага эгалигингни билсунлар. Нединким кишининг мартабасини сўз била билурлар, аммо сўзнинг мартабасини киши била билмаслар, чунки ҳар кишининг аҳволи ўз сўзининг остида пинҳондур, яъни бир сўзни бир иборат била айтса бўлур, эшитгон кишининг эса кўнгли ундин тира¹ бўлгай ва яна ўшал сўзни бир иборат била айтса бўлурким, эшитгон кишининг жони ундин роҳатда бўлгай.

ҲИҚОЯТ

Ундоқ эшитдимки, бир кечада Хорун-ар Рашид бир туш кўрдиким, оғзидин барча тишлари тўкулмиш. Эрта тонг туриб бир муаббирни² чақириб сўрадиким, «бу тушнинг таъбири недур?». Муаббир деди: «Эй амиралмўминин, сенинг олдингда барча хеш, ақрабо ва қариндошларинг ўлгусидир. Андоғим, сендин ўзга ҳеч киши қолмагусидур». Бу сўзни эшитгон Хорун-ар Рашид: «Менинг юзимга бундоқ дардлиг ва андуҳлиг сўзни айтдинг. Менинг барча қариндошларим ўлсалар, сўнгра мен қандоғ ишга ярарман ва на янглиг рўзгор сурарман?» – деди ва унга юз таёқ урмоқ буюрди. Сўнг бошқа бир муаббирни чақириб, тушин унга таҳрир³ қилди. Муаббир деди: «Эй амиралмўминин, сенинг умринг барча ақраболаринг умридин узоқ бўлур». Хорун-ар Рашид деди: «Барча ақлнинг йўли бирдур ва икковининг таъбирининг негизи бир ерга борур, аммо бу ибора била ул иборанинг орасида фарқ багоят кўпдур». Буюрди, сўнгти муаббирга юз тилло бердилар...

Эй фарзанд, сўзнинг юзин ва орқасин билғил ва уларга риоя қилғил, ҳар на сўз десанг юзи била дегил, то сухангўй бўлгайсан. Агар сўз айтиб, сўзнинг нечук эканин

¹ Тира – коронгу

² Муаббир – тушни таъбири килувчи.

³ Таҳрир – мақсадини оғзаки англатиши.

билмасанг қүшга ўхшарсанки, унга тұти дерлар, ул доим сұзлар, аммо сұзниң маъносин билмас.

Сұхангүй шул киши бұлғайки, ул ҳар сұзни деса, халқа маъқул бұлғай ва халқ ҳам ҳар сұз деса унга маъқул бұлғай. Бундай кишилар оқиллар қаторига киргай, йүқ эрса ул инсон суратида мавжуд бұлғон бир ҳайвондур.

Сұзни бағоят улуг билғил, сұз осмондин келмас ва ул хор нарса әмасдур. Қай бир сұзники билсанг жойини үткармай айтғил, вақтни зое қылмагил, йүқ эрса донишға ситам қылғон бұлғайсан. Ҳар сұз десанг рост дегил ва беъманиликтің даъво қылғувчи бұлмагил.

Билмагон илмдин дам урмагил ва ундин нон талаб қылмагил. Ҳар на матлубинг бұлса, билгон илм ва ҳунардин ҳосил бўлур. Билмагон ҳунар даъвосидин ҳеч нарса ҳосил бўлмас, фақат беҳуда заҳмат чекарсан.

ҲИКОЯТ

Бундог айтурларки, Анушировон Одилнинг замонида бир хотин Абузуржмеҳрнинг олдига келиб, ундин бир савол сўрди. Абузуржмеҳр ул саволни билмамиш эрди ва хотинга қараб деди: «Эй хотин, ул сұзни сен сўрорсан, уни билмасман». У хотин деди: «Сен бугина сұзники билмассан, подшоҳнинг неъматин нечун ерсан?» Абузуржмеҳр деди: «Билгон сұз учун ерман, аммо билмагон сұз учун емасман. Ҳар сұзники билмасман подшоҳ менга ул сұз учун ҳеч нарса бермас ва ҳарна берса билғон сұзим учун берур».

Аммо, эй фарзанд, ҳеч кишининг олдида ифрот¹ қылмагил ва ифротни шумлиқ деб билғил. Ҳар ишда миёна (уртача) бұлғил, сұз айтмоқда ва иш қылмоқда... сангин² бұлғил. Розингни³ ўзингдин ўзга кишига айтмагил, агар айтсанг сұнгра уни роз демагил.

Халойиқнинг орасида бир кишининг қулогига сұз айтиш яхши әмасдур. Агар бу сұз гарчанд яхши сұз бўлса ҳам, ташқарисиндан уни ёмон сұз деб гумон қиладилар ва кўп одамлар бир-бирларидан даргумон бўладилар. Гар сұз

¹ Ифрот - ҳаддан ошиш.

² Сангин - оғир.

³ Роз - сир.

А демоқчи бұлсанг, шундай сүз дегилки, сүзингнинг ростлиғига гувоҳлик берсінлар. Агар үзингни зўрлик била айбдор қилмоқ тиласасанг, бирор нарсага гувоҳ бўлмагил ва агар гувоҳ бўлсанг, гувоҳлик берар вақтда эҳтиroz¹ бўлғил. Агар гувоҳлик берсанг, майл била бермагил.

Ҳар сўзни андиша била бошлагил, токи айттон сўзингдин пушаймон бўлмагайсан.

Андишани илгари тутмоқ ҳам бир нав кароматдур. Ҳеч сўзни эшитишдан дилтанг бўлмагил. Ул сўз ишингта хоҳ ярасун, хоҳ ярамасун, уни эшифтгил, то юзингга сўз эшигиbekланмасун ва фойдаси фавт² бўлмасин.

Совуқ сўзлик бўлмагил. Совуқ сўз бир тухумдур, ундин душманлик ҳосил бўлур.

Адабиётлар

1. Кайковус Қобуснома. Т. 1994.
2. Кайковус Қобуснома. Т. 1986.
3. Кайковус Қобуснома. Т. 1973.

¹ Эҳтиroz – сақданиш, эҳтиётланиш.

² Фавт – йўқотиш, ўлим; фавт бўлмоқ – ўлмоқ.

АЛИШЕР НАВОИЙ ИЖОДИДА НУТҚ МАДАНИЯТИ ВА НОТИҚЛИК САНЬАТИ МАСАЛАЛАРИНИНГ ТАЛҚИНИ

Саволлар

1. Навоийнинг фикрича воиз қандай хусусиятларга эга бўлиши керак?
2. Навоий қайси асарида воизлиқ санъатига алоҳида тұхталиб үтади?
3. Навоий тан олган воизлардан кимларни биласиз?
4. Воизлик қандай баҳоланади?
5. Тилшуносликка оид қандай асарларини биласиз?
6. Навоийнинг қўйидаги матлаъли газалини ким юқори баҳолаган эди?
Оразин ёпқоч кўзимдан сочиур ҳар лаҳза ёш,
Бўйлаким, пайдо бўлур юлдуз, ниҳон бўлғоч қуёш...
7. Навоий ҳақида қандай ривоятлар биласиз?
8. Навоий ҳақида қандай шеър ва қўшиқлар биласиз?
9. Навоий, Ҳусайн Воиз Кошифий ҳақида қайси асарида маълумот беради?

Топшириклар

1. Алишер Навоийнинг тил ва нутқ, нутқ одоби, нутқий маданият, нутқ санъати ҳақида айттан фикрларидан ёзинг.
2. Навоийнинг нотиқлиги ифодаланган ривоятлардан топиб ёзинг.
3. «Кўп деган кўп енгилур, кўп еган кўп йиқилур», мақолини изоҳланг.
4. «Ваъзхон шундай бўлиши керакки, унинг мажлисига бўш кирган одам тўлиб чиқсин; тўла кирган одам эса енгил тортиб, ҳоли қайтсин», фикрини изоҳланг.
5. «Тил шунча шарафи билан нутқнинг қуролидир. Агар нутқ номаъкул бўлиб чиқса, тилнинг оғатидир», маъносини изоҳланг.

Алишер Навоий

Алишер Навоий ибрат бўлгулик ҳаёт ва ижод йўлини босиб утди. Болалигидан зийрак ва қобилиятли бўлган Алишерни тўрт ёшида ўқишига берадилар. Ота ва она унинг ҳар томонлама билим олиши учун барча шарт – шароитларни яратиб берадилар. У адабий асарларни қунт билан ўқий бошлади. Саъдий, Фариидиддин Аттор асарларини қайта – қайта ўқир ва ёд олар эди. Алишер бадиий асарларни ўқиши ва урганиш билан кифояланиб қолмади. Унинг ўзи ҳам шеърлар ёза бошлади. 10 – 12 ёшларидаёқ бадиий завқи ва диidi ҳамда илк шеърлари билан танилиб, катта санъткорлар ва олимларнинг дикқатини ўзига жалб қилган эди. Навоийнинг замондоши тарихчи Хондамирнинг хабар беришича, кунлардан бирида анча кексайиб қолган Лутфий шогирди навқирон Алишердан ёзган янги шеърларидан ўқиб беришни сўраган. Навоий қуидаги матлаъли газални ўқиган;

Оразин ёпқоч кўзимдан сочилур ҳар лаҳза ёш,
Бўйлаким, пайдо бўлур юлдуз, ниҳон бўлгоч қуёш...

Бу ажойиб газалдан қаттиқ ҳаяжонланган Лутфий: «Агар мумкин бўлса эди, мен ўзимнинг форсий ва туркий тилларда айттан ўн-ўн икки минг байт шеъримни шу бир газалга алмашар эдим», – деган.¹

Навоий дўсти Ҳусайн Байқаро таҳтни эгаллагач, унинг саройида муҳрдор, вазир лавозимларини бажарди. Мамлакатнинг обод ва фаровон бўлиши, санъат ва адабиётнинг ривожланишига ўзининг бебаҳо ҳиссасини қўшди. Айни пайтда ижоддан бир соат ҳам бўшамай, узбек адабиёти хазинасини шеърий дурдоналар билан бойитди. Ўлмас асарлар яратди.

Алишер Навоий ижодида суҳбат ва нутқ одоби қоидалари қиёмига етказиб баён этилган.

Навоий сўзнинг ҳашамдорлигидан кўра, ҳаққоний-лигини улуғлади. Фикринг ҳалқ учун фойдали ва тушунарли бўлсин десанг, содда тиlda гапир, дейди:

¹ Қаранг: Н.М.Маллаев Узбек адабиёти тарихи. -Т. 1976. 363-364 – бетлар.

«Сўзки фасоҳат зеваридин музайян эмасдир, анга чинлик зевари басдур. Ёлгончи ҳар неча сўзида фасиҳроқ, сўзи қабиҳроқ. Чин сўз нечаким бетакаллуф, қойилги иборат соддалигидин йўқ таассуф».

Навоий яхши сўзли, эл учун фойдали нотиқларга ён босади. Уларнинг хизматини масжид имомларининг қилаётган ишларидан юқори қўяди. Шу туфайли улар учун имомларга нисбатан анча кўп маблаг ажратишни тавсия этади: «Воизга йиллик нақди беш юз олтун, бугдой ўн юк. Имомга масжиди жомеъда хатиб бўлиб, мактабдаги тутгай, йиллик нақди икки юз олтун, бугдой ўн юк».¹

Алишер Навоийнинг тил ва нутқ, нутқ одоби, нутқ маданияти, нутқ санъати ҳақида айтган фикрларида қадимий туркий халқларнинг нутқ маданияти борасидаги бой ва ноёб мероси маҳорат билан умумлаштирилган.

Навоий асарларида чунончи, нутқ одобининг талаблари ҳақида фикрлар бор.

1. Тилни, сўзни қадрла, уни ҳурмат қил:

Донау дур сўзини афсона бил,

Сўзни жаҳон баҳрида дурдона бил.

(«Хамса», 34-бет).

2. Яхши сўзли олиш (нутқ) – санъатдир, ноёб ҳунардир.

Уни эгаллашга интилгин:

Эрдин сўз ҳунар, энчдин бўз ҳунар

(«Маҳбуб ул-қулуб» 82-бет).

3. Инсоннинг одоб аҳлоқини белгилайдиган омиллардан бири унинг сўзи, нутқидир: Сувнинг мазаси муз била, ошнинг мазаси туз билà, одам яхшилиги сўз била.

(«Маҳбуб ул-қулуб» 79-бет).

Сўз зоҳир этар замир иши кўпрагидин,
Тил мухбир эрур кўнгул ниҳон эмгагидин,

Фаҳм айла киши ҳолини сўз демагидин,
Ким берди хабар ҳадиси кўнглидагидин
(«Назмул-жавоҳир»дан, 41-бет).

¹ Б.Уринбоев, А.Солиев. Нотиқлик маҳорати. -Т, 1984. 32-бет.

4. Кишининг сўзи (нутқи) унинг ақлий камолотидан дарак беради:

Одамки демак бирла киромийдиру бас,
Сўз дурри ишининг интизомидуру бас,
Сиҳҳат ончаки, аҳли ақл комидуру бас,
Ақлига далил аниңг қаломидуру бас.
(«Назмул-жавоҳир»дан, 25-бет).

5. Сўзлаганда дилинг билан тилинг бир бўлсин, чунки дилдаги тилга чиқади:

Ҳақ сени севгай эл била бўлсанг,
Тилу кўнглунгни бир қилиб биррўй,
Нуқта сурсанг шукуфтау хандон,
Зист қилсанг, кушодоу хушрўй.
(«Арбайн» дан, 59-бет).

6. Сўзлаганда ўйлаб сўзла, тушуниб, билиб гапир: Сўзни кўнглунгда пишқармагунча тилга келтурма, Ҳарнаким кўнглунгда бўлса тил сурма.

(«Маҳбуб ул-қулуб» 83-бет).

7. Хушмуомала, ширинсўз бўл. Тилинг билан кишиларга озор берма:

Ҳар кимки чучук сўз элга изҳор айлар,
Ҳар неки ағёр дуурў ёр айлар,
Сўз қаттиги эл кўнглига озор айлар.
Юмшоги кўнгулларни гирифтор айлар.
(«Назмул-жавоҳир» дан, 43-бет).

8. Чин, тўгри сўзла, нутқингда ҳалол бўл. Ёлгон сўз баҳтсизлик келтиради. Чин сўз мўътабар, яхши сўз муҳтасар... сўзки фасоҳат зеваридин муаян эмасдур, анга чинлик зевари басдур. Ёлгончи ҳар неча сўзида фасиҳроқ, сўзи қабиҳ.

(«Маҳбуб ул-қулуб» 63-бет).

Хирадманң чин сўздин ўзга демас,
Вале бари чин ҳам дегулук эмас.
Киши чинда сўз зебо, дурур,
Неча муҳтасар бўлса авло дурур.

(«Маҳбуб ул-қулуб» 83-бет).

9. Яхши, эзгу сўз (нутқ) кишига обрў, баҳт келтиради. Эзгу сўзли бўл:

Ким истаса мазҳари қаромат бўлмоқ,
Ҳар навъ ишда истиқомат бўлмоқ
Сўздир анга мўжиби гаромат бўлмоқ,
Тил забтидадур анга саломат бўлмоқ.
(«Назмул-жавоҳир» дан, 43-бет).

10. Тилдан туҳмат учун фойдаланма. Туҳматчидан қоч, ундан нафратлан:

Бировким ёлғон сўзни бировга боғлагай, ўз қаро бўлғон юзин ёғлагай. Кабира гуноҳдур – оз сўз ҳамки ўтрукдур, заҳра гуноҳдур – оз сўз ҳамки ўтрукдур, заҳри муҳлиқдур – агарчи миқдори ўксуқдур.

(«Маҳбуб ул-қулуб» 61-бет).

Эл айбини айтурга бировким узотир тил,
Ўз айбини фош айлагали тил узотур бил.
(«Маҳбуб ул-қулуб» 69-бет).

11. Тилингни тий. Кўп сўз, эзма ва вайсақи бўлма. Бу зарарлидир.

Бефойда сўзни кўп айтма ва фойдалиг сўзни кўп эшитурдин қайтма. Оз деган оз янчилур, оз еган оз ийқилур.

(«Маҳбуб ул-қулуб» 82-бет).

Тил илдамидин бўлур гаромат ҳосил,
Юз навъ надомату маломат ҳосил.
Оз сўзлагандин истиқомат ҳосил,
Соқитлигидин вале саломат ҳосил.
(«Назмул-жавоҳир» дан, 31-бет).

12. Сўзлаганда шароитни, сұхбатдошингни ҳисобга ол, беўрин сўз айтма... «...Золим ва бе дард сұхбатида нуқта сурма, наммом ва номард мулояматида дам урма. Доно илиқдин борғондин сўз айтма, ўтган йигитлик орзу билан қайтмас».

(«Маҳбуб ул-қулуб» 84-бет).

13. Бўшогиз бўлма, сұхбат сирларини сақлашга ўрган:

Қайси мажлисдаким эшитсанг сўз,
Билгил ул сўз санга омонатдур,
Гар ани ўзга ерга нақл этсанг,
Ул омонатга бу хиёнатдур.

(«Арбаин» дан, 57-бет).

14. Гапирганда қайтариқлардан қоч, чунки улар фикрнинг таъсирини сусайтиради:

Бир дегани икки демак хуш эмас,
Суз чу такрор топти дилкаш эмас.

(«Хамса», 484-бет).

Нутқ одобининг қайд қилинган маданий - аҳлоқий талаб ва асослари нутқ меъёрлари сифатида қадимиј даврлардан бери авлоддан - авлодга ўтиб келган. Ушбу нутқий меъёрларнинг сақланиши, ўзгартирилиши ва яшаб келишида оиласији анъанаалар, бир тил жамоаси доирасида амал қилинган анъанаавий қоидалар, сұхбатдошлар (сўзловчи ва тингловчилар)нинг бир-бирини ўзаро назорат қилиши, таълим тарбия, ўгит-насиҳат жараёни, шунингдек нутқий одоб меъёрлари ҳақида ёзилган адабиётларни мутолаа қилиш асосий ўрин туттган.

Демак, кишиларнинг қандайдир тўгри, таъсирчан, чиройли ва яхши гапиришга интилиши ва унга оид одатий қоидалар қадимиј тарихга эгадир. Бундай одат қадимиј ўтмишдан ҳозирга қадар мангуда анъана сифатида яшаб ва такомиллашиб келган. Бироқ, нутқ маданияти тушунчаси билан боғлиқ ушбу нутқий одатлар турли даврларда муаян хусусиятлари билан фарқланиб турган. Айниқса, адабий тил пайдо бўлгунга қадар мавжуд бўлган нутқ одоби (нутқ

маданияти) тасаввурлари, адабий тил пайдо бўлгандан кейинги давр нутқ маданияти тасаввуридан фарқланади.¹

НАСИҲАТ АҲЛИ ВА ВОИЗЛАР ЗИКРИДА

Воиз керакки, «қолаллоҳ» сўз айтса ва «қола расулуллоҳ» муҳолафатидин қайтса, худо ва расул йўлиға қадам урса. Ўзи киргондин сўнгра насиҳат била элни ҳам кивурса. Юрумагон йўлга элни бошқармоқ - мусофири ни йўлдин чиқормоқдур ва биёбонга кетурмак ва бодияда итурмақдур. Усрукки, элга буюргай хушёриқ - уйқувчиликдурки, элга буюргай бедорлиқ. Ўйқусида сўз деган жевлиғон бўлур ва дегондек қилмоқ не дегон бўлур.

Ваъз бир муршид ва огоҳ ишидур ва анинг насиҳатин қабул этган мақбул кишидур. Аввал бир йўлни бормоқ керак, андин сўнгра элни бошқармоқ керак. Йўлни юрмай кирган итар ва гайри мақсад ерга етар.

Воиз улдурки, мажлисиға холи кирган тўлгай ва тўла кирган холи бўлгай. Воизким, бўлгай олим ва мутаққий - анинг насиҳатидин чиқсан шақий. Улки, буюриб ўзи қилмағай, ҳеч кимга фойда ва асар анинг сўзи қилмағай. Назоирхон била сургувчи мақол - дastiёр била йирлагувчи қаввол.

Қитъа:

Воизки, дастёrsиз ўлmas сухангузор,
Анга ёроду мунга аёлгувчи ҳукми бор.
Тенгри сўzin аёлгувчи бўlmай дея олмагай,
Бир соз бўлса ҳам керак ул қилгай ихтиёр.²

Тилга ихтиёrsиз - элга эътиборсиз. Ҳарзагўйким, кўп тақаллум сургай, итдебдурким, кеча тонг отқунга ҳургай. Ямон тиллик андоқким эл кўнглига жароҳат еткуур, уз бошиға ҳам оғат еткуур. Нодоннинг муваҳҳиш-ҳарзага бўғзин кирмоги-эшакнинг жиҳатсиз қичқирмоги.

¹ Р.Қўнгуроров ва б. Нутқ маданияти ва услубият асослари. 24-25 бет.

² Алишер Навоий. Муқаммал асарлар тўплами. 14-том -Т. 1998. 32-33 - бетлар.

Хўшгўйким, сўзни рифқ ва мусово била айтгай, кўнгулга юз гам келадургон бўлса, аниг сўзидин қайтгай. Сўздадур ҳар яхшилиқни имкони бор, мунда дебдурларки, нафаснинг жони бор. Масиҳоким, нафас била ўлукка жон берди, гўё бу жиҳатдин эрди.

Макруҳеки, ҳарзаси тавил ва овози кариҳдур, ўзи савти била қурбақага шаҳибдур. Аҳли саодатлар руҳбахш зулолига манбаъ ҳам тил, аҳли шақоватлар наҳс қавқабига матлаъ ҳам тил. Тилига иқтидорлиғ-ҳакими хирадманд; сўзига ихтиёрсиз – лайми нажанд. Тилки фасиҳ ва дилпазир бўлгай-хўброқ, агар кўнгул била бир булгай.

Тил ва кўнгул хўброқ аъзодурлар инсонда; савсан ва гунча маргуброқ раёҳиндурулар бўстонда. Одаме тил била сойир била ҳайвондан мумтоз бўлур ва ҳам аниг била инсонга сарафroz бўлур. Тил мунча шараф била нутқнинг олатидур ва ҳам нутқдурки, агар нописанд зоҳир бўлса, тилнинг офатидир.

Айн ул-кузот тил шарафидин Масиҳ гуфтор бўлди ва Ҳусайн Мансур тил сурътидин дорга сазавор.

Байт:

Ҳар неча бийми ҳажр сўзи ошиқ ўлтурур,
Вуслат башорати яна жисмига жон берур.

Тилдин азубат дилписандтур ва лийнат судманд. Чучук тилки, аччиғлиққа эврулди, зарари ом бўлди, қандники, мускир бода қилдилар, харом бўлди. Чучук сўз соғ кўнгулларга қўшдур, барча атфол табъига мулоийим ҳалвофурушдур.

Байт:

Хуш сўзга ким ўлса маству беҳуш,
Шарбат аро заҳрни қилур нўш.

Ҳаркимки, сўзи ёлгон зоҳир бўлгоч уёлгон. Ёлгонни чиндек айтқувчи суханвар-кумушни олтун рўкач қилувчи заргар. Ёлгон афсоналарда уйлтирғувчи, ёлгончи уйқуда

такалмум сургувчи. Ёлгон айттuvчи гафлатдадур. Сўзнинг аснофи багоят чўқдур, ёлғондин ямонроқ синфи йўқдур.

Улки ёлғон била сарфи авкот эттай, анга бу ямон келмагай яна мубоҳот эттай. Агар мустамиъинни го菲尔 топқай, ёлғонин чинга ўткарса мақсадин ҳосил топқай. Зиҳи тенгрига ямон, не тенгридин, не халқдин шарманда. Мундоқ наҳснинг чун эрур юзи ямонлик сари, бу нуҳсатшиор қутлуг уйдин ташқари.

Байт:

Ул кишини қутлуг эвдин ташқари сурмак керак,
Қутлуг эв дунё дурур, яъники, ўлтурмак керак.

Бирорким, ёлғон сўзни бирорга боғлагай, ўз қаро бўлғон юзин ёқлагай, кабира гуноҳдур-агарчи миқдори ўксуқдур.

Байт:

Захрнинг оз эса миқдори доги муҳлиқдур,
Игнанинг нўти заиф эрса доги кўр қилур.

Улки, сўзни бир ердин яна бир ерга еткургай, элнинг утган гуноҳини ўз бўйнуға индургай. Намомлиқ чин сўзга маъмнудур. Агар зуҳур эттай-хаёл қилки, ёлғон сўзга не еттай. Сўз тергувчининг агар улуғи, агар кичиги-билик эрурлар тамуг ўтининг тутруги.

Байт:

Ким сўзни териб айттuvчи оғзига бергай,
Молик ани дўзах ўтининг дудига тергай.

Улки, жуз қувват даъвиси изҳор қилмас, гўёки, ҳақнинг қавий ул-матин эрканин билмас. Одамеки, қувват хаёлин кўнглига кечиур-туфрогедурким, ел ургоч учурур. Дунё дор ул-ҳаводисдур ва анга кўнгул боғламоққа гафлат боисдур. Олам умрдек бевафодур ва анинг давлатига эътимод қилмоқ хато.¹

¹ Р.Қўнгуроров ва б. Нутқ маданияти ва услубият асослари. 22-23-24 - бетлар.

Адабиётлар

1. Алишер Навоий. Муқаммал асарлар тўплами. 13 том. Т.: 1997.
2. Алишер Навоий. Муқаммал асарлар тўплами. 14 том. Т.: 1998.
3. Алишер Навоий. Вақфийя. Т.: 1991.
4. Алишер навоий. Лисонут тайр. 11 том. Т.: 1996.
5. Б.Аҳмедов. Навоий замондошлари хотирасида. Т.: 1985.
6. Б.Ҳасанов. Навоий асарлари учун қисқача лугат Т.: 1993.
7. М.Жўраев. Эл деса Навоийни Т.: 1991.
8. Б.Үринбоев, А.Солиев. Нотиқлик маҳорати Т.: 1984.
9. Нусратулло Атоумло ўтли Жумахўжа. Истиқдол ва она тилимиз Т.: 1998.
10. Н.М.Маллаев. Ўзбек адабиёти тарихи. Т.: 1976.
11. Р.Қўнгурев, Э.Бегматов, Ё.Тожиев. Нутқ маданияти ва услубияти асослари Т.: 1992.

ҲУСАЙН ВОИЗ КОШИФИЙ ИЖОДИДА НУТҚ ВА НОТИҚЛИК САНЪАТИ МАСАЛАЛАРИ

Саволлар

1. Ҳусайнин Воиз Кошифийнинг воизлик санъатига бағишланган қандай асарлари мавжуд?
2. Алишер Навоий ва Ҳусайнин Воиз Кошифий ўртасидаги муносабат қандай бўлган?
3. Воиз ва Кошифий сўзларининг маъноси нима англатади?
4. Ҳусайнин Воиз Кошифий ҳақида нималарни биласиз?

Топшириқлар

1. Ҳусайнин Воиз Кошифийнинг «Футвватномаи султоний» асаридаги нутққа, нутқ санъатига оид фикрларни аникланг.
2. Ҳусайнин Воиз Кошифий маддоҳларни неча гурухга ажратади.

ҲУСАЙН ВОИЗ КОШИФИЙ

Ҳусайнин Воиз Кошифий XV асрда Ҳиротда яшаб ижод этган таникли олим ва нотиқ бўлган. Унинг «Тафсири Ҳусайн», «Ахлоқи Мұхсиний», «Анвори Сұхайлий» каби асарлари жуда машҳур бўлган. Ҳусайнин Воиз Кошифий Алишер Навоийнинг замондоши ва дўсти бўлган. У нотиқлиқда, хусусан, вაъзхонлиқда ниҳоятда машҳур бўлганлиги учун ҳам «воиз» унвонига сазовор бўлган. «Кошифий» - кашф этувчи, деган маънени англатади. Одамлар Ҳусайнин Воизнинг ҳар бир ваъзидан сўнг янги-янги нарсаларни кашф қилганлар, эгаллаганлар. Ҳусайнин Воиз Кошифийнинг асарларида ҳикоя, ривоят, шеърий парчалар жой олган бўлиб, юксак ахлоқий ғоялар - поклик, имон, эътиқод, эзгулик тараннум этилади. Унинг асарларида панд-насиҳат ва ҳикмат кенг ўрин олган. Ҳусайнин Воиз Кошифийнинг «Футвватномаи султоний» асарида жавонмардлик, унинг қоида ва хусусиятлари асослаб берилган. Айниқса, футувват асослари ва тасаввуф ғоялари ўртасидаги ўхшашлиқ кенг талқин этилган. Ҳусайнин Воиз Кошифий 1505 йилда Ҳиротда вафот этган.

ФУТУВВАТНОМАИ СУЛТОНИЙ ЁХУД ЖАВОНМАРДЛИК ТАРИҚАТИ

Иккинчи фасл: Маърака тузувчи сўз аҳли ҳақида.

Улар уч тоифа бўладилар: биринчи тоифа - маддоҳлар, газалхонлар ва саққоллар. Иккинчи тоифа - хосагўйлар ва бисотандозлар. Учинчи тоифа - қисса сўйлагувчилар ва афсона айтувчилар (яъни, баҳшилар). Буларнинг ҳар бири ҳақида алоҳида қисмларда тўхтаб ўтамиз.

Биринчи қисм. Маддоҳлар ва газалхонлар зикрида

Шуни билгилки, футувват аҳли (аҳли шадд) орасида маддоҳларнинг мартабаси энг баланддир. Бунинг сабаби шуки, аҳли байт, хонадон муҳаббати барчанинг кўнглида мавжуд ва агар бирор бошқа бирорни севса, севгилисининг таърифини тилидан қўймайди... Маддоҳлар шундай хусусиятга эга кишилардирлар ва узлуксиз аҳли байт таърифида сўз айтадилар ва хонадоннинг ёдида сўз айтиш билан вақт ўтказадилар.

Агар маддоҳлар неча хил бўлади, деб сўрасалар, тўрт хил деб айтгил: Биринчидан - ўзлари бадеҳатан ижод қилувчилар, улар ўзлари шеър айтиш қобилиятига эга бўлиб, ҳикояту ривоятларни назмга тушуриб, баён қиласерадилар. Иккинчи хили - бошқа шоирларнинг шеър, ҳикоя ёки бадеҳаларини ижро этиб, халққа фойда етказувчилардир. Бу тоифани ровийлар деб атайдилар ва улар ҳам маддоҳлар жумласидандирлар. Учинчи хили маддоҳлик баробарида бошқа ишлар билан ҳам шуғулланиб, халққа файз етказувчилардир. Масалан, саққолар (сув таркатувчилар) шундай кишилар бўлиб, уларнинг ишидан одамлар хурсанддирлар. Тўртинчи тоифа ҳар ердан ҳар хил байтларни ёд олган кишилар бўлиб, улар эшикма-эшик юрадилар, касида айтиб нон йигадилар ва маддоҳликни гадойлик, деб тушунадилар. Буларни агарчи қиёфаларига караб маддоҳ десаларда, аслида ушбу жамоага мувофиқ эмасдирлар.

Агар маддоҳлик одоби нечта бўлади, деб сўрасалар, бешта деб айтгил: аввал шуки, доимо такво ва таҳоратда бўлсин... Учинчидан, ғаразли ниятда ва қасд олиш учун маддоҳлик қилмасин. Тўртинчидан, бойликка берилган бўлмасин. Бешинчидан, мадхда ошириб муболаға қилиш билан шуғулланмасин.

Агар маддохнинг нечта сифати бўлиши керак, деб сўрасалар, айттилки, маддохнинг йигирма сифати бўлади. Булар: сидҳ, сабр, шукур, зудҳ (парҳез), тоат, қаноат, муҳосаба (умр ҳисобини олиш), муроқаба, худо ёдида тафаккурга берилиш (тавозуъ, таслим, ихлос, қарам, нисор, муҳоҳада (жиду жаҳд килмок), тафаккур, таваккул кам ейиш, кам ухлаш ва шафқатли бўлиш.

Агар маддоҳ ҳазар қиласидаган сифатлар нечта, деб сўрасалар, ўттизта деб айтгил. Булар: ғафлат, ғурур, айбжўйлик, риё, майхўрлик, қаро кўнгиллилик, зино, бадаҳлоқлик, жанжалкашлик, ярамас ва ношониста сўз айтиш, ваъдани бузиш, масхара-мазах қилиш, ноўрин таъна, ёлғон гапириш, ёлғон қасам ичиш, биродарларни гийбат қилиш, тухмат қилиш, гап ташиш, ғаммоғлик, ҳасад, маккорлик, одамларни ёмонлаш, бойликка ҳирс қўйиш, зулм, баҳиллик, кўп ухлаш ва кўп ейиш.

Агар маддоҳлар бир-бирлари билан муносабатда қайси қоидаларга риоя қилишлари керак, деб сўрасалар куйидаги олтига қоидага деб айтгил: аввал шуки, бир-бирлари билан дўст бўлсинлар... Учинчидан, бир-бирлари билан келишмай иш бошламасинлар. Тўртинчидан, заиф-ожизаларни қаторларидан суруб чиқармасинлар. Бешинчидан, бир-бирларининг ҳурматини саклашда қилча гумон-шубҳага йўл қўймасинлар, токи ҳамма ерда муҳтарам ва азиз бўлсинлар.

Агар маддоҳлар неча хил бўлади, деб сўрасалар, уч хил деб айтгил. Бир хиллари фақат шеър ўқийдилар, шеърни равон ва ифодали ўқиб, тингловчиларга завқ бағишлидилар. Иккинчи хиллари насрый асарлар, мўъжаз гаплар, ибора ва таърифу тавсифлар (қасидахонликни) наср билан адо этадилар ва бу тоифани ғарраҳон (чиройли ўқийдиганлар) деб атайдилар. Учинчи хиллари наср ва назмни аралаштириб ўқийдилар. Бу тоифани мурассаҳон (сўз устаси), деб айтадилар. Ва буларнинг камол фазли, мартабалари олдинги икки гуруҳдан баланддир.

Агар маддоҳларга хос аломатлар нимадан иборат, деб сўрасалар, айтгил: маддоҳларнинг ўзига хос аломати тўн ва хирқа кийищда эмас. Улар ҳар қандай тўнни кийиб юришлари мумкин. Аммо уларнинг бошқалардан ажралиб турувчи ташки аломатлари бор. Бу - найза, тавқ (халқа, белбоғ) суфра (дастурхон), чироқ ва болта (курол) олиб юришларидир... Найза - ўзини ҳимоя қилиш белгиси, тавқ - маддохнинг қайси мартабада эканлигини кўрсатувчи белги, дастурхон - сахийлик ва қўли очиқлик аломати, чироқ -

кўнгил равшанлиги, яъни футувват эрлари муҳаббатини кўнгил ичида ёник сақлаш, ўзини ёндириб бўлса ҳам, ўзгаларни иситиш, ўзгалар дилига ёруғлик, сафо бағишлиш аломати...

Учинчи қисм. Қиссаҳонлар ва афсона айтувчилар ҳақида

Шуни билки, қисса ўқиши ва қисса эшитишнинг фойдаси катта. Биринчидан, киши ўтган аждодларнинг иши ва ахволидан хабардор бўлади. Иккинчидан, одам ғаройиб ва ажойиб воқеа, саргузаштларни эшитса, фикри ва кўзи очилади. Учинчидан, ўтганларнинг заҳмату укубатларидан хабардор бўлса, ҳеч ким бу дунёда ташвишгамдан озод эмаслигини англаб, кўнгли таскин топади, тасалли бўлади. Тўртингидан, ўтган подшолар давлати ва мулкининг заволини эшитса, дунё молига меҳри сусаяди, бойлик кишига вафо қилмаслигини билиб олади. Бешинчидан, қисса эшитган беҳад кўп ибрат олади, тажриба орттиради. Бас, маълум бўладиким, ўтмиш аждодларнинг қиссаларида фойда кўп, агар бўлиб ўтган воқеалар бўлса, айтувчи ва ўкувчи билан бирга эшитувчи ҳам ундан нафъ топади ва агар гайри воқеъ (тўқима) бўлса, айтувчи учун гуноҳ ҳисобланса-да, аммо эшитувчи учун фойдали ва савобдир...

Агар маъракада курси (сандали) кўйишнинг маъноси нима, деб сўрасалар, жавоб бериб айтгил: бунинг маъноси шуки, кимнингким истеъоди хунари бўлса, у қолган одамлардан баландроқ ўтиришга лойик, чунки бошқалар унинг дийдоридан баҳраманд бўлишлари керак. Агар сандалинин ким учун қўядилар, деб сўрасалар, санъаткор, хунарманд кишилар учун деб айт. Зеро подшолар ҳам паҳлавонликда, сўз хунарида ном қозонгандарни сийлаб, уларни курсига ўтқазадилар. Бас, сўз майдонининг паҳлавони бўлган кишиларни курсига ўтқазиб, қадрласа арзиди. Агар курсининг нечта рукни бор, деб сўрасалар, тўртга деб айтгил: иккита остки ва иккита устки рукнлар. Иккита устки рукн нимага ишора, деб сўрасалар, айтгил: бири - билим ва иккинчиси - ақлу фаросат, зехну заковатга ишора. Яъни сандалида ўтирган одам билими ва заковати билан ҳар бир маъракада қандай сўзга талаб борлигини англасин ва шунга қараб сўз айтсин. Сандалининг остки икки рукни нимага ишора, деб сўрасалар, бири - сабрга, иккинчиси - саботга ишора деб айтгил. Яъни, сандалига чиқиб ўтирган одам чидамли бўлиши, ўз ишига мустахкам, событ бўлмоғи лозим. Ҳар нарсага ўрнидан туриб, енгилтаклик қилмаслиги керак.

Агар қиссаҳонлик неча хил бўлади, деб сўрасалар, икки хил бўлади деб айтгил: биринчиси ҳикоят айтиш (ўқиш), иккинчиси - шеърхонлик. Ҳикоят айтишнинг эса саккизта қоидаси бор. Аввал шуки, қиссаҳонлик бошланганда, агар киши қиссани бошловчи бўлса, у устоз тъалимини олган, устоз ҳузурида ўткарган киши бўлиши керак. Ва агар қиссани тугатувчи бўлса, ўзи мустақил такрорлаган бўлсин, токи эсидан чиқиб, тутилиб қолмасин. Иккинчидан, чапдастлик билан дадил сўзга киришсин, ҳомлик ва ланжлик кўрсатмасин. Учинчидан, маърака қандай асарни қабул қилишини англасин ва эл рағбати кўпроқ бўлган асарларни танласин. Аммо меъёрни сақласин. Тўртинчидан, ҳикоя давомида насрни гоҳи-гоҳида назм билан кўшиб олиб борсин, лекин бу эшитувчиларга малол келмайдиган даражада бўлсин. Улуғ устозлар: назм-қиссаҳонлиқда бамисоли таомга солинадиган туздир - агар кам бўлса, таом таъмсиз бўлади ва агар кўпайса шўр бўлади, деганлар. Бас, меъёрни сақлаш лозим. Бешинчидан, ёлгон ва ишонарсиз сўзларни гапирмасин, токи элнинг назаридан қолмасин. Олтинчидан, кинояли тушунилмайдиган сўзларни айтмасин, чунки бу эшитувчиларни ранжитади. Етингчидан, тамаъ билан одамлар жонига тегмасин, гадойлик қилмасин. Саккизинчидан, қиссаҳонликни тез тугатмасин ва ҳаддан зиёд чўзмасин ҳам, ўрталиқни сақласин.

Агар шеърхонлик одоби нечта, деб сўрасалар, олтита деб айтгил: биринчидан, шеърни оҳонг билан ўқисин, иккинчидан, сўзни одамлар қалбига жойлай олсин. Учинчидан, агар бирор мушкил (тушинилиши оғир) байт пайдо бўлса, йигилгандарга уни шарҳлаб, мазмунини изоҳлаб берсин. Тўртинчидан, эшитувчига малол келадиган иш қилмасин. Бешинчидан, гадойлик қилмасин, муболағали қасамлар ичмасин. Олгинчидан, ўқиган шеърининг муаллифини маърака охири ёки бошида тилга олиб, дуо қилсин.

Афсона айтувчилар ҳам қиссаҳонларга ўхшаш бўлиб, айтиб ўтилган қоидалар уларга ҳам тегишлидир.

АБДУЛЛА АВЛОНИЙНИНГ «ТУРКИЙ ГУЛИСТОН ЁХУД АХЛОҚ» АСАРИДА НОТИҚЛИК МАСАЛАСИ

Саволлар

1. Абдулла Авлонийнинг қандай асарларини биласиз?
2. «Туркий гулистон ёхуд ахлоқ» қандай асар ва у неча бобдан иборат?
3. Асарда одамлар хулқи, хатти-ҳаракати нуқтаи назаридан неча гурухга бўлинади?
4. Муаллиф тарбиянинг қандай турлари ҳақида фикр юритади?
5. Бола тарбиясида нималар муҳим эканлигини таъкидлайди?
6. «Ҳифзи лисон» деб нимага айтилади?
7. Абдулла Авлоний миллий тилни сақлаш масаласида нима дейди?
8. Ахлоқ нима ва унинг қандай кўринишлари бор?
9. Хулқ нима ва унинг қандай кўринишлари бор?
10. Диёнат деганда нимани тушунасиз?

Топшириқлар

1. Туркий гулистон ёхуд ахлоқ асарини синчилаб ўқинг.
2. Асар юзасидан баҳс-мунозара ўтказиш учун саволлар тузинг.
3. Асардан керакли ва муҳим ўринларни дафтaringизга ёзиб олинг.
4. Киши табиати билан боғлиқ бўлган сўзларни изоҳи билан ёзинг.
5. Виждон, ҳаё, диёнат, қаноат, сабр, илм, адолат тўғрисида қисқа ёзиб олинг.
6. Ёмон хулқлар: газаб, жаҳолат, адоват, намимат, гийбат, ҳақорат, ҳасад, тама тўғрисида қисқача дафтaringизга ёзиб қўйинг.
7. Яхши ва ёмон хулқларни ифодаловчи сўзларни ўзбек тилининг изоҳли лугати ёрдамида кўчириб ёзинг.
8. Ватан туйғуси китобини ўқинг ва баҳсга тайёргарлик кўринг.

АБДУЛЛА АВЛОНИЙНИНГ «ТУРКИЙ ГУЛИСТОН ЁХУД АХЛОҚ» АСАРИДА НОТИҚЛИК

Абдулла Авлонийнинг педагогикага оид асарлари ичида унинг 1913-йилда ёзган ва 1917 йилда иккинчи бор нашр қилинган «Туркий гулистон ёхуд ахлоқ асари» XX аср бошларидағи педагогик фикрлар тараққиётини урганиш соҳасида катта аҳамиятта молиқдир. Бу асар мазмун томонидан муаллифнинг бошқа ижтимоий ва педагогик асарлари билан узвий bogлиқдир.

XX аср бошларида бундай асарни узбек тилида биринчи бўлиб Абдулла Авлоний яратди ва таълим - тарбия ишларида уни тадбиқ этди. Абдулла Авлоний араб, форс, рус ва озарбайжон тилларини яхши билган олим эди. Унинг қардош халқлар ва чет тилларини билиши педагогик ва поэтик ижодининг тараққиёти учун катта замин ҳозирлади.

«Туркий гулистон ёхуд ахлоқ» китоби катта - кичик 64 бобдан иборат бўлиб, ҳар бир боб таълим - тарбия масаласига багишланади ҳамда бири иккинчисини тўлдиради, такомиллаштиради. Ёзувчи бу асарини яратишда халқ педагогикасидан кенг фойдаланади.

Абдулла Авлоний «Тарбия» сарлавҳаси остида тарбия турлари ҳақида фикр юритади: 1. «Тарбиянинг замони», 2. «Бадан тарбияси», 3. «Фикр тарбияси», 4. «Ахлоқ тарбияси». Болани тарбиялашда бу тўрт масала ғоят муҳим аҳамият қасб қилишини таъкидлайди.

Бола тарбиясида муаллиф бола яшаб турган шароит, муҳит, кишиларнинг роли катта эканлигини кўрсатади ва бу соҳа оила, мактаб шароитини ҳам назар-эътибордан четда қолдирмайди. Тарбия боланинг аҳлоқига, хулқатворига кучли таъсир этишни эътироф қиласида ва отоналарни ўз болаларини тарбия қилишга чақиради. Таълим билан тарбия бир-бири билан bogлиқ бир бутун жараён эканлигини таъкидлайди.

Абдулла Авлоний тил масаласига катта эътибор беради, тилни халқ билан boglab талқин қиласи: «Ҳар бир миллатнинг дунёда борлигин кўрсатадурган ойинайи ҳаётини тил ва адабиётидур». У ўз асарида ҳар бир кишининг ўз она тилини мукаммал билиши, ҳар бир сўзни ўз ўрнида

ишлатиши, миллий-адабий тилнинг тараққий учун жонкуярлик қилиши зарурлигини қайд қиласди. «Ҳифзи лисон» деб ҳар бир миллат ўз она тили ва адабиётини сақламакни айтилур».

«Туркий гулистон ёхуд ахлоқ»нинг биринчи саҳифасидан то сўнгги саҳифасигача Авлонийнинг инсон-шарварлик гоялари ифодаланган. У ҳамма нарсадан аввал халқ манфаатини қўзлашни, халққа хизмат қилишни биринчи ўринга қўяди.

Абдулла Авлоний инсоннинг энг ёмон хулқларидан гийбат ва довлатнинг бир-бирига яқинлигини ва гийбатнинг оқибати довлат билан тугашини кўрсатиб ўтади. У дейди: «Гийбат соҳиби лаззат ўрнига ўз бошига ёки бир бошқа кишининг бошига бир бало ҳозирлайдур. Чунки сўз боруб гийбат қилинмиш кишининг қулогига етар, газаб қони ҳаракатта кирап, гийбатчидан уч олмак фурсатини пойлар... Шу тариқа гийбатдан туттилган довлат чўзилмоқга оид бўлиб, душманлик зўрайиб, ўз ораларидаги хусусий жанжаллар ила азиз умрларини ўздируб, умумий халқ фойдаси учун ишланадурган миллий ишлардан маҳрум бўлмаклари ила баробар аҳолининг орасидан иттифоқнинг йўқолувига сабаб бўлурлар».¹

Ахлоқ

Сўйласанг сўйла яхши сўзлардан,
Йўқса жим турмоқинг эрур яхши.
Ўйласанг яхши фикрлар, ўйла,
Йўқса гунг бўлмоқинг эрур яхши.
Ишласанг ишла яхши ишларни,
Йўқса бекорлигинг эрур яхши.²

Фикр тарбияси

Фикр тарбияси энг керакли, кўп замонлардан бери тақдир қилинуб келган, муаллимларнинг диққатларига суялган, вижданларига юкланган муқаддас бир вазифадур. Фикр инсоннинг шарофатлик, гайратлик бўлишига сабаб

¹ Қаранг. Абдулла Авлоний. Туркий гулистон ёхуд ахлоқ. Т. 1992. 3-9 – бетлар.

² Абдулла Авлоний. Ўша асар. 17-бет.

бўладур. Бу тарбия муаллимларнинг ёрдамига сўнг даража муҳтождурки, фикрнинг қуввати, зийнати, кенглиги муаллимнинг тарбиясига боғлиқдур. Дарс ила тарбия орасида бир оз фарқ бор бўлса ҳам, иккиси бир – биридан ойилмайдурган, бирининг вужуди бирига бойланган жон ила тан қабидур.

Масалан: жой солинмаган яхши бир уйнинг ичида ўтирум мумкин ўлмадиги қаби, ичига ҳар хил янги ашёлар тўлдуруб зийнатланган эски иморат ҳам ўлтуришга ярамайдур. Башарти ўлтурса, инсонлар: «Эски уйга янги золдивор», «Кир кўйлакка жун жияк», «Мис қозонга лой тувоқ» деб ҳажв, кули қилурлар.

Фикр агар яхши тарбият топса,
Ханжар, олмосдан бўлур ўткур.
Фикрнинг ойинаси олурса занг,
Руҳи равшан замир ўлур бенур.¹

Яхши бирла юрса, ҳар ким мақсади ҳосил бўлур,
Юрса нодонлар ила, бир кун бориб қотил бўлур.
Катталар қилган насиҳатни кичиклар олмаса,
Оқибат хулқи бузуқ бир беадаб жоҳил бўлур²

Иффат

Иффат деб нафсимизни гуноҳ ва бузуқ ишлардан сақламоқни айтилур. Бошимизга келадурган кулфат ва заҳматларнинг аксари ёмон тилимиздан, андозадан ортиқ сўйлаганимиздан келур.

Ўйламай сўйлаган огримай ўлар,
Фикр ила сўйлаган йигламай кулар.

Ҳифзи Лисон

Ҳифзи лисон деб ҳар бир миллат ўз она тил ва адабиётини сақламагини айтилур. Ҳар бир миллатнинг дунёда борлигин кўрсатадурган ойинаи ҳаёти тил ва адабиётидур. Миллий тилни йўқотмак миллатнинг руҳини

¹ Абдулла Авлоний. Уша асар. 15-бет.

² Абдулла Авлоний. Уша асар. 17-бет.

йўқотмақдур. Ҳайҳот! Биз туркистонликлар миллий тилни сақламак бир тарафда турсун кундан - кун унутмак ва йўқотмақдадурмиз. Тилимизнинг ярмига арабий, форсий улангани камлик қилуб, бир четига рус тилини ҳам ёпишдирмақдадурмиз. Дуруст, бизларга ҳукуматимиз бўлгон рус лисонини билмак ҳаёт ва саодатимиз учун ош ва нон каби кераклик нарсадур. Лекин ўз еринда ишлатмак ва сўзламак лозимдур. Зигир ёғи солуб, мошкичири каби қилуб, аралаш-қуралаш қилмак тилнинг руҳини бузадур.¹

«Ёҳу! Бизга на бўлди? Боболаримиз йўлидан чиқуб кетдук. Яхши қўшнингдан олгунча ёмон уйингни қидир», - демишлар. Боболаримизга етушгон ва яраган муқаддас тил ва адабиёт бизга ҳеч камлик қилмас. Ўз уйимизни қидирсан ва аҳтарсан, йўқолганларини ҳам топармиз. «Йўқолса йўқолсун ўзи бошимга тор эди», - деб Ёврupo қалпогини киюб, кулги бўлмак зўр айб ва уятдур. Пайғамбаримиз: «Эрларда жамол лисон ва тилдур», - демишлар.

Эй она тил, азиз қадрдоним,
Илтифоти руҳим, раҳмоним,
Тугидигим кундан айладинг улфат,
Ўлгунча айилма, эй жоним.
Менга илму адаб сан ўргатдинг,
Чин адаб, муаллим шоним.
Миллатинг руҳини кўтаргучисан
Энг муқаддас карамли султоним.

Умумий миллий тилни сақламак ила баробар хусусий оғиз орасидаги тилни ҳам сақламак лозимдир. Чунки сўз инсоннинг даража ва камолини, илм ва фазлини ўлчаб кўрсатадурган тарозисидур. Ақл соҳиблари кишининг дилидаги фикр ва ниятини, илм ва қувватини, қадр ва қийматини сўзлаган сўзидан билурлар. «Қуруқ сўз қулоқга ёқмас», - демишлар.

Агар сўз ақл ва ҳикматта мувофиқ бўлуб, ўзига ёки эшитувчига бир фойда чиқадурган бўлмаса, асалларилари

¹ Абдулла Авлоний. Уша асар. 32-бет.

орасида гунгуллаб юрган қовоқлари каби қуруқ гунгулламоқ фақат бош оғригидан бошқа бир нарса эмасдур. Башимизга келадурган қаттиғ кулфатларнинг күпи юмшоқ тилимиздан келадур. Шунинг учун: «Куп уйла, оз сўйла», - демишлар.

Тилларнинг энг яхшиси сўзга уста тил, сўзларнинг энг яхшиси билуб, охирини ўйлаб сўйланган сўздур.

Гузаллик юзда эрмас, эй биродар,
Сўзи ширин киши ҳар кимга ёқар.
Сўзинг оз бўлсину маъноли бўлсун,
Эшитканлар қулоги дурга тўлсун.
Сўзинг бўлса кумуш, жим турмак олтун.,
Миси чиқай сўзинг кўп бўлса бир кун.
Кўпайган сўзни бўлгай тўгриси оз,
Шакарнинг кўпидан ози бўлур соз.

Ғийбат

Агар журму гунаҳ бўлсун десанг оз,
Тилингни сақла гийбатдан қишу ёз.
Қулоққа пахта тик, гийбат эшитма,
Шикоятчи кишига бўлма дамсоз.¹

Адоват

Адоват балоси бизларни нетди,
Адоват қилма деб ҳақ бизга айтди.
Зудлик қилдуқ, мол ва давлатлар кетди,
Молдан ўтуб, охир жонларга етди.²

Адабиётлар

1. Абдулла Авлоний Туркий гулистон ёхуд ахлоқ. Т.: 1992.
2. А.Иброҳимов, Х.Султонов, Н.Жураев. Ватан туйгуси Т.: 1996.

¹ Абдулла Авлоний. Уша асар. 51-бет.

² Абдулла Авлоний. Уша асар. 15-бет.

МУНДАРИЖА

Кириш	3
«Нутқ маданияти ва нотиқлик санъати» курсининг мақсад ва вазифалари.....	5
Нутқ маданияти ва адабий меъёр. Нутқий малака.....	13
Ўзбек адабий тили ва нутқ маданияти.....	19
Нутқнинг коммуникатив сифатлари.....	23
Тил ва нутқ. Нутқ одоби. Тил ва маданият.....	34
Нутқ маданияти ва услубшунослик.....	40
Нутқ ва терминология	45
Нотиқлик санъати тарихидан	52
Нотиқликнинг турлари.....	64
Адабиётлар.....	68
Ғарб маданияти тарихида нотиқлик санъатининг ўрни.....	69
Шарқ маданияти тарихида нотиқлик санъатининг ўрни.....	75
Халқ оғзаки ижодида нутқ одоби масалалари	93
Кайковуснинг «Қобуснома» асарида сухандонлик хусусида.....	103
Алишер Навоий ижодида нутқ маданияти ва нотиқлик санъати масалаларининг талқини.....	110
Ҳусайн Воиз Кошифий ижодида нутқ маданияти ва нотиқлик санъати.....	120
Абдулла Авлонийнинг «Туркий гулистон ёҳуд ахлоқ» асарида нотиқлик масаласи.....	125

**Расулов Равшанхўжа,
Ҳусанов Нишонбай Абдусатторович,
Мўйдинов Ҷодир Абдурасулович**

**«НУТҚ МАДАНИЯТИ ВА НОТИҚЛИК САНЬАТИ»
(ўқув қўлланма)**

Муҳаррир: Э. Бозоров

Босишига рухсат этилди	28.09.2006.
Қоғоз бичими	30x42
Ҳисоб-нашр табоғи	8.25 б.т.
Адади	200
Буюртма	№ 220

**“IQTISOD-MOLIYA” нашриёти, 700084, Тошкент,
Х. Асомов кўчаси, 7-ый**

Тошкент Молия институти босмахонасида ризография усулида чоп
этилди.

700084, Тошкент, Х. Асомов кўчаси, 7-ый